

**EMBUKU E SAYIATA TOO
LTUNG'ANA POOKI**

INAATII

Sayiata e Seran	1
Sayiata e Teipa	10
Inkishiaakinot Naairuki e Athanasio Sinyati	18
Litani	21
Inkomonon o Inashin	27
Inkomonon o Ilomon Supati o Impala te Jumapilini Pooki o Lari Obo	31
Enkoitei Naishorieki Endaa o Laitoriani, anaa Enchola Sinyati	51
Enkoitei Naibatisieki Inkera Kunini te Kue Iltung'ana ti atua Enkanisa	65
Enkoitei Naibatisieki Iltung'ana Kituaak anaa Ilooidim siiaatang'amai oopeny	72
Enkibara (Katekismo)	79
Enkoitei Nasipunyieki	85
Enkoitei Natumyieki Enkiyama Sinyati	88
Enkoitei e Nkomono te nkata Nanukari Lootuata	94
Inkishiaakinot Osom o Saal e Mbba e Nkai	97

LONDON

S · P · C · K

1967

SAYIATA E SERAN POOKI PAR TI ATUA OLARI

Te ng'asunoto e Sayiata e Seran nejo Olarikoni to ltoilo kitok te naa obo anaa oare te kulo kererin sinyat te kulo ooitanapisheteki. Kore te siadi nejo anaa nairukurukore kulo.

ILKERERIN

KORE ilasari le Nkai naa enkishui natigile: kore oltau otigile neisina mimen Iyie, Na Ai. *Zab. 51. 17.*

Kainyototo alo enetii Papa, najoki Papa, kaitarroyie te keper, naaitarrika iyie, meishiaakino ti nikimbot ajo enkerai ino. *Luka 15. 18, 19.*

Ti nikijo mikiata ing'ok kisap ate, nemetii nadede atua iyioo, kake ti nikilimu iyioo ing'ok ang, neitabaya ninye amu keata sipata napalakinye iyioo ing'ok ang, neutuk iyioo matung'uai pooki nemesinya. *I Yoh. 1. 8, 9.*

Te nkata e Inoto o Laitoriani lang, naa Christmas. Eng'orai, ayaki intai ilomon supati le ng'ida kitok naaku too ltung'ana pooki; amu etiikaki intai ena par ti atua enkang e Daudi Olaitajeunoni, naa ninye Kristo, Olaitoriani.

Luka 2. 10, 11.

Juma Supat. Amu eibalunyie Enkai enhaman enye te yioo, amu kore apa ewon kira ilaitarruorrok, ketua Kristo te nkaraki iyioo. *Rom. 5. 8.*

Empiunoto. Kore taata etopiua Kristo aing'uaa ilootuata, netaa olng'anayioi le kue te lelo ooilorate.

I Kor. 15. 20.

Enkilepata. Naa ninye eilepie Enkai te nkaina enye e tatene pee eaku Olaitoriani naa Olaitajeunoni, pee eisho Israeli enkirridunoto o impalakinot oo ng'ok enche.

Iasat 5. 31.

Pentekost. Ai ti niyiololo intai oora torrok aishoo inkera inchi inkishorot supati, amaa, melusoo Papa linchi otii keper aisho Enkiyang'et Sinyati kuldo oomon?

Luka 11. 13.

SAYIATA E SERAN

Kore tene kejo Olarikoni ena kitarriyianata.

Ilalashera laainei ooshami keitadoli iyoo ti atua Ilkigerot too nkulie ng'uejinin maibalunye nikilimu impukunot pooki oo ng'ok o ntorrok ang, nimikisudoo anaa kisiapaa ninche te kue enkomom e Nkai Olaidimani le pooki, Papa lang le keper; kake matolimu to ltau obor, oata enkanyit, oirridu, nening'isho; peeyie kitum empalakinoto te supatisho enye o enkordunoto enye nemeata enkiting'oto. O te naa keishiaakino too iyoo ti nikimbalie ing'ok ang te mborron te kue Enkai inkatitin pooki; keishiaakino alusoo ti nikinko inyi enkata nikinturrurro aashukoki enashe too mayanat kituua nikitang'amaitie too nkaik enyena, aaibalie enkisia enye naishiaakino oleng, aaning Orerei lenye ora sinyati aaomonu nena baa nayieuni too seseni o te nkishui ang. Te nkaraki inia kasai intai pooki ootii ene, erukurukoreki too ltauja ooibor o too ltoiloishi oobor o matabaki olorika le mpiris otii keper, entojo te siadi nanu;

Naa kulo sii irerei loo ltung'ana pooki le limunoto oo ng'ok, naa kulo ejo iltung'ana pooki te siadi Olarikoni, etigila pooki kung'a.

NAA Papa, Olaidimani le pooki oing'erisho oleng; ikintaroitie iyoo, nikiminaitie too nkoitei inono anaa inkerra naashomo kitala. Nikirukurukore oleng inkiguenat o ing'uarat oo ltauja lang maate. Nikitadia inkitanapat inono sinyat. Kore enaishiaakino nikias, neitu kias, nikitaasa nemeishiaakino nikias; Nimikiata seriani ti atua iyoo maate. Kake iyie, Olaitoriani, ing'eru iyoo, ilaitarruorrok ooshal. Na Ai, tapalaki lelo oolimu inkitadiat enche. Tang'amai lelo oirridutuo: te risioroto lekutukie linono lintaka iltung'ana pooki ti atua Kristo Yesu Olaitoriani lang. Na Papa oata inkordunot naalang pooki inchoo iyoo te nkaraki ninye; Pee kinchu abaki ena par te nkishon naanyit iyie, te sinyatisho o te mborron, pee eishori Enkarna ino sinyati enkitoo. Amin.

Enkitaiinoto oo ng'ok; nalikoo Olarikoni kitok openy, eitashe, ewon egilita iltung'ana kung'a.

ENKAI, Olaidimani le pooki, Menye Olaitoriani lang Yesu Kristo, lemeyieu nee cloas ing'ok, kake enaikash te ninye te neibelekenya aing'uaa entorroni enye pee epok;

SAYIATA E SERAN

naa keishoo ninye engolon ilaisiaiak lenyena neitanap pee elikoo aaitayiolo elakunoto o empalakinoto oo ng'ok enche too ltung'ana lenyena ooirridutuo; Nepalaki ninye nelaku lelo pooki ooirridutuo to nadede, neiruk ilomon lenyena sinyat nemetii sapare. Te nkaraki inia matoomon ninye pee eisho iyoo enkirridunoto nadede, o Enkiyang'et enye Sinyati pee eiting'id ninye nena baa nikiasita taata; pee eaku supat naa sinyati enkishon ang abaki taata o kenya ake; pee kibaki te nkiting'oto eng'ida enye o ntarasi; ti atua Yesu Kristo Olaitoriani lang.

Kore te ne o too nkiting'ot oo nkomonon pooki nejo iltung'ana, Amin.

Kore te siadi negil Olarikoni kitok kung nejo Enkomono o Laitoriani to ltoilo oning'oi: naa kore egilita iltung'ana kung'a nejo te nebo ninye te na kata o enkata pooki naji te Nkomono e Nkai.

PAPA lang otii keper, Meitisinyi Enkarna ino. Meu enkitoria ino. Metaasi eniyieu te nkop, anaa enatiu te keper. Inchoo iyoo taata endaa ang naiteumu iyoo. Nipalaki iyoo inkitarruorrot ang, anaa ti nikipalaki iyoo ilooitarriki iyoo. Nimirik iyoo atua isaanat, kake intajeu iyoo te ilo arruoni. Amu enino enkitoria, o engolon, o enkitoo, Intarasi o intarasi. Amin.

Nejo sii atiu nyi

Olaitoriani, tobolo inkutukie ang.
Walata. Neitaduaya inkutukie ang enkisia ino.
Kasisi. Na Ai, tasioki pee intajeu iyoo.
Walata. Olaitoriani, tasioki tareto iyoo.

Kore te neitasho pooki, nejo,

Metaa ne Papa enkitoo, o ne Nkerai : o ne Nkiyang'et Sinyati;
Walata. Anaa enatiu te ng'asunoto o taata: o metabaa anaa intarasi. Amin.
Kasisi. Esisa intai Olaitoriani.
Walata. Meisisi Enkarna o Laitoriani.

Te ne eranyi ele Zaburi Venite, nemara te Mpuri e Mpiumoto.

SAYIATA E SERAN

VENITE

Zaburi 95

WOTU, mataranyaki Olaitoriani : matishipakinoto osoit le njeunoto ang.

Maape asioyo, aaitashe te kue enkomom enye, nikincho enashe : nikishipakino te zaburi.

Amu Olaitoriani, ninye Enkai kitok : naa Olaiguenani kitok te shumata inkaiitin pooki.

Netii enkaina enye ng'uejitin naagut e nkop : naa enenye sii enkadori oo ldoinyo.

Naa enenye enaiposha, ninye oitobira makewan : inkaik enyena naaitobirita enkop natoyo.

Wotu, matoomon, nikisai ninye : matigil kung'a te kue Olaitoriani oitobira iyioo.

Amu ninye Olaitoriani Enkai ang : nikira iyioo iltung'ana le nkirita enye, nikira inkerra e nkaina enye.

Ena par, te naa ining'inng oltoilo lenye, emintagol iltauja linchi : anaa te nkitagoroto, anaa te inia par o ntemat ti ong'ata.

Peeiyie aatem ilominyi nanu : naajur, netadua esiai ai.

Ilarin artam aaitogorito ilo porror, najo : Olorere ninche ootalama too ltauja lenche: neitu eyiolou inkoiteii aainei;

Inia peeiyie ainosie olmomai ti atua engoro ai : inchere, mejing ninche enkiyeng'iyeng'ata ai.

Metaa ne Papa enkitoo, o ne Nkerai : o ne Nkiyang'et Sinyati;

Anaa natiu te ng'asunoto o taata : o metabaa anaa intarasi. Amin.

Neirukurukore Zaburi te nkata enye anaa naitanapisheteki o metabaki te nkiting'oto e pooki Zaburi ti atua olari ololong'a o sii te nkiting'oto e Magnificat o Nunc Dimittis, keisomi kulo rerei, anaa keranyi,

Metaa ne Papa enkitoo, o ne Nkerai : o ne Nkiyang'et Sinyati;

Walata. Anaa natiu te ng'asunoto o taata: o metabaa anaa intarasi. Amin.

Keibalieki Enkisoma to ltoilo oning'oi, Enkisoma e kue ti atua Olning'o Musana, anaa naitanapisheteki ti atua Kalendar

SAYIATA E SERAN

namara empar naitanapisheteki te nkai Kisoma. Naa kore oloisom neitashe eing'or embata natii iltung'ana pee ening oleng anaa inootii.

Kore te siadi neisomi anaa eranyi sinkolio le Te Deum Laudamus te mpar pooki e olari ololong'a. Ing'orai: ajo te ng'asunoto e pooki Kisoma, nejo elde oisom, Keng'as tene Chapter naje, Embuku naje, anaa eng'asunoto o lkereri oje. Naa te nkiting'oto e Nkisoma nejo, Enkisoma e kue anaa ne are eiting'o tene.

TE DEUM LAUDAMUS

AIKISIS iyie, Enkai : nikilimu aajo iyie Olaitoriani.

Aikiomon iyie inkuapi pooki : Papa lo ntarasi.

Kinjiraki ilmalaikani pooki too ltoiiloishi : inkeperi o inkitooni enche pooki.

Te kue iyie Makerubi o Maserafi : mepal mejo, Sinyati, sinyati, sinyati : Olaitoriani Enkai o lororani. Kebore keper o enkop enkitoria : e nkitoo ino.

Aikisis iyie : olturrur le nkitoo oo lkipaareta.

Aikisis iyie : enhola enopeny enkisisa nolaidecidetak. Aikisis iyie : olorora supat loo lalimunok ootaraki. Enkanisa sinyati e nkop pooki : aikimbalunye iyie.

Papa : olopeny enkitoria nemeata enkiting'oto.

Oinoti lino kelei : le nchunet o lonadede.

O sii Enkiyang'et Sinyati : Olarettoni.

Iyie Kristo : ira Olaiguenani le nkitoo.

Ira iyie Oinoti lo ntarasi : le Papa.

Kore pee intaii kewan pee intajeu iltung'ana : eitu imenenkoshoke e inia Oliontoi.

Pee imir emion e olke : itaboloko iltung'ana pooki ooiruk enkitoria natii keper.

Niwonita iyie te nkaina e tatene e Nkai : ti atua enkitoo e Papa.

Aikirukuto aajo ilotu : pee iaku Olaiguenani lang.

Ayia kiomon iyie, tereto ilaisiaiak linono : linyang'ua to sarge lino kirotet.

Inchoo eikenakini te nebo sinyat linono : ti atua enkitoo e intarasi.

Olaitoriani, intajeu iltung'ana linono : nimayian ila-jung'ok linono.

SAYIATA E SERAN

Intoria : nilepie intarasi.

Imparitin pooki : aikisis iyie.

Nikiomon Enkarna ino : intarasi o intarasi.

Ting'idai, Olaitoriani : irita iyioo ena par pee mikias ing'ok.

Olaitoriani, ing'eru iyioo : ing'eru iyioo.

Olaitoriani, inchoo iyioo olng'er lino : amu aikisilig iyie.

Olaitoriani, aisiliga iyie: mincho aitorari.

Te ne eisomi ajo inyi Enkisoma e are ti atua Olning'o Ng'ejuk.

Kore te siadi eirukurukore ele sinkolio.

JUBILATE DEO

Zaburi 100

ENTISHIPAKINOTO Olaitoriani, intai inkuapi pooki : esiaia Olaitoriani te ng'ida, wotu te kue enkomom enye, iranyitata.

Entayiolo Olaitoriani inchere ninye Enkai : ilo apa oitobira iyioo, nikira iyioo ilenyena; ikira iyioo iltung'ana lenyena, o inkerra e mboo enye.

Entijing inkishomin enyena ninchosho enashe; entijing olkirrie lenye te nkisia : Enchoo enashe, nimayianana Enkarna enye.

Amu eisupat Olaitoriani, naa no ntarasi enkordunoto enye : newon nadede enye o metabaki ishoritin pooki.

Metaa ne Papa enkitoo : o ne Nkerai o ne Nkiyang'et Sinyati;

Anaa enatiu te ng'asunoto o taata : o metabaa anaa intarasi. Amin.

Nejo ilo Arikoni o kuldo tung'ana imbaa e Nkirukoto eoo Lkipaareta eitasheito pooki.

IMBAA E NKIRUKOTO EOO

LKIPAARETA

Kairukuto te Nkai Papa Olaidimani le pooki, Olaitobirani le keper o le nkop :

O te Yesu Kristo, Enkerai enye kelei, Olaitoriani lang, otunutateki te Nkiyang'et Sinyati, otiuwaki te inia Oliontoi Maria, oitamioki te nkitoria e Pontio Pilato, neshei te salaba, nee, nenukari, nedoki enkop oo lootuata; kore te

SAYIATA E SERAN

mpar e uni nepiu aitoki aing'uaa ilootuata, neilepaa alo keper, newonita te nkaina e tatene e Nkai Papa Olaidimani le pooki; naa keitoki aing'uaa idie alotu aiguenare ilooishu abaki ilootuata.

Nairukuto te Nkiyang'et Sinyati; Enkanisa sinyati natii inkuapi pooki; Enchola oo Sinyat; Empalakinoto oo ng'ok; Empiunoto e sesen; o Empuan nemeish. Amin.

Kore te siadi eemoni kuna omonon naairukurukore ene, egilita iltung'ana kung'a te nkanyit, neituruk Olarikoni ajo to ltoilo kitok,

Metoboitare Olaitoriani intai.

Walata. Mikitoboitare enkishui ino.

Kasisi. Matoomon.

Olaitoriani, ing'eru iyioo

Kristo, ing'eru iyioo.

Olaitoriani, ing'eru iyioo.

Te ne ejo Olarikoni o kuldo tung'ana Enkomono o Laitoriani too ltoiloishi kituua.

PAPA lang otii keper, Meitisinyi Enkarna ino. Meu enkitoria ino. Metaasi eniyieu te nkop, anaa enatiu te keper. Inchoo iyioo taata endaa ang naiteumu iyioo. Nipalaki iyioo inkitarruorrot ang, anaa ti nikipalaki iyioo ilooitarriki iyioo. Nimirik iyioo atua isaanat; kake intajeu iyioo te ilo arruoni. Amin.

Neitashe Olarikoni tene ajo,

Olaitoriani, intodua ti atua iyioo olng'er lino.

Walata. Nincho iyioo enjeunoto ino

Kasisi. Olaitoriani, tamayiana ilaitoriak lang.

Walata. Nining iyioo to lng'er enkata nikimbot iyie.

Kasisi. Inchopoki ilaisiaiak linono sipat.

Walata. Ninting'id ilgelunot linono.

Kasisi. Olaitoriani, intajeu iltung'ana linono.

Walata. Nimayian enjung'oto ino.

Kasisi. Inchoo iyioo sotua too nkatitin ang, Olaitoriani.

Walata. Amu, Na Ai, meatai likai ojing iyioo namara iyie.

Kasisi. Na Ai, intusupata iltauja lang atua.

Walata. Nimintai te iyioo Enkiyang'et ino Sinyati.

Neirukurukore te ne Inkomonon uni: ne kue naa ne inia Par naitanapishete ti atua Enchola: ne are nikiomonoki Sotua;

SAYIATA E SERAN

ni uni nikiomonoki Mpiris nawonyeki te supatisho. Nemei-belekenya nena Omonon are e nkiting'oto, kake ej i enkata pooki to lari te Nkomono e Seran, anaa nairukurukore ene; egilita kuldo tung'ana kung'a pooki.

ENKOMONO E ARE TE SOTUA

IYIE Enkai, Olang'asunoni le Sotua, olachamani le nchola, kore enkishon ang eo ntarasi naa ti nikiyiolo iyie, naa ti nikisiai iyie naa inia enkisiaa nabaya katukul; Torripo iyioo ilaisiaiak linono oobor too larabali pooki loo mang'ati lang; metaa mikiurie engolon e pooki mang'antita, kisiliga oleng erripoto ino, ti atua engolon e Yesu Kristo Olaitoriani lang. *Amin.*

ENKOMONO E UNI TE MPIRIS

IYIE Olaitoriani, Papa lang le keper, Enkai Olaidimani le pooki lo ntarasi, oitabaka iyioo eng'asunoto e ena par te seriani; Irita taata iyioo te ngolon ino nagol, mincho iyioo ena par kiria ti atua ing'ok, ana kikuet atua inkasurot e mpukunot pooki; kake toriko iasat ang pooki te nkitoria naitanapishe iyie, pe kias oshi ake naishiaakino too nkonyek inono; ti atua Yesu Kristo Olaitoriani lang. *Amin.*

Kore te ne neranyi Sinkolio.

Neji te ne inkomonon naairukurukore mara enkata naji Litani.

ENKOMONO TE SIRKALI

ENKAI, Olaidimani le pooki, oitore iloreren pooki nintanap te nchaman ino supat ikisai iyie ng'ora to ln'ger lino Rais lang o ilaisiaiak lenyena pee easishere enkitoria ninchoo mparitin pooki, te nkaraki osotua le nkop, o eseriani, o enkanyit, o esupatisho te ele orere o te supatisho e Nkanisa ino sinyati; ti atua Yesu Kristo Olaitoriani lang. *Amin.*

ENKOMONO TOO LOIRITA

ILTAUJA LOO LTUNG'ANA O SII TOO LTUNG'ANA POOKI

ENKAI, Olaidimani lo ntarasi, iyie openy oidim ataasa noo nkidimat; ikiomon iyie intadoki Enkiyang'et ino e mpiris nayau supatisho, te keper Askofuni lang, o Iloirita iltauja loo ltung'ana, o pooki natumokino iltung'ana

SAYIATA E SERAN

ooishoki meiritisho; tubukoki ninche emayanata ino e oshi ake, pee kinting'id to nadede; Nincho nena te nkaraki enkanyit o Lairitani lang o Olaomonokinoni lang Yesu Kristo. *Amin.*

ENKOMONO TOO LTUNG'ANA LOO MPUKUNOT O LE RAPITO POOKI

IYIE Na Ai, Olaitobirani, Olairitani loo ltung'ana pooki ikiomonoki iltung'ana loo mpukunot pooki o le rapito pooki, tachama iyie nintayiolo ninche inkoiteii inono, o enjeunoto ino ti atua iloshon pooki.

Ikiomonoki aaitulusoo Enkanisa sinyati naitaiutua ilkipaareta natii inkuapi pooki meitasho supat; pee eriki neitoreii ninye te Nkiyang'et ino Sinyati, metaa kore pooki oojo ikira le Kristo, nerikuni ti atua enkoitei nadede neibung enkirukoto manabo too ltauja o te enat o sotua, o te supatisho e nkishon.

Kore te siadi ikiomonoki iyie te supatisho e Papa lelo pooki ooata isinaitin, anaa emion, te naa too ltauja anaa too seseni anaa too ntokitin enche; Inchoo mikinting'ida aret nintagol ninche te risioroto isinaitin lenche pooki, nincho ninche ng'iriata ti atua isinaitin lenche, o enkiting'-oto naiting'id ninche ti atua inkitamiot enche pooki. Nikiomon nena te nkaraki Yesu Kristo enkorrok enye. *Amin.*

ENKOMONO E KRISOSTOM SINYATI

NA Ai, Olaidimani le pooki, oisho iyioo mpiris te na kata aayaki iyie iyieunot ang, iyioo pooki te mparunoto nabo; naa iyie oitayia lekutuk, ajo te netumo iltung'ana oare anaa okuni ooiturrurrote te Nkarna ino, naa incho entoki nayieu; intabaki ninche taata, Olaitoriani, iyieunot o enkomono oo ilaisiaiak linono too naishiaakino iyioo; nincho iyioo matayiolo naadede inono ti atua ena kop, o enkishon nemeiting ti atua enkop nalotu. *Amin.*

2 Korinthio 13. 14

EMPIRIS o Laitoriani lang, Yesu Kristo, o enhaman e Nkai, o enhola e Nkiyang'et Sinyati metaa te nebo iyioo pooki intarasi. *Amin.*

Kore enkoitei e Sayiata e Seran pooki o lari neiting te ne.

SAYIATA E TEIPA

SAYIATA E TEIPA POOKI PAR TI ATUA OLARI

Te ng'asunoto e Sayiata e Teipa nejo Olarikoni to ltoilo kitok te naa obo anaa oare te kulo kererin sinyat te kulo ooitanapisheteki. Kore te siadi nejo anaa nairukurukore kulo.

ILKERERIN

KORE ilasari le Nkai, naa enkishui natigile: kore oltau otigile neisina mimen, Iyie, Na Ai. *Zab. 51. 17.*

Kainyototo alo enetii Papa, najoki, Papa, kaitarroyie te keper naitarrika iyie, meishiaakino ti nikimbot ajo enkerai ino. *Luka 15, 18, 19.*

Ti nikijo mikiata ing'ok kisap ate, nemetii nadede atua iyioo, kake ti nikilimu iyioo ing'ok ang, neitabaya ninye amu keata sipata napalakinye iyioo ing'ok ang, neituk iyioo matung'uai pooki nemesinya. *I Yoh. 1. 8, 9.*

Te nkata e Inoto o Laitoriani lang, naa Christmas. Eng'orai, ayaki intai ilomon supati le ng'ida kitok naaku too ltung'ana pooki; amu etiikaki intai ena par ti atua enkang e Daudi Olaitajeunoni, naa ninye Kristo, Olaitoriani.

Luka 2. 10, 11.

Juma Supat. Amu eibalunye Enkai enhaman enye te yioo, amu kore apa ewon kira ilaitarruorrok, ketua Kristo te nkaraki iyioo. *Rom. 5. 8.*

Empiunoto. Kore taata etopia Kristo aing'uaa ilootuata, netaa olng'anayioi le kue te lelo ooilorate.

I Kor. 15. 20.

Enkilepata. Naa ninye eilepie Enkai te nkaina enye e tatene pee eaku Olaitoriani naa Olaitajeunoni, pee eisho Israeli enkirridunoto o impalakinot oo ng'ok enche.

Iasat 5. 31.

Pentekost. Ai ti niyiololo intai oora torrok aishoo inkera inchi inkishorot supati, amaa, melusoo Papa linchi otii keper aisho Enkiyang'et Sinyati kuldo oomon?

Luka 11. 13.

Kore tene kejo Olarikoni ena kitarriyanata.

Ilalashera laainei ooshami, keitadoli iyioo ti atua Ilkigerot too nkulie ng'uejitin maibalunye nikilimu impukunot pooki oo ng'ok o ntorrok ang, nimikisudoo anaa kisiapaa ninche te kue enkomom e Nkai Olaidimani le pooki, Papa lang le keper; kake matolimu to Itau obor, oataenkanyit, oirridu, nening'isho; peeyie kitum empalakinoto te supatisho enye o enkordunoto enye nemeata enkiting'oto. O te naa keishiaakino te iyioo ti nikimbalie ing'ok ang te mborron te kue Enkai inkatitin pooki; keishiaakino alusoo ti nikinko inyi enkata nikinturrurro aashukoki enashe too mayianat kituua nikitang'amaitie too nkaik enyena, aaibalie enkisisa enye naishiaakino oleng, aaning Orerei lenye ora sinyati aaomonu nena baa nayieuni too seseni o te nkishui ang. Te nkaraki inia kasai intai pooki ootii ene, erukurukoreki too Itauja ooibor o too Itoiloishi oobor o matabaki olorika le mpiris otii keper, entojo te siadi nanu;

Naa kulo sii irerei loo ltung'ana pooki le limunoto oo ng'ok, naa kulo ejo iltung'ana pooki te siadi Olarikoni, etigila pooki kung'a.

NAA Papa, Olaidimani le pooki oing'erisho oleng; ikintaroitie iyioo, nikiminaitie too nkoitei inono anaa inkerra naashomo kitala. Nikirukurukore oleng inkiguenat o ing'uarat oo Itauja lang maate. Nikitadia inkitanapat inono sinyat. Kore enaishiaakino nikias, neutu kias, nikitaasa nemeishiaakino nikias; Nimikiata seriani ti atua iyioo maate. Kake iyie, Olaitoriani, ing'eru iyioo, ilaitarruorrok ooshal. Na Ai, tapalaki lelo oolimu inkitadiat enche. Tang'amai lelo oirridutuo: te risioroto lekutukie linono lintaka iltung'ana pooki ti atua Kristo Yesu Olaitoriani lang. Na Papa oata inkordunot naalang pooki inchoo iyioo te nkaraki ninye; Pee kinchu abaki ena par te nkishon naanyit iyie, te sinyatisho o te mborron, pee eishori Enkarna ino sinyati enkitoo. Amin.

Enkitaiinoto oo ng'ok; nalikoo Olarikoni kitok openy, eitashe, ewon egilita iltung'ana kung'a.

ENKAI, Olaidimani le pooki, Menye Olaitoriani lang Yesu Kristo, lemeyieu nee oloas ing'ok, kake enakash te ninye te neibelekenya aing'uaa entorroni enye pee epok; naa keishoo ninye engolon ilaisiaiak lenyena neitanap pee

SAYIATA E TEIPA

elikoo aaitayiolo elakunoto o empalakinoto oo ng'ok enche too ltung'ana lenyena oo irridutuo; Nepalaki ninye nelaku lelo pooki oo irridutuo to nadede, neiruk ilomon lenyena sinyat nemetii sapare. Te nkaraki inia matoomon ninye pee eishoo iyioo enkirridunoto nadede, o Enkiyang'et enye Sinyati pee eiting'id ninye nena baa nikiasita taata; pee eaku supat naa sinyati enkishon ang abaki taata o kenya ake; pee kibaki te nkiting'oto eng'ida enye o ntarasi; ti atua Yesu Kristo Olaitoriani lang. *Amin.*

Kore te siadi negil Olarikoni kitok kung nejo Enkomono o Laitoriani egilita sii iltung'ana kung'a nejo te nebo ninye
PAPA lang otii keper, Meitisinyi Enkarna ino. Meu enkitoria ino. Metaasi eniyieu te nkop, anaa enatiu te keper. Inchoo iyioo taata endaa ang naiteumu iyioo. Nipalaki iyioo inkitarruorrot ang, anaa ti nkipalaki iyioo ilooitarriki iyioo. Nimirk iyioo atua isaanat, kake intajeu iyioo te ilo arruoni. Amu enino enkitoria, o engolon, o enkitoo, Intarasi o intarasi. *Amin.*

Nejo sii atiu inyi,

Olaitoriani, tobolo inkutukie ang.

Walata. Neitaduaya inkutukie ang enkisisa ino.

Kasisi. Na Ai, tasioki pee intajeu iyioo.

Walata. Olaitoriani, tasioki tareto iyioo.

Kore te neitasho pooki, nejo,

Metaa ne Papa enkitoo, o ne Nkerai : o ne Nkiyang' et Sinyati;

Walata. Anaa enatiu te ng'asunoto o taata : o metabaa anaa intarasi. *Amin.*

Kasisi. Esisa intai Olaitoriani.

Walata. Meisisi Enkarna o Laitoriani.

Kore te ne neji anaa keranyi Zaburi te nkata enye anaa naitanapisheteki. Kore te siadi keisomi Enkisoma e Olning'o Musana anaa naitanapisheteki. Naa kore te siadi inia, keatai Magnificat (anaa Sinkolio e Nkoliontoi Maria Namayiana) anaa nairukurukore te ne.

SAYIATA E TEIPA

MAGNIFICAT

Luka 1.46-55

EISISITA oltau lai Olaitoriani: neiting'idi oltau lai Enkai Olaitajeunoni lai.

Amu eng'ora : enkitisho e nkaisiaiani enye.

Amu idol taata o kenya : kaaji kaamayiana too ishoritin pooki.

Amu ilo oata engolon kaaitaasa imbaa kituua : naa keji Enkarna enye sinyati.

Netii enking'erunoto enye metabaki ishoritin pooki : lelo oourie ninye.

Keitaduayie engolon te nkaina enye: neisardaikie ilooilash ti atua imparunot oo ltauja lenche.

Neitadoua ilaiguenak too lorikan lenche : neilepie lelo oobor o iloshal.

Neiteumua ilooata esumash too ntokitin supati : neirriuaa ilkarsisi erook inkaik.

Ketereto Israeli, olaisiaiani lenye, pee eparo enking'-erunoto enye : anaa natiaaka opapa lang, Ibrahim o eishoi enye metabaki intarasi.

Metaa ne Papa enkitoo o ne Nkerai : o ne Nkiyang' et Sinyati;

Anaa enatiu te ng'asunoto o taata : o metabaa anaa intarasi. *Amin.*

Kore te siadi keisomi atua Olning'o Ng'ejuk anaa enaitanapisheteki. Kore te siadi neirukurukore Nunc Dimittis.

NUNC DIMITTIS

Luka 2. 29-32

OLAITORIANI, inchoo taata olaisiaiani lino meshomo to sotua : te risioroto Orerei lino.

Amu ketodua inkonyek aainei : enjeunoto ino

Nintobira : te kue inkomomi oo ltung'ana pooki;

Metaa ewang'an naitawang iloshon : neaku enkisisa o lorere lino, Israeli.

Metaa ne Papa enkitoo, o ne Nkerai : o ne Nkiyang' et Sinyati;

Anaa enatiu te ng'asunoto o taata : o metabaa anaa intarasi. *Amin.*

SAYIATA E TEIPA

anaa,

DEUS MISEREATUR

Zaburi 67

ING'ERU iyoo, Enkai, naa tamayiana iyoo : inchoo enkomom ino metawang'a te shumata iyoo:

Pee aa ore enkoitoi ino eyiolouni te nkop : neyiolou iloreren pooki enjeunoto ino.

Inchoo iloreren pooki mikisia iyie, Na Ai : inchoo iloreren pooki mikisia iyie.

Inchoo iloreren meting'idata nerany : amu iyie oiguenare iloreren te supatisho, nintore iloshon pooki ootii enkop.

Inchoo iloreren pooki mikisia iyie, Na Ai : inchoo iloreren pooki mikisia iyie.

Neponaa enkop inia kata ilng'anayio lenyena : nemayan iyoo Enkai, ee Enkai ang namayan iyoo.

Kemayan iyoo Enkai : neure ninye inkiting'ot e nkop.

Metaa ne Papa enkitoo, o ne Nkerai : o ne Nkiyang'et Sinyati;

Anaa enatiu te ng'asunoto o taata : o metabaa anaa intarasi. Amin.

Nejo ilo Arikoni o kuld tung'ana Imbaa e Nkirukoto oo Lkipaareta eitasheto pooki.

IMBAA E NKIRUKOTO EOO LKIPAAARETA

Kairukuto te Nkai Papa Olaidimani le pooki, Olaitobirani le keper o le nkop :

O te Yesu Kristo, Enkerai enye kelei, Olaitoriani lang, otunutateki te Nkiyang'et Sinyati, otiuwaki te inia Oliontoi Maria, oitamioki te nkitoria e Pontio Pilato, neshei te salaba, nee, nenukari, nedoki enkop oo lootuata; kore te mpar e uni nepiu aitoki aing'uaa ilootuata, neilepaa alo keper, newonita te nkaina e tatene e Nkai Papa Olaidimani le pooki; naa keitoki aing'uaa idie alotu aiguenare ilooishu abaki ilootuata.

Nairukuto te Nkiyang'et Sinyati; Enkanisa sinyati natii inkuapi pooki; Enchola oo Sinyat; Empalakinoto oo ng'ok; Empiunoto e sesen; o Empuan nemeish. Amin.

SAYIATA E TEIPA

Kore te siadi eomoni kuna omonon naairukurukore ene, egilita iltung'ana kung'a te nkanyit, neituruk Olarikoni ajo to ltoilo kitok,

Metoboitare Olaitoriani intai.

Walata. Mikitoboitare enkishui ino.

Kasisi. Matoomon.

Olaitoriani, ing'eru iyoo.

Kristo, ing'eru iyoo.

Olaitoriani, ing'eru iyoo.

Te ne ejo Olarikoni o kuld tung'ana Enkomono o Laitoriani too ltoiloishi kituua.

PAPA lang otii keper, Meitisinyi Enkarna ino. Meu enkitoria ino. Metaasi eniyieu te nkop, anaa enatiu te keper. Inchoo iyoo taata endaa ang naiteumu iyoo. Nipalaki iyoo inkitarruorrot ang, anaa ti nikipalaki iyoo ilooitarriki iyoo. Nimirik iyoo atua isaanat, kake intajeu iyoo te ilo arruoni. Amin.

Neitashe Olarikoni te ne ajo,

Olaitoriani, intouda ti atua iyoo olng'er lino.

Walata. Nincho iyoo enjeunoto ino.

Kasisi. Olaitoriani, tamayiana ilaitoriak lang.

Walata. Nining iyoo to lng'er enkata nikimbot iyie.

Kasisi. Inchopoki ilaisiaiak linono sipat.

Walata. Ninting'id ilgelunot linono.

Kasisi. Olaitoriani, intajeu iltung'ana linono.

Walata. Nimayian enjung'oto ino.

Kasisi. Inchoo iyoo sotua too nkatitin ang, Olaitoriani.

Walata. Amu, Na Ai, meatai likai ojing iyoo namara iyie.

Kasisi. Na Ai, intusupata iltauja lang atua.

Walata. Nimintai te iyoo Enkiyang'et ino Sinyati.

Neirukurukore te ne Inkomonon uni; ne kue ne inai Par; ne are neomonokini Sotua; kore ne uni naomoni te retoto enkiritata atua inkasurot pooki, anaa natii ene te siadi; keisomi kuna omonon are e nkiting'oto imparitin pooki te nkata e Sayiata e Teipa to lari ololong'a, nemeibelekenya.

SAYIATA E TEIPA

ENKOMONO E ARE TI ATUA SAYIATA E TEIPA

NA Ai, Olaidimani le pooki, iyie eing'uaa ing'uarat sinyat pooki, o lomon supati o siai nadede pooki; Inchoo ilaisiaiak linono ilo sotua lemeidim enkop aishoo; pee enyok iltauja lang aaibung inkitanapat inono, metaa keiritai iyoo te iyie te nkuretisho oo lmang'ati lang, nikipuoye imparitin ang enkiyeng'iyengata o enkitering'ata; ti atua inkishaakinot enyena Yesu Kristo Olaitajeunoni lang. *Amin.*

ENKOMONO E UNI TE RETOTO TOO NKASUROT POOKI

INTAWANG'A iyoo ti atua enaimin ang, ikiomon iyie, Olaitoriani; o te nkordunoto ino kitok torripo iyoo too nkasurot o too nkaramat pooki naarisho e na kewarie; te nkaraki enhaman e Nkerai ino kelei, Olaitajeunoni lang Yesu Kristo. *Amin.*

Kore te ne neranyi Sinkolio.

Neji te ne inkomonon naairukurukore mara enkata naji Litania.

ENKOMONO TE SIRKALI

ENKAI, Olaidimani le pooki, oitore iloreren pooki, nintanap te nchaman ino supat, ikisai iyie ng'ora to Ing'er lino, Rais lang o ilaisiaiak lenyena pee easishere enkitoria ninchoo imparitin pooki, te nkaraki osotua le nkop, o eseriani, oenkanyit, o esupatisho te ele orere o te supatisho e Nkanisa ino sinyati; ti atua Yesu Kristo Olaitoriani lang. *Amin.*

ENKOMONO TOO LOIRITA ILTAUJA LOO LTUNG'ANA O SII TOO LTUNG'ANA POOKI

ENKAI, Olaidimani lo ntarasi, iyie openy oidim ataasa noo nkidimat; ikiomon iyie intadoki Enkiyang'et ino e mpiris nayau supatisho, te keper Askofuni lang, o Illoirita iltauja loo Ltung'ana, o pooki natumokino iltung'ana ooishookimeiritisho; tubukoki ninche emayanata ino e oshi ake, pee kinting'id to nadede; Nincho nena te nkaraki enkanyit o Lairitani lang o Olaomonokinoni lang Yesu Kristo. *Amin.*

SAYIATA E TEIPA

ENKOMONO TOO LTUNG'ANA

LOO MPUKUNOT POOKI O LE RAPITO POOKI

IYIE Na Ai, Olaitobirani, Olairitani loo ltung'ana pooki ikiomonoki iltung'ana loo mpukunot pooki o le rapito pooki, tachama iyie nintayiolo ninche inkoiteii inono, o enjeunoto ino ti atua iloshon pooki.

Ikiomonoki aaitulusoo Enkanisa sinyati naitaiutua ilkipaareta natii inkuapi pooki meitasho supat; pee eriki neitoreii ninye te Nkiyang'et ino Sinyati, metaa kore pooki oojo ikira le Kristo, nerikuni ti atua enkoitei nadede neibung enkirukoto manabo too Itauja o te enat o sotua, o te supatisho e nkishon.

Kore te siadi ikiomonoki iyie te supatisho e Papa lelo pooki ooata isinaitin, anaa emion, te naa too iltauja anaa too seseni anaa too ntokitin enche; Inchoo mikinting'ida aret nintagol ninche te risoroto isinaitin lenche pooki, nincho ninche ng'iriata ti atua isinaitin lenche, o enkiting'-oto naiting'id ninche ti atua inkitamiot enche pooki. Nikiomon nena te nkaraki Yesu Kristo enkorrok enye. *Amin.*

ENKOMONO E KRISOSTOM SINYATI

NA Ai, Olaidimani le pooki oisho iyoo mpiris te na kata aayaki iyie iyieunot ang, iyoo pooki te mparunoto nabo; naa iyie oitayia lekutuk, ajo te netumo iltung'ana oare anaa okuni ooiturrurrote te Nkarna ino, naa incho entoki nayieu; intabaki ninche taata, Olaitoriani, iyieunot o enkomono oo ilaisiaiak linono too naishiaakino iyoo; nincho iyoo matayiolo naadede inono ti atua ena kop, o enkishon nemeiting ti atua enkop nalotu. *Amin.*

2 Korinthio 13. 14

EMPIRIS o Laitoriani lang, Yesu Kristo, o enhaman e Nkai, o enchola e Nkiyang'et Sinyati metaa te nebo iyoo pooki intarasi. *Amin.*

Kore enkoitei e Sayiata e Teipa enkata pooki o lari neiting te ne.

INKISHIAAKINOT NAAIRUKI E ATHANASIO SINYATI

QUICUNQUE VULT

Kore pooki ng'ai ocham neitajeuni : meata ajo meng'as enkibung'ata e nkirkukoto natii atua Enkanisa e Kristo natii enkop pooki.

2 Naa te neitu eibung oltung'ani inia kirukoto nalolong'a neitaa torrono : meing'ashi keimin intarasi.

3 Naa ena enkirukoto e Nkanisa e Kristo natii enkop pooki : inchere ikisai iyioo Enkai nabo ti atua Okuni, naa Okuni ti atua Nabo.

4 Metii enking'oling'olata atua nena korroki : anaa eori empukunoto enye oshi ake.

5 Amu ketii enkorrok nabo e Papa, o ai korrok ne Nkerai : o ai korrok e Nkiyang'et Sinyati.

6 Kake kore inia Aiisho nabo ake ti atua Papa o Enkerai o Enkiyang'et Sinyati : Kore inia Kitoo enye kerisio o inia Kitoria enye e ntarasi nataa nabo.

7 Enetiu Papa naa neijia etiu Enkerai : o Enkiyang'et Sinyati.

8 Kore Papa meitobiruno, nemeitobiruno Enkerai : nemeitobiruno Enkiyang'et Sinyati.

9 Meparunoi Papa, meparunoi Enkerai : nemeparunoi Enkiyang'et Sinyati.

10 Ketii Papa to ntarasi metabaki intarasi, netii Enkerai to ntarasi metabaki intarasi : o Enkiyang'et Sinyati to ntarasi metabaki intarasi.

11 Kore te nebo inia, metii Okuni lo ntarasi : kake kore lo ntarasi Obo.

12 Kore te siadi neijia etiu metii Okuni lemeparunoi anaa Okuni lemeitobiruno: kake lootii naa Obo lemeitobiruno anaa lemeparunoi.

13 Anaa neijia etiu Papa Olaidimani, naa neijia etiu Enkerai Olaidimani : naa Olaidimani Enkiyang'et Sinyati.

14 Kore te siadi metii Okuni oara Ilaidimak : kake iloara Laidimak naa Obo.

15 Naa neijia Papa naa Enkai : neijia etiu Enkerai naa Enkai : naa Enkai sii Enkiyang'et Sinyati.

16 Metii Inkaiitok uni : kake kore Enkai naatai naa nabo.

17 Naa neijia etiu Papa naa Olaitoriani, naa neijia etiu Enkerai naa Olaitoriani : naa Olaitoriani sii Enkiyang'et Sinyati.

18 Metii Ilaitoriak okuni : Olaitoriani otii naa obo.

19 Kore naismakini iyioo to nadede te Nkirukoto e Kristo : aibalunye pooki korrok nabo ajo Enkai naa Olaitoriani.

20 Kemitiki iyioo empukunoto e Nkanisa e Kristo natii enkop pooki : kijo keatai Inkaiitok uni anaa kijo Ilaitoriak okuni.

21 Eitu eitobiri Papa te pooki : neitu eitaini, neitu eini.

22 Kore Enkerai naa ne Papa openy : eitu eitaini neitu eitobiri kake etiuwaki.

23 Kore Enkiyang'et Sinyati etii atua Papa o atua Enkerai : neitu eitaini neitu eitobiri neitu eini, kake eipung'wa.

24 Metaa keatai Papa obo, mara okuni, naa nabo Enkerai, namara uni : nabo Enkiyang'et Sinyati, namara uni.

25 Naa kore ti atua nena Uni, meatai ne kue o ne siadi : nemeatai kitok alang enkai, nemeatai kiti alang enkai.

26 Kake kore kuna Uni naalolong'a keweni intarasi pooki ti atua nabo : naa kerisio ti atua nabo.

27 Kore ti atua kuna baa anaa natojoki : kore imatuan pokira Uni naa nabo, naa kore ti atua nabo naa imatuan Uni, naa kesaii.

28 Kore ilo oyieu neitajeuni : meata ajo meyioulou nena matuan pokira Uni.

29 Kore nalusoo te pooki nemeata ajo meyeuni te njeunoto e ntarasi : airuk te naishiaakino ilomon lo Laitoriani lang Yesu Kristo ajo keitaaki osesen.

30 Amu Enkirukoto naitioriori naa ena enkirukoto ang too Itauja lang o enkibalunoto : inchere Olaitoriani lang Yesu Kristo Enkerai e Nkai, naa Enkai naa Oltung'ani sii.

31 Naa Enkai te mpukunoto enye Papa neino te kue ewon meatai entoki naatai : naa Oltung'ani te mpukunoto e ng'otonye, etiuwaki atua ena kop.

32 Naa Enkai nabaya, naa Oltung'ani obaya : neata enkishui naparisho, o osesen lo ltung'ani.

33 Nerisio Papa te nkikenata e Nkaiisho enye : neaku kitisho te Papa te nkikenata oo ltung'ana.

34 Abaki aa Enkai te nebo oltung'ani : kake mara oare, kake Kristo obo.

35 Naa obo namara inia Aiisho naibelekenya aaku osesen : kake ilo Tung'ani oitaaki ti atua Enkai.

36 Naa obo ake, mara te nking'oling'olata o mpukunot : kake etaa nabo ti atua enkorrok.

37 Anaa enkishui naparisho o sesen lo ltung'ani, naa oltung'ani obo : naa neijia etiu Enkai o Oltung'ani naa Kristo obo.

38 Oitamioki te nkaraki enjeunoto ang: nedoyo ninye abori natii ilootuata, nepiu aitoki te mpar e uni aing'uaa ilootuata.

39 Neilep ajing atua enkop e Nkai, newonita te nkaina e tatene e Nkai Papa Olaidimani le pooki: naa keitoki aing'-uaa idye alotu aiguenare ilooishu o ilootuata.

40 Naa kore enkata nashukunye ninye, meata ajo mepiu iltung'ana pooki aaitasho neibung iseseni lenche : nelimu esiana oo iasat enche pooki ng'ai.

41 Kore lelo oataasa supati nejing atua enkishon o ntarasi : kore iloataasa intorrok nejing atua enkima e ontarasi.

42 Nena Enkirukoto e Kristo natii enkop pooki : naa te naa meiruk anaa ena Kirukoto, meidimi aitajeu.

Metaa ne Papa enkitoo, o ne Nkerai : o ne Nkiyang'et Sinyati:

Anaa natiu te ng'asunoto o taata : o metabaa anaa intarasi. Amin.

LITANI

Kore ene etii Litani anaa Sayiare easishoreki te nkiting'oto e Sayiata e Seram, te mpar e Jumapili, o Jumatano o Ijumaa, o te nkulie ng'amat naadol ilo Arikoni ajo keisupat.

NA Ai, Papa le keper: ing'eru iyioo ilaisinak ilopeny ing'-ok.

Na Ai, Papa le keper: ing'eru iyioo ilaisinak ilopeny ing'ok.

Na Ai, Enkerai, Olalakunoni le nkop: ing'eru iyioo, ilaisinak ilopeny ing'ok.

Na Ai, Enkerai, Olalakunoni le nkop: ing'eru iyioo, ilaisinak ilopeny ing'ok.

Na Ai, Enkiyang'et Sinyati naing'uaa Papa o Enkerai: ing'eru iyioo ilaisinak, ilopeny ing'ok.

Na Ai, Enkiyang'et Sinyati naing'uaa Papa o Enkerai: ing'eru iyioo ilaisinak, ilopeny ing'ok.

Iyie oara Okuni Sinyati omayiana oisisi Okuni naa Enkai nabo: ing'eru iyioo ilaisinak, ilopeny ing'ok.

Iyie oara Okuni Sinyati omayiana oisisi Okuni naa Enkai nabo: ing'eru iyioo ilaisinak ilopeny ing'ok.

MIPARO inkitarruorrot ang, Olaitoriani anaa inkitarruorrot oo papa lang, mintalak iyioo ing'ok ang, ing'eru iyioo Olaitoriani supat, ing'eru iltung'ana linono litalakua to sarge lino kirotet oleng, nimigorokino iyioo intarasi,

Tapalaki iyioo, Olaitoriani supat.

Kore too ntorrok pooki o te maii pooki; too ng'ok o saare o enkisima o lairirua; te ngoro ino o te nkitemioto e ntarasi, *Olaitoriani supat, intajeu iyioo.*

Te modooki pooki e oltau; o te nkilaasha o te nkisia e pesho e maate, o te nkitaakinoto; te lom o engiba o engilata e oltau, o te mpukunot pooki nimikichamare,

Olaitoriani supat, intajeu iyioo.

To lolito o nkulie ng'ok pooki e olke; te saparia pooki e nkop o no seseni o noloirirua,

Olaitoriani supat, intajeu iyioo.

Te nkiwang'ata o lkutati; te tauni o mueyian o olamei; to larabal o to loikop, o olke omaniki iyioo,

Olaitoriani supat, intajeu iyioo.

Te nkiteenikinoto torrono o imbaa torrok o nkisudorot o to lkuukui; te limunoto e sapare, ooroto o ng'amaroto nemeishiaakino; te nkitagoloto e oltau; te menata o Rerei lino o inkitanapat inono,

Olaitoriani supat, intajeu iyioo.

TE nkaraki enkisudoroto sinyati pee itum iyie osesen lo ltung'ani; te Inoto ino sinyati o muratare ino; te nkibatisare ino, empukoroto o isaanat inono,

Olaitoriani supat, intajeu iyioo.

Te nkaraki emion ino kitok o enkinyinyeret o Sarge; te nkaraki esalaba ino o enkitemioto ino; te nkaraki olke lino kirotet o nukaroto; te nkaraki empiunoto ino e nchunet o enkilepata ino; o te nkaraki elotunoto e Nkiyang'et Sinyati,

Olaitoriani supat, intajeu iyioo.

Kore te nkata pooki nikisinanjo; te nkata pooki nikikarisu; te nkata e olke, o te mpar e nkiguena,

Olaitoriani supat, intajeu iyioo.

KORE iyioo ilopeny ing'ok, ikisai iyie pee ining iyioo, Olaitoriani Enkai; inchoo mikinting'idi aitore iyioo nin tanap Enkanisa ino sinyati natii inkuapi pooki meibung'a enkoitei naishiaakino;

Ikisai iyie, toning'o iyioo, Olaitoriani supat.

Inchoo mikinting'idi iyie aitawang Askofuni pooki o Kasisini pooki o Shemasin pooki aisho ninche eyiolounoto nadede metijing'ai ninche Orerei lino; metaa te likioroto enche o sii te lototo enche neibalunye neitaduari metalioi.

Ikisai iyie, toning'o iyioo, Olaitoriani supat.

Inchoo mikinting'idi iyie aning inkomonon nimayian isiaitin e pooki oosan aaitayiolo neibelekeny lelo lemeyiolo nadede.

Ikisai iyie, toning'o iyioo, Olaitoriani supat.

Inchoo mikinting'idi iyie amayian Rais o ilaisiaiak lenyena, nincho empiris, ng'eno o enjing'aroto.

Ikisai iyie, toning'o iyioo, Olaitoriani supat.

Inchoo mikinting'idi iyie arik ilaiguenak o ilkituaak nincho mpiris pee eitaas iltung'ana pooki enaishiaakino meata enkuretisho anaa enkirotetisho, engelunyie anaa engiba.

Ikisai iyie, toning'o iyioo, Olaitoriani supat.

Inchoo mikinting'idi iyie amayian nirrita iltung'ana linono pooki.

Ikisai iyie, toning'o iyioo, Olaitoriani supat.

Inchoo mikinting'idi iyie aisho iloshon pooki metaa nabo, neata sotua o ning'o.

Ikisai iyie, toning'o iyioo, Olaitoriani supat.

Inchoo mikinting'idi iyie aisho iyioo iltauja likisham iyie nikiurie iyie, nikinyok aairukurukore inkitanapat inono.

Ikisai iyie, toning'o iyioo, Olaitoriani supat.

Inchoo mikinting'idi iyie aponiki iltung'ana linono pooki empiris pee ening te mborron Orerei lino neng'amaa too iltauja supati, neiu ilng'anayio le Nkiyang'et Sinyati.

Ikisai iyie, toning'o iyioo, Olaitoriani supat.

Inchoo mikinting'idi iyie ayau ti atua enkoitei nadede lelo pooki ootopong'ori netasapaki.

Ikisai iyie, toning'o iyioo, Olaitoriani supat.

Inchoo mikinting'idi iyie aitagol lelo ooitashoo; nilenyileny niret lelo ooshal iltauja; ninyoyie lelo ooteriate; kore te siadi ninang'aa Shetani ti abori inkejek ang.

Ikisai iyie, toning'o iyioo, Olaitoriani supat.

Inchoo mikinting'idi iyie aret nirrita nilenyileny lelo ootii inkasurot, anaa ilooata laikin anaa sinaitin.

Ikisai iyie, toning'o iyioo, Olaitoriani supat.

Inchoo mikinting'idi iyie airrita lelo pooki oopuopuo te nkop anaa te nkare anaa te mpaash, o inkitaak naata emion e ishoi, iltamueyia pooki o inkera kunini; ning'eru ilooena anaa ilooibung'aki.

Ikisai iyie, toning'o iyioo, Olaitoriani supat.

Inchoo mikinting'idi iyie airrita nintoti inkera okishin o inkolia, o pooki lemeata eretoto anaa ilooitemioki.

Ikisai iyie, toning'o iyioo, Olaitoriani supat.

Inchoo mikinting'idi iyie aing'eru iltung'ana pooki.

Ikisai iyie, toning'o iyioo, Olaitoriani supat.

Inchoo mikinting'idi iyie apalaki ilmang'ati lang o ilooiteme iyioo o ilooiteeneki iyioo, nimbelekeny iltauja lenche.

Ikisai iyie, toning'o iyioo, Olaitoriani supat.

Inchoo mikinting'idi iyie aisho ninteng'elaki iyioo ilng'anayio le nkop too mpukunot enche, pee kitum aatam te ng'amat enche.

Ikisai iyie, toning'o iyioo, Olaitoriani supat.

LITANI

Inchoo mikinting'idi iyie aisho iyioo enkibelekenyata nadede, nipalaki iyioo ing'ok ang pooki, o enchalan ang pooki, o modai ang; ninjopoki iyioo empiris e Nkiyang'et ino Sinyati pee kintobir aaitobiraki enkishon ang te naishiaakinore Orerei lino sinyati.

Ikisai iyie, toning'o iyioo, Olaitoriani supat.

Enkerai e Nkai, ikisai iyie, toning'o iyioo.

Enkerai e Nkai, ikisai iyie, toning'o iyioo.

Iyie, Olkuoo le Nkai oya ing'ok e nkop;

Inchoo iyioo sotua lino.

Iyie, Olkuoo le Nkai oya ing'ok e nkop;

Ing'eru iyioo.

Kristo, toning'o iyioo.

Kristo, toning'o iyioo.

Olaitoriani, ing'eru iyioo.

Olaitoriani, ing'eru iyioo.

Kristo, ing'eru iyioo.

Kristo, ing'eru iyioo.

Olaitoriani, ing'eru iyioo.

Olaitoriani, ing'eru iyioo.

ENKOMONO O LAITORIANI

PAPA lang otii keper, Meitisinyi Enkarna ino. Meu enkitoria ino. Metaasi eniyieu te nkop, anaa enatiu te keper. Inchoo iyioo taata endaa ang naiteumu iyioo. Nipalaki iyioo inkitarruorrot ang, anaa ti nikipalaki iyioo ilooitarriki iyioo. Nimirik iyioo atua isaanat, kake intajeu iyioo te ilo arruoni. Amin.

Kasisi. Olaitoriani, mintaas iyioo naishiaakinore inkitar-ruorrot ang.

Walata. Nimishukoki iyioo intorrok ang.

Matoomon.

NA Ai, Papa le nking'erunoto, mimen olodia oltau otigile anaa iyieunot oo lelo ooishir. Tereto iyioo too nkomonon te nking'erunoto nikiomon te kue iyie ti atua sinaitin lang pooki o entorroni enkata naironyi iyioo; ning'eru nining iyioo metaa kore nena torrok naitas iyioo ilosek o eng'eno o loirirua anaa noo ltung'ana, naa keaku ne pesho; o te retoto e supatisho ino nesachari; metaa iyioo ilaisiaiak

LITANI

linono eitu eitemei iyioo inkinalat pooki, ikishukoki iyie enashe o kenya ake ti atua Enkanisa ino sinyati; ti atua Yesu Kristo Olaitoriani lang.

Olaitoriani, inyo tereto iyioo nintajeu iyioo te nkaraki Enkarna ino.

Na Ai, ikitoning'o too nkiyiaa ang, netolikita iyioo oopapa lang isiaitin kituua nitaasa too mparitin enche, o too mparitin e apa te kue ninche;

Olaitoriani, inyo tereto iyioo nintajeu iyioo te nkanyit ino.

Metaa ne Papa enkitoo, o ne Nkerai : o ne Nkiyang'et Sinyati;

Anaa enatiu te ng'asunoto o taata : o metabaa anaa intarasi. Amin.

Irita iyioo too lmang'ati lang, Kristo.

Ing'orai te mpiris ino isinaitin lang.

Ing'orai te nking'erunoto isinaitin loo ltauja lang.

Tapalaki ing'ok eo ltung'ana linono te nkordunoto nabore.

Toning'o inkomonon ang ning'amaa te nkordunoto.

Enkerai e Daudi, ing'eru iyioo.

Kore taata o abaki kenya ake, tashama nining iyioo, iyie Kristo.

Toning'o iyioo te mpiris ino, Kristo, toning'o iyioo te mpiris ino, Olaitoriani Kristo.

Olaitoriani, inchoo metodoli olnge'r lino te keper iyioo;
Amu te nkaraki ikisilig iyie.

Matoomon.

IYIE, Papa, ikisai iyie te mborron ing'orai te nking'erunoto enchalan ang; o te nkaraki enhunet e Nkarna ino, intalamai nena torrok pooki naishiaakino ti nikitum iyioo; metaa ti atua isinaitin lang pooki ikitirimman enkordunoto ino, nikisai iyie te sinyatisho o te supatisho e nkishon o kenya ake, mikisisi nikianyiti; ti atua Olaitudumoni o Olaomonokinoni lang, Yesu Kristo, Olaitoriani lang. *Amin.*

ENKOMONO E KRISOSTOM SINYATI

NA Ai, Olaidimani le pooki, oisho iyioo mpiris te na kata aayaki iyie iyieunot ang, iyioo pooki te mparunoto nabo; naa iyie oitaya lekutuk, ajo te netumo iltung'ana oare anaa okuni ooiturrurrote te Nkarna ino, naa incho entoki

LITANI

nayieu; intabaki ninche taata, Olaitoriani, iyieunot o enkomono oo ilaisiaiak linono too naishiaakino iyoo; nincho iyoo matayiolo naadede inono ti atua ena kop, o enkishon nemeiting ti atua enkop nalotu. *Amin.*

2 Korinthio 13. 14

EMPIRIS o Laitoriani lang, Yesu Kristo, o enhaman e Nkai, o enchola e Nkiyang'et Sinyati metaa te nebo iyoo pooki intarasi. *Amin.*

Keiting te ne Litania.

INKOMONON O INASHIN

INKOMONON

ENKOMONO TOO LTUNGANA POOKI

TAPARO, Olaitoriani, iltung'ana linono ootii ene te kue iyie o lelo lemetii te nkaraki keararin, nemuei, neshal. Irrita inkera kunini, toriko lelero, inchoo mikititirimana iloararin, intogolo iloashal iltauja, inturrurro iloisardakita, tushukoki sum ino lelo oopuo kitala. Shomo te nebo iloparanak, torripo inkolia, taa elong'o too nkera okishin, talaku lelo ooena too nkaik oo lmang'ati, inchiunye iloomueyia. Tereto pooki ooata isinaitin loo mpukunot pooki. Taparo te supatisho lelo pooki oasham iyoo, abaki lelo ooiba iyoo, o sii lelo ooyieu iyoo nikiomonoki ninche, abaki mikira sii iyoo supati. Abaki lelo ootorikineti iyoo, taparo iyie, Olaitoriani, amu iyie oret lemeata eretoto, Olaitajeunoni le lelo ooshomo; iyie esaru lelo oopuopuo, iyie Olaitajeunoni loo lomuei, iyie oyilo osina le pooki, nitoning'o enkomono enye, Inchoo pooki te risioroto enhaman ino nabore olng'er intarasi ti atua Yesu Kristo Olaitoriani lang. *Amin.*

TE MPIRIS O ENKIRITA

OLAITORIANI, Olaidimani le pooki, Na Ai e ntarasi, ikisai iyie toriko nintisiny nintore iltauja lang o sii isesenlang ti atua inkoitei oo nkitanapat inono o ti atua isiaitin oo nkitanapat inono; metaa ti atua erripoto ino nagol oleng abaki taata o sii intarasi, eirritai iyoo ti atua isesenlang o iltauja; ti atua Olaitoriani lang o Olaitajeunoni lang Yesu Kristo. *Amin.*

ENKOMONO TOO NKERA E SCHOOL

OLAITORIANI Yesu Kristo, kore apa ira iyie enkerai, kintayioloki iyie nibulu te ng'eno; inchoo iyoo matayiolo Orerei lino sinyati pee kipuoie inkoitei inono nikidip iyie imparitin pooki, iyie oishu nintoreisho te nebo Papa o Enkiyang'et Sinyati, Enkai nabo, te nkop nemeata enkiting'oto. *Amin.*

INKOMONON O INASHIN

ENKOMONO TOO LAISOMISHAK

PAPA lang, Aidimani le pooki oiriuwa Enkerai ino kelei meitajeu iltung'ana pooki ti atua ninye, inchoo engolon lelo ooisomisha meitisinya enkishon enche, metaa te nkaraki iyie orikito ninche, kerik ninche inkera inono ti atua inkoitei e nkishon nemeiting; ti atua Olaitoriani lang o Olaitajeunoni Yesu Kristo. *Amin.*

PAPA lang lekeper, iyie kinjuyien kipuoyien nikiata enkishui ang ti atua iyie; ikiomon iyie te mborron toriko iyioo nintore iyioo te Nkiyang'et ino Sinyati, metaa merikino iyioo iyie ai kata ti atua isinaitin pooki o too lkasin lang loo mparitin ang pooki, kake kiparo oshi ake aajo ikipuo te kue iyie; ti atua Yesu Kristo Olaitoriani lang. *Amin.*

ENKAI iyie olopeny olng'er o empalakinoto; tang'amai enkomono ang nabor abaki te naa kiena iyioo te munyororo oo ng'ok ang, inchoo emborei e nking'erunoto ino metalaku iyioo; te nkaraki enkanyit e Yesu Kristo Olaitutumoni lang o Olaomonokinoni lang. *Amin.*

IYIE Enkai natii ing'uejinin pooki, te nkordunoto ino toning'o enkomono ang te nkaraki lelo likisham iyioo lemeboitare iyioo taata; torripo ninche, ikisai iyie, te retoto ino too mparunot pooki o too nkasurot o too saanat; imbaraki iyioo o ninche matayiolo aajo iboitare iyioo oshi ake nikira nabo ti atua iyie intarasi; ti atua Yesu Kristo Olaitoriani lang. *Amin.*

ENKOMONO TE NCHAN

ENKAI Papa lang le keper te Nkerai ino Yesu Kristo intaka le kutuk lelo pooki oosing'oro enkitoria ino o supatisho enye, ajo ketum intokitin pooki naaishiaakino naaret isesenilanche; ikiomon iyie iriuwaki iyioo enchan naiteumu pee kitum indaiki naaret iyioo pee eisisi Enkarna ino; ti atua Yesu Kristo Olaitoriani lang. *Amin.*

ENKOMONO TE NKATA O LAMEI

IYIE Enkai Papa lang le keper te mpiris ino esha enchan neisho enkop neponunye ing'uesi o isinkirri, ikiomon iyie

INKOMONON O INASHIN

ing'ora isinaitin loo ltung'ana linono, indimie iyioo too kulo sinaitin o ele amei oishiaakino nikitum te nkaraki entorrono ang, neibelekenyi te supatisho o te nkordunoto ino metaa empiris nalelek, te nchaman e Yesu Kristo Olaitoriani lang, neishori ninye enkanyit pooki o enkisia te nebo iyie o Enkiyang'et Sinyati, taata o intarasi. *Amin.*

anaa ena,

ENKAI Papa le nkordunoto, imbelekenya iyie osina o lamei te nkata o Laidetidetani Elija otii apa atua Samaria neaku emunyani nalelek. Tokordu iyioo ooitamei taata to sina otiu ana ilo, te nkaraki ing'ok ang nereti iyioo anaa inia kata. Toponai ishoi e nkop te mayianata ino e keper, inchoo iyioo matang'amai enkishorunoto ino sapok nikintobirishere ninche te nkisia ino nikiret lelo lemeata, ti atua Yesu Kristo Olaitoriani lang. *Amin.*

ENKOMONO TE COMMONWEALTH

LAITORIANI, iyie Papa lang le keper, le nchunet o le ngolon, Olaiguenani loo laiguenaak, Olaitoriani loo aitoriaak, iyie openy oitore ilkituaak nidol to lorika lino pooki ooweni te nkop; Ikisai iyie oleng ing'orai te munyani ino enkaisiaiani ino, Elizabeth, nimboto pee eaku Enkitok oo Loshon le Commonwealth; Ikiomon iyie te mborron irriuwaki mayianata ino enetii ninye nintaa nabo te nchola nadede iltung'ana loo loshon oopasha too nkutukie o too santuri ilooweni ti atua inia Commonwealth, metaa enapita pooki ilolan aaretokino, neisiaisho te nebo te nchola anaa ilalashera keitabaya yieunoto ino nebulunye Enkitoria ino e ntarasi, ti atua Yesu Kristo, Olaitoriani lang, metaa etum ninye te nebo iyie irara nabo o Enkiyang'et Sinyati enchunet pooki, o enkitoria o engolon intarasi, meata enkop enkiting'oto. *Amin.*

INKOMON O INASHIN

INASHIN

ERINYOKINOTO ENASHE TOO LTUNG'ANA POOKI

NA Ai, Olaidimani le pooki, Papa loo nkordunot pooki, iyioo ilaisiaiak linono lemeata digir, ikincho iyie enashe te mborron oleng too Itauja lang, te supatisho ino pooki o te nchaman ino niata too iyioo o too ltung'ana pooki. Kirrep iyie te nkaraki enkitobirunoto ang, o ramat pooki, too mayianat pooki te na kishon. Kake kore enalang pooki, kincho iyie enashe te nchaman ino nemeikenai, te inia nitilakua enkop to Laitoriani lang Yesu Kristo, o te nkaraki enkoitei e mpiris, o siligi le keper.

Ikisai iyie oleng, inchoo iyioo imparunot supati too nkordunot inono pooki pee ketum iltauja lang aayaki enashe nemeata monkoi, pee kitum aaitaduai enkisia ino, namara too nkutukie ang ake, kake te nkishon ang; te inia kincho iyie ate te siai ino, nikisaab too mparitin ang pooki te kue iyie te sinyatisho o to sipat; ti atua Yesu Kristo, Olaitoriani lang, ilo oishori enkanyit o enhunet te nebo iyie o Enkiyang'et Sinyati, intarasi o intarasi. *Amin.*

ENASHE TE NCHAN

IYIE Enkai Papa lang le keper te nking'erunoto ino supat iyau iyie enchan o lari o loip te keper enkop pee eiu ilng'anayio oonya iltung'ana. Kincho iyie enashe te mborron itodua ajo eisupat te nkata e laikin ang kitok ayaki iyioo enchan supat te njung'oto ino, nintashal natoyo, pee ereti iyioo ilaisiaiak linono ooshal pee eisisi Enkarna ino sinyati te nkordunoto ino natii atua Yesu Kristo Olaitoriani lang. *Amin.*

ENASHE TOO NDAIKI KUMOK

IYIE Papa le nkordunoto sapok too supati inono o te mpiris itoning'o Enkanisa ino nikitoomono too Itauja, nimbelekenya ilkuti lang o lamei meteleilia netaa leng'on; kitii abori inkekj inono, nikincho iyie enashe te nkitaroroto ino kitok nikiomon iyioo oleng toponai oln'ger lino pee eiki enkop ang ilng'anayio lenyena te nkisia ino o enkishorunoto ang; ti atua Yesu Kristo Olaitoriani lang. *Amin.*

INKOMONON O ILOMON SUPATI O IMPALA TE JUMAPILINI POOKI O LARI OBO

JUMAPILI E KUE TI ATUA NKATA E LOTUNOTO ENKOMONO

NA Ai, Olaidimani le pooki, inchoo iyioo empiris pee kintoraa isiaitin e naimin, nikinchop masaa e wang'an, taata te nkata e na kishon natumi olke, ti atua inia kishon euo Enkerai ino, Yesu Kristo asaya iyioo te mborron kitok, pee kipiu iyioo aatum enkishon nemeata olke te inia par e nkiting'oto nalotu ninye ashukunye te nchunet e nkitoo enye, aiguenare ilooishu o ilootuata, ti atua ninye oishu neitoreisho te nebo iyie, o Enkiyang'et Sinyati, taata o intarasi. *Amin.*

Keisomi ena omono pooki par te nebo inkulie omonon e Lotunoto, o metabaa anaa empar te kue Christmas.

EMPALAI. Rom. 13.8-14
ILOMON SUPATI. Mat. 21. 1-13

JUMAPILI E ARE TI ATUA NKATA E LOTUNOTO ENKOMONO

OLAITORIANI le mayianata oisho metisiri Ilkigerot sinyat pooki te nkitayiolounoto ang; Inchoo iyioo matoning, maisoma, mataparo matayiolo, nikisipu ninche ti atua iltauja, metaa kimbung te ng'iriata o te retoto o Rerei lino sinyati nikirrip intarasi osiligi omayiana le nkishon nemeiting, linchoo iyioo ti atua Olaitajeunoni lang Yesu Kristo. *Amin.*

EMPALAI. Rom. 15. 4-13
ILOMON SUPATI. Luka 21. 25-33

JUMAPILI E UNI TI ATUA NKATA E LOTUNOTO ENKOMONO

OLAITORIANI Yesu Kristo oirriua olkilikuai lino te lotunoto ino e kue pee eitobir enkoitei ino te kue iyie,

INKOMONON O IMPALA O ILOMON SUPATI

Inchoo ilaisiaiak o ilairritak loo nkisudorot inono meitobira sii ninche neitaa tayari enkoitei ino te nkibelekenyata oo ltauja lemening'isho meishiaakinore eng'eno o isupati o ti nintoki alotu aiguenare enkop netumi iyioo kitaa iltung'-ana oong'amari too nkonyek inono, iyie oishu nintoreisho te nebo Papa o Enkiyang'et Sinyati, Enkai nabo, te nkishon nemeiting. *Amin.*

EMPALAI. I Kor. 4. 1-5
ILOMON SUPATI. Mat. II. 2-10

JUMAPILI E ONG'UAN TI ATUA ENKATA E LOTUNOTO ENKOMONO

OLAITORIANI ikiomon iyie inyyoyie engolon ino nilotu ti atua iyioo o te nkidimata kitok niret iyioo metaa inchoo empiris ino kitok o enkordunoto ino meetu aaret iyioo neisarisaru aaitajeu iyioo, amu enkaraki ing'ok ang o intorrok ang naaibokito iyioo neimalimalie iyioo te nkuetata e nkilanyata naiteperoki te kue iyioo; ti atua enkiteumunoto e Nkerai ino, Olaitoriani lang, metaa enenye enkanyit o enkitoo, te nebo iyie o Enkiyang'et Sinyati, te nkop nemeiting. *Amin.*

EMPALAI. Fil. 4. 4-7
ILOMON SUPATI. Yoh. I. 19-28

EMPAR KITOK E EINOTO E KRISTO NAJI CHRISTMAS ENKOMONO

ENKAI Olaidimani le pooki oishoo iyioo Oinoti lino kelei metanapa empukunoto ang, anaa te na kata etiuwaki te Nkoliontoi nemeata endioto; inchoo iyioo oigilaki aiu ootaa inkera inono te ngelunoto o te mpiris meitang'e-juki iyioo te Nkiyang'et ino Sinyati; ti atua ninye Olaitoriani lang Yesu Kristo oishu nintoreisho te nebo Iyie o inia Kiyang'et, Enkai nabo intarasi, te nkop nemeiting. *Amin.*

EMPALAI. Hib. I. 1-12
ILOMON SUPATI. Yoh. I. 1-14

INKOMONON O IMPALA O ILOMON SUPATI

JUMAPILI NAIRUKURUKORE EMPAR KITOK E INOTO E KRISTO NAJI CHRISTMAS ENKOMONO

ENKAI Olaidimani le pooki oishoo iyioo Oinoti lino kelei metanapa empukunoto ang, anaa te na kata etiuwaki te Nkoliontoi nemeata endioto; inchoo iyioo oigilaki aiu ootaa inkera inono te ngelunoto o te mpiris meitang'e-juki iyioo te Nkiyang'et ino Sinyati; ti atua ninye Olaitoriani lang Yesu Kristo oishu nintoreisho te nebo iyie o inia Nkiyang'et, Enkai nabo intarasi, te nkop nemeiting. *Amin.*

EMPALAI. Gal. 4. 1-7
ILOMON SUPATI. Mat. I. 18-25

MURATARE E KRISTO January I ENKOMONO

ENKAI Olaidimani le pooki oishoo metamurati Enkerai ino namayiana, neaku oloiruk enkitanapata te nkarak iltung'ana; inchoo iyioo muratare nadede e Nkiyang'et; metaa kore eitaki etuata ltauja o irobat ang pooki matung'uai ing'uarat e nkop o nooseseni, nikias iyieunoto ino namayiana ti atua imbaa pooki; ti atua ina Kerai ino Yesu Kristo Olaitoriani lang. *Amin.*

EMPALAI. Rom. 4. 8-14
ILOMON SUPATI. Luka 2. 15-21

EMBOLUNOTO E YESU EMPAR NAIBALUNYEKI KRISTO AITODOL ILOSHON ENKOMONO

IYIE Enkai naitodua iloshon Oinoti lino kelei te rikunoto o lagera; te nkordunoto ino inchoo iyioo matum ilng'anayio le nkitoo ino e Nkai te nkiting'oto e na kishon; ti atua Yesu Kristo Olaitoriani lang. *Amin.*

EMPALAI. Efes. 3. 1-12
ILOMON SUPATI. Mat. 2. 1-12

INKOMONON O IMPALA O ILOMON SUPATI

JUMAPILI E KUE TE SIADI EMBOLUNOTO E YESU ENKOMONO

OLAITORIANI, ikiomon iyie te nkordunoto ino tang'-amai enkomono oo ltung'ana linono likimbot iyie, ninchoo ninche metadua neyiolou imbaa naaishiaakino te neasi, netum mpiris o engolon te nkirukoto meiputa nena; ti atua Yesu Kristo Olaitoriani lang. *Amin.*

EMPALAI. Rom. 12. 1-5
ILOMON SUPATI. Luka 2. 41-52

JUMAPILI E ARE TE SIADI EMBOLUNOTO E YESU ENKOMONO

ENKAI Olaidimani le pooki o lo ntarasi, naitore intokitin pooki te keper o te nkop, toning'o te nkordunoto ino isayiat oo loreren linono, nincho iyioo osotua lino imparitin pooki e nkishon ang; ti atua Yesu Kristo Olaitoriani lang. *Amin.*

EMPALAI. Rom. 12. 6-16
ILOMON SUPATI. Yoh. 2. 1-11

JUMAPILI E UNI TE SIADI EMBOLUNOTO E YESU ENKOMONO

ENKAI Olaidimani le pooki o lo ntarasi, te nkordunoto ino ing'ora enchalang ang, kore too nkasurot o ingolot ang pooki, ireoenkaina ino e tatene pee iret nintajeu iyioo; ti atua Yesu Kristo Olaitoriani lang. *Amin.*

EMPALAI. Rom. 12. 16-21
ILOMON SUPATI. Mat. 8. 1-13

JUMAPILI E ONG'UAN TE SIADI EMBOLUNOTO E YESU ENKOMONO

ENKAI nayiolo iyioo ajo keitasheyieki iyioo ti atua inkasurot kumo naa kituua, o te nkaraki enchalang oo iltauja lang mikindim aitasho aaipidata, inchoo iyioo engolon o eretoto naaitagol iyioo ti atua inkasurot pooki, nenap iyioo

INKOMONON O IMPALA O ILOMON SUPATI

ti atua isaanat pooki; ti atua Yesu Kristo Olaitoriani lang. *Amin.*

EMPALAI. Rom. 13. 1-7
ILOMON SUPATI. Mat. 8. 23-34

JUMAPILI E IMIET TE SIADI EMBOLUNOTO E YESU ENKOMONO

OLAITORIANI, ikisai iyie torripo Enkanisa ino o enkaji ino oshi ake ti atua enkirukoto nadede metorripi intarasi te ngolon ino nagol lelo ootiriman osiligi le mpiris ino e keper; ti atua Yesu Kristo Olaitoriani lang. *Amin.*

EMPALAI. Kol. 3. 12-17
ILOMON SUPATI. Mat. 13. 24-30

JUMAPILI E ILE TE SIADI EMBOLUNOTO E YESU ENKOMONO

ENKAI naa Nkerai ino namayiana eibalunyeki metaara isiaitin e Shetani neitaa iyioo inkera e Nkai o ilajung'ok le nkishon nemeiting; ikisai iyie, inchoo iyioo kiata ele siligi, maitaa ate ilooshoo anaa ninye aa osho; metaa kore te neipung'u ninye aitoki te nebo engolon o enkitoo kitok, neitaini iyioo te mua enye ti atua enkitoria enye e intarasi o enhunet; te inie te nebo iyie, Papa o iyie, Enkiyang'et Sinyati, eishu ninye neitoreisho Enkai nabo intarasi, te nkop nemeiting. *Amin.*

EMPALAI. I Yoh. 3. 1-8
ILOMON SUPATI. Mat. 24. 23-31

JUMAPILI E UNI TE KUE EMPUKOROTO NAJI SEPTUAJESIMA ENKOMONO

OLAITORIANI ikisai iyie te mpiris toning'o enkomono oo ltung'ana linono, metaa kore iyioo ootaaraki te naaishiaakino te nkaraki inkitarruorrot ang, inchoo eitajeuni iyiook te nkordunoto o te supatisho ino, neisisi Enkarna ino ti atua Yesu Kristo, Olaitajeunoni lang, oishu neitoreisho te

INKOMONON O IMPALA O ILOMON SUPATI

nebo iyie o Enkiyang'et Sinyati, Enkai nabo intarasi, te nkop nemeiting. *Amin.*

EMPALAI. 1 Kor. 9. 24-27
ILOMON SUPATI. Mat. 20. 1-16

JUMAPILI E ARE
TE KUE EMPUKOROTO
NAJI SEKSAJESIMA
ENKOMONO

OLAITORIANI Enkai, iyie odol ajo mikisiligita embae nabo nikias; inchoo iyioo te nkordunoto ino meirritai iyioo te ngolon ino too sinaitin pooki; ti atua Yesu Kristo Olaitoriani lang. *Amin.*

EMPALAI. 2 Kor. 11. 19-31
ILOMON SUPATI. Luka 8. 4-15

JUMAPILI TE KUE EMPUKOROTO
NAJI KUINKUAJESIMA
ENKOMONO

OLAITORIANI iyie oitayiolo iyioo ajo kore iasat ang pooki te nemetii enchaman naa pesho ninche, Iriu Enkiyang'et ino Sinyati, nibukoki iltauja lang enchaman, ninye enkishorunoto supat alang pooki, ninye naen sotua o supatisho pooki, naa te nemeata oltung'ani inia, abaki eishu, nijo iyie, ketua te kue iyie. Inchoo iyioo ena te nkaraki Enkerai ino kelei, Yesu Kristo, enkorrok enye. *Amin.*

EMPALAI. 1 Kor. 13. 1-13
ILOMON SUPATI. Luka 18. 31-43

EMPAR E KUE TI ATUA EMPUKOROTO
NAJI JUMATANO E NKURON
ENKOMONO

OLAIDIMANI le pooki, Enkai o intarasi, iyie nimimba toki nintobira, nipalaki ing'ok e lelo pooki oo irridutuo; intobira ti atua iyioo iltauja ng'ejuko ooishir, metaa kitum te iyie elakunoto o empalakinoto nabaya nikinchir te nkaraki ing'ok ang nikilimu isinaitin lang, iyie Enkai e nkordunoto pooki; ti atua Yesu Kristo Olaitoriani lang. *Amin.*

INKOMONON O IMPALA O ILOMON SUPATI

Keisomi ena Omono pooki par ti atua Empukoroto te siadi inia Omono naitanapishe te inia par.

TE MPALAI. Yoeli 2. 12-17
ILOMON SUPATI. Mat. 6. 16-21

JUMAPILI E KUE TI ATUA
EMPUKOROTO
ENKOMONO

OLAITORIANI otupukoyie te nkaraki iyioo imparitin artam o inkewarietin artam; inchoo iyioo empiris meito-birishere enkibooto metaa inkiri ang emiri te Nkiyang'et ino Sinyati, matoning'isho oshiake nikirukurukore te yetunoto ino e Nkai, supatisho o sinyatisho nadede, pee itum iyie enhunet o enkitoo, iyie oishu nintoreisho te nebo Papa o Enkiyang'et Sinyati, Enkai nabo, intarasi. *Amin.*

EMPALAI. 2 Kor. 6. 1-10
ILOMON SUPATI. Mat. 4. 1-II

JUMAPILI E ARE TI ATUA
EMPUKOROTO
ENKOMONO

ENKAI, Olaidimani le pooki odolita ajo mikiata engolon ang maate pee kiret ate, Irrita oriong'i oo seseni lang o sii atua iltauja metaa keirritai iyioo too ntorrok pooki naatum osesen, o too mparunot pooki torrok naarare neitame oltau; ti atua Yesu Kristo Olaitoriani lang. *Amin.*

EMPALAI. 1 Ses. 4. 1-8
ILOMON SUPATI. Mat. 15. 21-28

JUMAPILI E UNI TI ATUA
EMPUKOROTO
ENKOMONO

IKISAI iyie, Enkai, Olaidimani le pooki, ing'ora eyieunot oo ltauja loo laisiaiak linono oobor, nirriu enkaina e tatene e nkitoria ino meirrita iyioo too Imang'ati lang pooki; ti atua Yesu Kristo Olaitoriani lang. *Amin.*

EMPALAI. Efes. 5. 1-14
ILOMON SUPATI. Luka 11. 14-28

INKOMONON O IMPALA O ILOMON SUPATI

**JUMAPILI E ONG'UAN TI ATUA
EMPUKOROTO
ENKOMONO**

ENKAI, Olaidimani le pooki, inchoo iyoo ooishiaakino neari iyoo te nkaraki intorrok ang, metereti iyoo te ngolon e mpiris ino o te mborei e nkordunoto ino; ti atua Olaitoriani lang, Olaitajeunoni lang Yesu Kristo. *Amin.*

EMPALAI. Gal. 4. 21-31
ILOMON SUPATI. Yoh. 6. 1-14

**JUMAPILI E IMIET TI ATUA
EMPUKOROTO
ENKOMONO**

IKISAI iyie, Enkai, Olaidimani le pooki, ing'ora iltung'ana linono te mpiris ino; pee eitoreii ninche te supatisho ino kitok, neirritai intarasi, abaki too seseni o sii too Itauja; ti atua Yesu Kristo Olaitoriani lang. *Amin.*

EMPALAI. Hib. 9. 11-15
ILOMON SUPATI. Yoh. 8. 46-59

**JUMAPILI TE KUE EMPIUNOTO
ENKOMONO**

ENKAI, Olaidimani le pooki o lo ntarasi te nkaraki enchaman ino nabor too ltung'ana, iyie oirriua Enkerai ino, Olaitajeunoni Yesu Kristo pee enap inkiri ang netum olke te salaba, pee eirukurukore iltung'ana pooki enkoitei e mborron enye kitok; Inchoo iyoo te nkordunoto ino mairukurukore enkoitei e ng'iriata enye, nikintoki aaku iloong'ar empiunoto enye; ti atua ninye Yesu Kristo Olaitoriani lang. *Amin.*

EMPALAI. Fil. 2. 5-11
ILOMON SUPATI. Mat. 27. 1-54

**JUMATATU TE KUE EMPIUNOTO
TE MPALAI. Isaia 63. 1-19
ILOMON SUPATI. Marko 14. 1-72**

**JUMANNE TE KUE EMPIUNOTO
TE MPALAI. Isaia 50. 5-11
ILOMON SUPATI. Marko 15. 1-39**

INKOMONON O IMPALA O ILOMON SUPATI

**JUMATANO TE KUE EMPIUNOTO
EMPALAI. Hib. 9. 16-28
ILOMON SUPATI. Luka 22. 1-71**

**ALHAMISI TE KUE EMPIUNOTO
EMPALAI. 1 Kor. 11. 17-34
ILOMON SUPATI. Luka 23. 1-49**

**JUMA SUPAT
INKOMON**

ENKAI Olaidimani le pooki, ikisai iyie, ing'ora iltung'ana le nkaji ino te mpiris amu te nkaraki ninche etashama Olaitoriani lang Yesu Kristo nelikori neishori atua inkaik oo ltung'ana torrok, neitamei to lke te salaba, kore taata eishu neitoreisho te nebo iyie, o Enkiyang'et Sinyati, Enkai nabo intarasi, te nkop nemeiting. *Amin.*

ENKAI Olaidimani le pooki o lo ntarasi, kore te Nkiyang'et ino keitoreii Enkanisa pooki neitisinyai; Tang'amai sayiat o inkomonon ang nikiyaki iyie te nkaraki iltung'ana le mpukunot pooki ti atua Enkanisa ino sinyati, metaa kore pooki tung'ani ti atua esiai enye, iyie eisiasi to nadede o te supatisho; ti atua Olaitoriani lang Olaitajeunoni lang Yesu Kristo. *Amin.*

IYIE Enkai e nkordunoto naitobira iltung'ana pooki, nimimba hoo toki nintobira, nimiyieu sii nee oloas ing'ok, kake iyieu neibelekenya pee eaku keishu; Ing'eru Ilyahudi pooki, ile Islam pooki, iloomiki pooki o ilooiboyo nadede pooki; nintai aoru ninche modai pooki, engolon o Itau o mena to Rerei lino; neijia inkuna pee iyau ninche ang, Olaitoriani omayiana, enetii emboo ino, pee eitajeuni ti atua ilalekuni loo Israeli loo nadede, neaku emboo nabo o Olchogut obo, ninye Yesu Kristo, Olaitoriani lang, oishu neitoreisho te nebo iyie o Enkiyang'et Sinyati, Enkai nabo intarasi. *Amin.*

EMPALAI. Hib. 10. 1-25
ILOMON SUPATI. Yoh. 19. 1-37

**EMPAR TE KUE EMPIUNOTO
ENKOMONO**

TASHAMA iyie Olaitoriani, inchere anaa naibatisaki iyoo ti atua olke le Nkerai ino namayiana, Olaitajeunoni

INKOMONON O IMPALA O ILOMON SUPATI

lang, Yesu Kristo, pee kitum iyioo nukaroto te nebo ninye sii, pee kipik olke kenya ake imbaa ang torrok o ng'uarat, petaa kore enkata naimi atua enkurare, atua oltim lo lke, matabaiki atua empiunoto ang e ng'ida; te nkarakki enkidi-mata enye, amu etua nenukari, nepiu, te nkarakki iyioo, Enkerai ino Yesu Kristo, Olaitoriani lang. *Amin.*

EMPALAI. I Pet. 3. 17-22
ILOMON SUPATI. Mat. 27. 57-66

EMPIUNOTO

REPAROTO ang eidipaki aitai to lasar enkaraki iyioo, naa ninye Kristo. Aya naa maitai entasim; namara to sukuroi le apa, anaa sukuroi le mang'antitisho o entorroni : kake te mukate metii sukuroi e supatisho oo ltauja o nadede.

I Kor. 5. 7-8.

Amu eidipaki aitipi Kristo metung'uai olke : nemeitoki aee ai kata, nemeitore olke te keper ninye ai kata.

Amu kore neikuna pee ee ing'ok etanang'a enkata nabo : neikuna pee eishu, eishu te Nkai Olaidimani.

Entitiu sii intai neijia, enkena ate aajo kedede ituata te nena ing'ok, kake inchushu te Nkai ti atua Yesu Kristo, Olaitoriani lang.

Rom. 6. 9-11.

Kake kore taata keitipiuk Kristo too lootuata : netaa ninye oln'ayayioi le kue too lelo ooilorate.

Amu te nkarakki euo olke to ltung'ani : neuo sii to ltung'ani empiunoto oo lootuata.

Amu neijia etiu pooki oee ti atua Adam : naa neijia sii etiu te pooki ti atua Kristo eishori enkishui.

I Kor. 15. 20-22.

Metaa ne Papa enkitoo, o ne Nkerai : o ne Nkiyang'et Sinyati;

Anaa natiu te ng'asunoto o taata : o metabaa anaa intarasi. *Amin.*

ENKOMONO

ENKAI Olaidimani le pooki natimira olke ti atua Inoti lino kelei, ninye Yesu Kristo, niboloki iyioo oltim le nkishon nemeiting; ikisai iyie te mborron pee irik iyioo te mpiris ino kitok, nipik atua imparunot ang iyieunot supati, neijia imparitin pooki te retoto ino kinteumu nena supatei; ti

INKOMONON O IMPALA O ILOMON SUPATI

atua Yesu Kristo, Olaitoriani lang, oishu neitoreisho te nebo iyie o Enkiyang'et Sinyati, Enkai nabo intarasi. *Amin.*

EMPALAI. Kol. 3, 1-7
ILOMON SUPATI. Yoh. 20. 1-10

JUMAPILI E KUE TE SIADI EMPIUNOTO ENKOMONO

PAPA Olaidimani le pooki, oishorua Enkerai ino kelei metua te nkarakki ing'ok ang, neitoki apiu pee eitaa iyioo supati; Inchoo iyioo maitorai sukuroi e mang'antitisho o entorroni, nikisiai iyie oshi ake te sinyatisho e nkishon o to nadede; te nkarakki supatisho e Inoti lino Yesu Kristo Olaitoriani lang. *Amin.*

EMPALAI. I Yoh. 5. 4-12
ILOMON SUPATI. Yoh. 20. 19-23

JUMAPILI E ARE TE SIADI EMPIUNOTO ENKOMONO

ENKAI Olaidimani le pooki oishoo iyioo Enkerai ino kelei metaa olasar loo ng'ok ang, o sii rikoto e nkishon supat; Inchoo iyioo empiris matang'amai te nashe sapok inia retoto kitok nayaka iyioo, matasan aairukurukore imparitin pooki nena riot enyena naamayiana e nkishon enye sinyati oleng; ti atua ilo Yesu Kristo Olaitoriani lang. *Amin.*

EMPALAI. I Pet. 2. 19-25
ILOMON SUPATI. Yoh. 10. 11-16

JUMAPILI E UNI TE SIADI EMPIUNOTO ENKOMONO

ENKAI Olaidimani le pooki iyie naitodol lelo oodiak ewang'an nadede ino, pee etum aatushukokinoto enkoitei e supatisho, Inchoo lelo pooki oong'amari ti atua enchola o lturrur le Kristo, meitorai nena baa nemeishaakinore limunoto enche, neirukurukore pooki naanyanyukore nena; to Laitoriani lang Yesu Kristo. *Amin.*

EMPALAI. I Pet. 2. 11-17
ILOMON SUPATI. Yoh. 16. 16-22

INKOMONON O IMPALA O ILOMON SUPATI

**JUMAPILI E ONG'UAN
TE SIADI EMPIUNOTO
ENKOMONO**

ENKAI, Olaidimani le pooki, iyie openy oidim aitoria iyieunot nemeitoriai, o sii ing'uarat oo ltung'ana oobore ing'ok; Inchoo iltung'ana linono metashama nintanapa, meteyieu lekutukie linono, o ti atua enkibelekenyakinot naapasha e mpukunot kumok e na kop metushumata iltauja lang te idie natii eng'ida nadede; ti atua Yesu Kristo Olaitoriani lang. *Amin.*

EMPALAI. Yak. 1. 17-21
ILOMON SUPATI. Yoh. 16. 5-15

**JUMAPILI E IMIET
TE SIADI EMPIUNOTO
ENKOMONO**

OLAITORIANI, iyie eing'uaa intokitin pooki supati, inchoo iyiook ilaisiaiak linono oobor mataparo te nkieng'-akinoto ino Sinyati imbaa pooki naara supati o te rikoto e mpiris ino kitum aataas nena; to Laitoriani lang Yesu Kristo. *Amin.*

EMPALAI. Yak. 1. 22-27
ILOMON SUPATI. Yoh. 16. 23-33

**EMPAR E NKILEPATA
ENKOMONO**

IKIOMON iyie Enkai Olaidimani le pooki, anaa pee kiruk iyioo aajo eilepa Inoti lino kelei Olaitoriani lang Yesu Kristo ajing keper, nikilep sii iyioo aiko neijia too iltauja lang o te mparunot ang, nikiweni imparitin pooki te nebo ninye oishu neitoreisho te nebo iyie o Enkiyang'et Sinyati, Enkai nabo intarasi. *Amin.*

TE MPALAI. Iasat 1. 1-11
ILOMON SUPATI. Marko 16. 14-20

**JUMAPILI TE SIADI ENKILEPATA
ENKOMONO**

IYIE Enkai Olaiguennani le nkito oilepie Enkerai ino kelei Yesu Kristo metabaki enkitoo ino e keper te ng'ida kitok e nkisulata; ikiomon iyie, ming'uaa iyioo mikiata eretoto;

INKOMONON O IMPALA O ILOMON SUPATI

kake iriwaki iyioo Enkiyang'et ino Sinyati metereto iyioo neilepie iyioo idie neituruko Olaitajeunoni lang Kristo oishu neitoreisho te nebo iyie o Enkiyang'et Sinyati, Enkai nabo, metabaki intarasi. *Amin.*

EMPALAI. 1 Pet. 4. 7-II
ILOMON SUPATI. Yoh. 15. 26—16. 4

**JUMAPILI E NKISHORUNOTO E
NKIYANG'ET SINYATI
ENKOMONO**

IYIE Enkai te nkata natiu anaa ena nintayiolo iltauja loo ltung'ana linono oobore enkirukoto pee iyaki ninche ewang'an e Nkiyang'et ino Sinyati, inchoo iyioo te inia Nkiyang'et metaa kitum imparunot supati too mbaa pooki, niking'idakino imparitin pooki eretoto enye sinyati te nkaraki inkishaakinot enyena, Yesu Kristo, Olaitoriani lang, oishu neitoreisho te nebo iyie ti atua enchola e Nkiyang'et Sinyati, Enkai nabo, metabaki intarasi. *Amin.*

TE MPALAI. Iasat 2. 1-II
ILOMON SUPATI. Yoh. 14. 15-31

**JUMAPILI E OKUNI
ENKOMONO**

IYIE Enkai Olaidimani le pooki o lo ntarasi oishoo iyioo ilaisiaiak linono, empiris te limunoto e nkirkoto nadede matang'amai enkitoo e Okuni e Nkai nabo intarasi, o te ngolon ino e nkito e Nkai matoomon inia Nabo; Ikiomon iyie torripo iyioo matonyok ti atua inia kirukoto nintagaa iyioo intarasi te ntorroni pooki; iyie oishu nintoreisho, Enkai nabo intarasi. *Amin.*

TE MPALAI. Embolunoto 4. 1-II
ILOMON SUPATI. Yoh. 3. 1-15

**JUMAPILI E KUE
TE SIADI OKUNI
ENKOMONO**

IYIE Enkai, engolon e pooki likisilig iyie, tang'amai inkomonon ang te nkordunoto ino, amu ti nimikiata iyie mikindim aataas toki supat, te nkaraki enchalan ang, iyioo iltung'ana ooee, inchoo iyioo eretoto e mpiris ino pee kinting'id iyie te nkaraki kirrip inkitanapat inono abaki

INKOMONON O IMPALA O ILOMON SUPATI

te yieunot ang o sii too iasat ang; ti atua Yesu Kristo Olaitoriani lang. *Amin.*

EMPALAI. I Yoh. 4. 7-21

ILOMON SUPATI. Luka 16. 19-31

JUMAPILI E ARE
TE SIADI OKUNI
ENKOMONO

IYIE Olaitoriani mipal ai kata miret anaa mintorre lelo lintubulu te uriata o nchaman ino nemediaki; ikiomon iyie torripo iyioo ning'or te supatisho oleng, ninchoo iyioo maturia Enkarna ino sinyati oshi ake nikisham inia; ti atua Yesu Kristo Olaitoriani lang. *Amin.*

EMPALAI. I Yoh. 3. 13-24

ILOMON SUPATI. Luka 14. 16-24

JUMAPILI E UNI
TE SIADI OKUNI
ENKOMONO

IYIE Olaitoriani, ikiomon pee ining iyioo te mborei e nkordunoto ino, ninchoo iyioo eretoto o engolon ti atua inkasurot pooki o isinaitin pooki, iyioo linchoo iltauja ooyieu oleng neomonisho; ti atua Yesu Kristo Olaitoriani lang. *Amin.*

EMPALAI. I Pet. 5. 5-11

ILOMON SUPATI. Luka 15. 1-10

JUMAPILI E ONG'UAN
TE SIADI OKUNI
ENKOMONO

ENKAI, Olarriponi le pooki likisiliga, kore ti nimitii iyie meatai engolon, nemeatai sinyatisho; topnai enkordunoto ino metaa kitok te iyioo; pee eaku te nkarakira iyie Olaitoriani lang o Olarikoni lang, kirepaa imbaa e na kop naiting, nimikimin too mbaa e intarasi; Inchoo nena, iyie, Papa le keper, te nkarakira Yesu Kristo Olaitoriani lang. *Amin.*

EMPALAI. Rom. 8. 18-23

ILOMON SUPATI. Luka 6. 36-42

INKOMONON O IMPALA O ILOMON SUPATI

JUMAPILI E IMIET
TE SIADI OKUNI
ENKOMONO

IKIOMON iyie Olaitoriani te lototo e na kop metaa iyie orikito te nkitoria ino ti atua sotua, pee etum Enkanisa ino aisiaia iyie te ng'ida o te mborron ino supat; ti atua Yesu Kristo Olaitoriani lang. *Amin.*

EMPALAI. I Pet. 3. 8-15
ILOMON SUPATI. Luka 5. 1-11

JUMAPILI E ILE
TE SIADI OKUNI
ENKOMONO

ENKAI nintobiraka lelo likisham intokitin supati naarepaa imparunot oo ltung'ana, tubukoki iltauja lang enhaman ino peeyie kishamu iyie aaitalang intokitin pooki, pee etumi aaitabai lekutukie linono oolang iyieunot ang pooki; ti atua Yesu Kristo Olaitoriani lang. *Amin.*

EMPALAI. Rom. 6. 3-11
ILOMON SUPATI. Mat. 5. 20-26

JUMAPILI E SABA
TE SIADI OKUNI
ENKOMONO

OLAITORIANI olopeny engolon o enkidimat pooki, Olaitobirani o Olaishoroni loo ntokitin supati pooki; tuuno ti atua iltauja lang enhaman e Nkarna ino; topono ti atua iyioo enkomono nadede, intoomono iyioo te supatisho pooki, nirrita iyioo ti atua nena te nkordunoto ino kitok; ti atua Yesu Kristo Olaitoriani lang. *Amin.*

EMPALAI. Rom. 6. 19-23
ILOMON SUPATI. Marko 8. 1-9

JUMAPILI E ISIET
TE SIADI OKUNI
ENKOMONO

IYIE Enkai meishiunye enkiritata ino ai kata, o ira sii Olarikoni loo mbaa pooki naatii keper o naatii enkop : Iyioo ootii abori inkek inono, ai kiomon iyie inchere intai te

INKOMONON O IMPALA O ILOMON SUPATI

yioo imbaa pooki naaitame iyioo, ninchoo iyioo nena naata digir; ti atua Yesu Kristo Olaitoriani lang. *Amin.*

EMPALAI. Rom. 8. 12-17
ILOMON SUPATI. Mat. 7. 15-21

JUMAPILI E SAAL
TE SIADI OKUNI
ENKOMONO

AI kiomon iyie, Olaitoriani, inchoo iyioo iltauja ooparu neas supati imparitin pooki, metaa iyioo lemeidim aataas supati ti nimikiata iyie, kitum te retoto ino elototo narisiiori enhaman ino; ti atua Olaitoriani lang Yesu Kristo. *Amin.*

EMPALAI. 1 Kor. 10. 1-13
ILOMON SUPATI. Luka 16. 1-9

JUMAPILI E TOMON
TE SIADI OKUNI
ENKOMONO

INCHOO metobolo inkiyiaa inono naabore enking'-erunoto, Olaitoriani, metijing'a enkomono ang, ilaisiaiak linono, ootii abori iyie, inchoo metoomonu imbaa nikinting'id pee etum ninche intokitin naatomonutua ninche; ti atua Yesu Kristo Olaitoriani lang. *Amin.*

EMPALAI. 1 Kor. 12. 1-11
ILOMON SUPATI. Luka 19. 41-47

JUMAPILI E TOMON O OBO
TE SIADI OKUNI
ENKOMONO

ENKAI intoduayie oleng engolon ino nemeata enkiting'-oto ti atua enkordunoto ino o enking'erunoto ino, ninchoo iyioo empiris ino naiteumu iyioo pee kipuo te nkuetata ti atua enkoitei oo nkitanapat inono pee kitum lekutukie linono, pee intaa iyioo iloong'ar imasaa inono e keper; ti atua Yesu Kristo Olaitoriani lang. *Amin.*

EMPALAI. 1 Kor. 15. 1-11
ILOMON SUPATI. Luka 18. 9-14

INKOMONON O IMPALA O ILOMON SUPATI

JUMAPILI E TOMON O ARE
TE SIADI OKUNI
ENKOMONO

ENKAI, Olaidimani le pooki o lo ntarasi, iyie osioki aning imparitin pooki alang iyioo lemesioki aaomon, nimoku aishoo iyioo alang nikiyieu anaa naishiaakino neishori iyioo; tubukoki iyioo te nkumoisho enkordunot inono: tapalaki iyioo nena nikiurie ninchoo iyioo nena baa supati nemeishiaakino iyioo ti nikiomonu namara te naishiaakinoto e Yesu Kristo, Enkerai ino, Olaitoriani lang. *Amin.*

EMPALAI. 2 Kor. 3. 4-9
ILOMON SUPATI. Marko 7. 31-37

JUMAPILI E TOMON O OKUNI
TE SIADI OKUNI
ENKOMONO

ENKAI Olaidimani le pooki obore enkordunoto, te nkishorunoto ino ake eaku kiasaki iyie iltung'ana linono esiai nadede naishiaakino enkisisa; ai kiomon iyie inchoo maisiai iyie te nkirkoto te na kishon pee mikidiak te nkiting'oto lekutukie linono le keper; ti atua inkishiaakinot e Yesu Kristo Olaitoriani lang. *Amin.*

EMPALAI. Gal. 3. 16-22
ILOMON SUPATI. Luka 10. 23-37

JUMAPILI E TOMON O ONG'UAN
TE SIADI OKUNI
ENKOMONO

ENKAI Olaidimani le pooki o lo ntarasi, toponiki iyioo enkirukoto o isiligi o enhaman, inchoo iyioo matasham enintanapishe pee kitum nena te lekutuk lino; ti atua Yesu Kristo Olaitoriani lang. *Amin.*

EMPALAI. Gal. 5. 16-24
ILOMON SUPATI. Luka 17. 11-19

JUMAPILI E TOMON O IMIET
TE SIADI OKUNI
ENKOMONO

OLAITORIANI, aikiomon iyie, irrita Enkanisa ino te nkordunoto ino e oshi ake, amu kore enhalan oo ltung'ana

INKOMONON O IMPALA O ILOMON SUPATI

meata ajo meria ti nimitii iyie, irrita iyoo imparitin pooki te retoto ino too mbaa pooki naabore inkasurot, toriko matabaki pooki naaret te njeunoto ang; ti atua Yesu Kristo Olaitoriani lang. *Amin.*

EMPALAI. Gal. 6. 11-18

ILOMON SUPATI. Mat. 6. 24-34

JUMAPILI E TOMON O ILE TE SIADI OKUNI

ENKOMONO

OLAITORIANI, akiomon iyie inchoo olng'er lino enkata pooki meituko neirrita Enkanisa ino; o te nkarakni nemeidim ashomo kue te seriani metii eretoto ino, irrita ninye imparitin pooki te retoto ino o te supatisho ino; ti atua Yesu Kristo Olaitoriani lang. *Amin.*

EMPALAI. Efes. 3. 13-21

ILOMON SUPATI. Luka 7. 11-17

JUMAPILI E TOMON O SABA TE SIADI OKUNI ENKOMONO

OLAITORIANI, akiomon iyie meshomo empiris ino te kue iyoo imparitin pooki neirukurukore iyoo, nindimie iyoo mataas oshi ake isiaitin pooki supati; ti atua Yesu Kristo, Olaitoriani lang. *Amin.*

EMPALAI. Efes. 4. 1-6

ILOMON SUPATI. Luka 14. 1-11

JUMAPILI E TOMON O ISIET TE SIADI OKUNI ENKOMONO

OLAITORIANI akiomon iyie inchoo iltung'ana linono empiris namirie isaanat e nkop o no sesen o ne Shetani, pee kirukurukore iyie openy, Enkai nadede, too ltauja supati o too mparunot supati; ti atua Yesu Kristo Olaitoriani lang. *Amin.*

EMPALAI. 1 Kor. 1. 4-8

ILOMON SUPATI. Mat. 22. 34-46

INKOMONON O IMPALA O ILOMON SUPATI

JUMAPILI E TOMON O SAAL TE SIADI OKUNI ENKOMONO

ENKAI, te nkarakni nimikindim aaiting'ida iyie ti nimbioitare iyoo, indimie iyoo te nkordunoto ino nerik Enkiyang'et ino Sinyati iltauja lang neitore too mbaa pooki; ti atua Yesu Kristo Olaitoriani lang. *Amin.*

EMPALAI. Efes. 4. 17-32

ILOMON SUPATI. Mat. 9. 1-8

JUMAPILI E TIKITAM TE SIADI OKUNI ENKOMONO

ENKAI, Olaidimani le pooki, loo nkordunot kumok, akiomon aajo te supatisho ino kitok irrita iyoo too mbaa pooki naitaruo iyoo pee kiako ilooanyu ti atua isesen i o too ltauja pee kias te ng'ida nena baa niyieu neasi; ti atua Yesu Kristo Olaitoriani lang. *Amin.*

EMPALAI. Efes. 5. 15-21

ILOMON SUPATI. Mat. 22. 1-14

JUMAPILI E TIKITAM O OBO TE SIADI OKUNI ENKOMONO

AIKIOMON iyie, Olaitoriani le nkordunoto, inchoo iltung'ana linono oobore enkirukoto empalakinoto o osotua pee eituki too ng'ok enche pooki, pee kisai too ltauja oobor; ti atua Yesu Kristo Olaitoriani lang. *Amin.*

EMPALAI. Efes. 6. 10-20

ILOMON SUPATI. Yoh. 4. 46-54

JUMAPILI E TIKITAM O ARE TE SIADI OKUNI ENKOMONO

OLAITORIANI akiomonoki Enkanisa ino natii iltung'-ana le nkaji ino, torripo ti atua enkomono ino imparitin pooki, pee metum te rripoto ino isinaitin, pee etum aatonyok te nkomonon aisiai iyie too siaitin supati, pee eisisi Enkarna ino; ti atua Yesu Kristo Olaitoriani lang. *Amin.*

EMPALAI. Fil. 1. 3-11

ILOMON SUPATI. Mat. 18. 21-35

INKOMONON O IMPALA O ILOMON SUPATI

JUMAPILI E TIKITAM O OKUNI
TE SIADI OKUNI
ENKOMONO

ENKAI, kore iyie esarunoto ang o engolon ang, metii supatisho namara iyie eing'uaa, aikiomon iyie ting'idai te ning'oto Enkanisa ino nikiomon te nyuata, inchoo matum too nadede nena baa nikiomon te nkirukoto; ti atua Yesu Kristo Olaitoriani lang. *Amin.*

EMPALAI. Fil. 3. 17-21

ILOMON SUPATI. Mat. 22. 15-22

JUMAPILI E TIKITAM O ONG'UAN
TE SIADI OKUNI
ENKOMONO

OLAITORIANI aikiomon iyie intaii too ltung'ana linono ing'ok enche pee eaku too supatisho inono pooki kumok talaa inkikenata oo ng'ok ang, iyooo pooki, kunda nikitaasa te nchalan ang; indimie iyooo nena, Papa otii keper, te nkaraki Yesu Kristo, Olaitoriani lang le mayianata, Olaitajeunoni lang. *Amin.*

EMPALAI. Kol. 1. 3-12

ILOMON SUPATI. Mat. 9. 18-26

JUMAPILI E TIKITAM O IMIET
TE SIADI OKUNI
ENKOMONO

AIKIOMON iyie, Olaitoriani, inyoye eyieunot oo ltung'ana linono ooiruko, metiu ilng'anayio kumo te siai supat, neishori inkishorunot kumok naaing'uaa iyie; ti atua Yesu Kristo Olaitoriani lang. *Amin.*

TE MPALAI. Yer. 23. 5-8

ILOMON SUPATI. Yoh. 6. 5-14

Ten aa keatai Jumapilini tikitam o ile te rishata Jumapili? Okuni o Jumapili e Kue te nkata e Lotunoto, keisomi te Jumapili e tikitam o imiet Enkomono, Empalai, o Ilomon Supati le Jumapili e ile te siadi Embolunoto; naa kore ten aa keatai Jumapilini tikitam o saba te rishata nena, keisomi te Jumapili tikitam o imiet Enkomono, Empalai, o Ilomon Supati le Jumapili e imiet te siadi Embolunoto; neisomi te Jumapili e tikitam o ile Enkomono, Empalai, o Ilomon Supati le Jumapili e ile te siadi Embolunoto.

ENKOITEI NAISHORIEKI ENDAA
O LAITORIANI

ANAA
ENCHOLA SINYATI

Enkiririkinoto oo ltung'ana kituaak oora le nchola e Nchola Sinyati ooishoo inkarn enche Kasisi ewon eng'or inia bae inkuti paritin naainyotokino empar e Nchola.

Naa te nedoli ti atua kuldo tung'ana oltung'ani oitarruoyie enkitarruorrotu naibala anaa eitarrika olchore lenye to rorei anaa te asata, anaa naiba Kanisa; neaku natumo ilo Kasisi nadede e ilo rorei, neipari ilo tung'ani aitarriyian pee meitoki anyikaki katukul Emisa o Laitoriani metabaa anaa neitai embae nadolieki nara nairirikino ninye nadede, naa kore inia lototo enye torrono neibelekeny metaa supat; pee etum kuldo aainyaki aatasham ooiba te kue ti atua Kanisa, pee eishoo kuldo ooitarrika naishiaakino enche; anaa eitai te nkuti le kutuk aisho naishiaakino enche, neidip aatumo mpash.

Naa neijia taa etiu iltung'ana ooyieu nedol imbaa e wonata e mpukunoto oo ltauja ooibaro ninche oopeny, naa te nkaraki inia pee eitaya elde Kasisi lemeyieu enhola e Misa o Laitoriani o metabaa anaa nedol ajo aiketumoki aitoki. Naa kore kuldo ootapaashete o ilkulie neshamari elde obo nepalaki olchore lenye to ltau supat to naririkino naitarika, nelaki te nkaraki ninye oteng'elaka olchore lenye; neaku elde li oare meyieu neaku nabo o loisis Enkai, ewon era oltung'ani le napa bae e nkiminata o nenkiba; naa keishiaakino elde Kasisi te neisho mpaash elde otolimua nkitadiat enyena metijing'a Enchola Sinyati nemetiki elde arroi, mara enkata natii Kasisi nawon airorie oltung'ani anaa natolikaki ti atua kuna kitarriyianat ti atua ena yoliounoto, anaa enda naituruko keishiaakino te neitining ilomon lenyena ildo ora le nkitanapata ewon eng'or mparitin tomon o ong'uan anaa etiu elusoo mparitin tomon o ong'uan. Kore elde ora lopeny enkitanapata neitaas elde oitarruoyie anaa natiaakaki ti atua enkishiaakino enye.

Neisiapakini enda Misa enanka supat naibor e katani, naa neijia apake eikoni encholakinot Enchola Sinyati, etii enkiji e Nkanisa, anaa atuanaranyishoreki, te ng'ueji neitanapisheteki te Sayiata e Seran o ne Teipa.

Naa kore ilo Kasisi ewon eitashe te ng'ueji e Misa o Laitoriani ti bata e kopikop, nejo Enkomono o Laitoriani te nebo enkomono nairukurukore enda te neidip iltung'ana aatigil kiung'a.

PAPAlang otii keper, Meitisinyi Enkarna ino. Meu enkitoria ino. Metaasi eniyieu te nkop, anaa enatiu te keper. Inchoo iyioo taata endaa ang naiteumu iyioo. Nipalaki iyioo inkitarruorrot ang, anaa ti nikipalaki iyioo iloitarriki iyioo. Nimirik iyioo atua isaanat kake intajeu iyioo te ilo arruoni. Amin.

ENKOMONO

NA Ai, Olaidimani le pooki, kore te kue iyie keibala iltauja pooki, niyiolo sii iyieunot pooki, nemetii imbaa naaing'opai te kue iyie; Intuko imparunot oo ltauja lang te nkiyang'et e Nkiyang'et ino Sinyati, pee kisham iyie katukul, nikisis te naishiaakino Enkarna ino sinyati; ti atua Kristo, Olaitoriani lang. Amin.

Kore te na kata eibelekenya Kasisi aing'or iltung'ana nejo to ltoilo ening'o kuna Kitanapat Tomon; naa kore iltung'ana ewon egila kung'a nejo ninche te siadi pooki Kitanapata aao-mon Enkai metokordo ninche too nkitarruorrot enche e apa too nkitanapat, o pee eisho ninche eretoto pee eas nena te nkata nalotu, nejo anaa nairukurukore.

Kasisi.

Eiroro Enkai kulo rorei nejo: Nanu Olaitoriani Enkai ino: Meata ajo iata ai Ai namara Nanu.

Iltung'ana. Olaitoriani, tokordu iyioo, nintayiolo iltauja lang meibung'a ena kitapata.

Kasisi. Mintobir enkitanyaanyukoto nakueta, anaa enkitanyaanyukoto e ntoki natii keper, anaa natii enkop, anaa natii inkariak naatii enkop. Migurumakino asai, anaa isiai; amu nanu Olaitoriani Enkai ino, Enkai nalom, naijiparie inkera ing'ok oo loomenye metabaki erisiore e uni anaa ne ong'uan e lelo laaiba nanu, naing'-eru iip kuru te lelo laasham, neibung inkitanapat aainei.

Iltung'ana. Olaitoriani, tokordu iyioo, nintayiolo iltauja lang meibung'a ena kitapata.

Kasisi. Mimbot Enkarna o Laitoriani Enkai ino pesho, amu mejo Olaitoriani eitu eitarruo oltung'ani oibot Enkarna enye pesho.

Iltung'ana. Olaitoriani, tokordu iyioo, nintayiolo iltauja lang meibung'a ena kitapata.

Kasisi. Taparo empar e Sabato, intisinya. Intai esiai ino imparitin ile, nias isiaitin inono pooki; kore mpar e saba naa Sabato o Laitoriani Enkai ino. Mintai inia par esiai hoo nabo, iyie openy, olaiyieni lino, entito ino, anaa orindik lino, anaa erindik ino, anaa inkishu inono, anaa olomoni otii enkang ino, amu eitobira Olaitoriani keper o enkop, o inaiposha kituaak, o intokitin pooki naatii too imparitin ile, neyieng'iyeng'a te mpar e saba, te nkaraki e inia pee etamayiana Olaitoriani empar e Sabato aitisiny.

Iltung'ana. Olaitoriani, tokordu iyioo, nintayiolo iltauja lang meibung'a ena kitapata.

Kasisi. Ianyita papa lino o ng'utunyi, pee eaku kumok imparitin inono niwon te nkop ninkinchoo Olaitoriani Enkai ino.

Iltung'ana. Olaitoriani, tokordu iyioo, nintayiolo iltauja lang meibung'a ena kitapata.

Kasisi. Miar metua.

Iltung'ana. Olaitoriani, tokordu iyioo, nintayiolo iltauja lang meibung'a ena kitapata.

Kasisi. Miloloito.

Iltung'ana. Olaitoriani, tokordu iyioo, nintayiolo iltauja lang meibung'a ena kitapata.

Kasisi. Mipurisho.

Iltung'ana. Olaitoriani, tokordu iyioo, nintayiolo iltauja lang meibung'a ena kitapata.

Kasisi. Minteeniki likai sapare.

Iltung'ana. Olaitoriani, tokordu iyioo, nintayiolo iltauja lang meibung'a ena kitapata.

Kasisi. Ming'uar enkaji e likai, ming'uar embaratut e likai, anaa orindik lenye, anaa erindik enye, anaa olkiteng lenye, anaa sikiria enye, anaa entoki hoo nabo e likai.

Iltung'ana. Olaitoriani, tokordu iyioo, nisir kuna kitapata inono pooki ti atua iltauja lang, ikiomon iyie.

Keji taata Enkomono e inia par. Kore nabo kata te siadi inia Omono neisom Kasisi Empalai ejo, Ketisiraki Empalai (anaa matua oo Lkigerot naitaini te ng'ueji e Mpala) te Chapter . . . ang'asu to lkereri . . . Kore te neiting Empalai, nejo, Eiting'o te ne Mpala. Neisom Ilomon Supati (eidipa iltung'-ana aainyo aaitasho) nejo, Ketisiraki Ilomon Supati atua Chapter . . . ang'asu to lkereri . . . Te neidipai Ilomon Supati, neranyi anaa eisomi Imbaa e Nkirukoto ena nairukurukore, ewon eitasheito iltung'ana anaa te kue.

Kairukuto te Nkai nabo, Papa Olaidimani le pooki, Olaitobirani le keper o le nkop, o loo ntokitin pooki naalio o nemelio:

O to Laitoriani obo Yesu Kristo, Oinoti kelei otoiuaiki le Nkai, otiua Menye Lenye te kue enkop pooki, Enkai te Nkai, Wang'an te Wang'an, Enkai naadede ti atua Nkai nadede. Ketiuaki neitu eitobiri, Kore enkishiaakinoto enye nabo o ne Papa, naa te ninye eitobiraki intokitin pooki: naa te nkaraki iyoo iltung'ana o te nkaraki enjeunoto ang etodoua aing'uaa keper, neitaaki osesen te Nkiyang'et Sinyati te inia Oliontoi Maria, neitobiruni oltung'ani, Neshei te salaba te nkaraki iyoo te nkitoria e Pontio Pilato. Neitemei nenukari, kore te mpar e uni nepiu aitoki, anaa natisiraki too Lkigerot. Neilep alo keper, newenita te nkaina e tatene e Papa, naa keitoki ashukunye te nkitoo aiguenare ilooishu o ilootuata: nemeata enkitoria enye enkiting'oto.

Nairukuto te Nkiyang'et Sinyati, Olaitoriani o Laishoroni le nkishon, naing'uaa enetii Papa o Oinoti, naa te nebo Papa o Oinoti eomoni neishori enkitoo, ninye oiroro too Lnabii. Nairukuto te Nkanisa nabo natii inkuapi pooki, naitaitua Ilkipaareta. Naibalunye enkibatisare nabo te mpalakinoto oo ng'ok. Naanyu nanu empiunoto oo lootuata o enkishon e nkop nalotu. Amin.

Neliki elde Kasisi kuld tung'ana aa par kitok anaa aa par eenata ti atua inia wiki nalotu pee eibung'i. Kore te siadi te nkata naishiaakino kelikini ilomon le mpar e Nchola; neisomi aitoki impukunot oo mbaa o ilkulie omon, o naibokieki iloittarruoitie. Nemeibalieki ilomon anaa elikorite Nkanisa ti atua enkata e nkomono e Nkai, mara te nkutuk e ilo Kasisi; namara ninye kewan olkoo anaa elimu ilomon mara loitanapisheteki ti atua inkitanapat e na Buku, anaa loitanapa Olaiguennani anaa ilopeny inkitanapat te na omono natii inie ng'ueji.

Kore te ne nelikori Ilomon.

Neitoki elde Kasisi ashukunye ende ng'ueji e Misa o Laitoriani ang'asu enkitainoto e nkishorunot, airo ajo olkereri obo anaa ilkulie too kulo ooirukurukore, anaa nadol ajo keishiaakino oleng to Itau lenye.

Enchoo ewang'an inyi metawang'a te dukuya iltung'ana pee edol iasat inyi supati, pee eyanyituni Papa linyi otii shumata.

Mat. 5. 16.

Emishumaki ate te nkop masaa kiroteti, eneinosie ilasai o endoron, negil ilapurrok, nepurroo; Kake entushumaki ate te shumata masaa inyi kiroteti, te enemeinosie ilasai, anaa endoron, nemegil ilapurrok nemepurroo.

Mat. 6. 19, 20.

Metaa ore pooki niyieuu neitaas intai iltung'ana, entaasa sii ntai ninche nena ake, amu ena torati o lnabii.

Mat. 7. 12.

Mme pooki tung'ani laajoki, Olaitoriani, Olaitoriani, ojing enkitoria e Nkai, kake ilo oas enayieu Papa lai otii shumata.

Mat. 7. 21.

Neitashe Zakayos, nejoki Olaitoriani, Ing'orai, Laitoriani, ematua oo ntokitin aainei kaisho ilaisinak; naa te nawa entoki o ltung'ani te nkitamaia, narinyoki ninye katitin ong'uan.

Luka 19. 8.

Kalo askari oisiaiisho inkatitin pooki nemetum nenkisiaiya enye? Ang'ai otur olshamba loo Ing'anayio nemenya ilng'anayio lenyena? Anaa ang'ai oitadak emboo nememat kule e inia boo?

I Kor. 9. 8.

Ti nikituunokita iyoo intai imbaa oo Itauja, amaa embae kitok ti nikidung intokitin inchi e na kop?

I Kor. 9. 11.

Ai miyiololo aajo kore iltung'ana ooisiaiisho too ntokitin sinyat, eishuyieki ninche too lasari; naa kore lelo ooretisho too lasari, neng'ar ilasari? Neijia sii etojo Olaitoriani, kore lelo oolikoo ilomon supati le Nkai, eishuyieki ninche ilomon supati le Nkai.

I Kor. 9. 13, 14

Kore ilo oun inkuti, naa inkuti edung; naa kore ilo oun inkumok, naa inkumok edung. Kore oltung'ani pooki, inchoo ninye metaasa anaa naparo ti atua oltau lenye,

namara anaa to lmanerr anaa kiarakini, amu kesham Enkai
oloishoyo te ng'ida.

2 Kor. 9. 6, 7.

Inchoo ilo oitayioloki Irorei le Nkai meisiai ilo oitayiolot
ti atua imbaa pooki supati. Emisap ate, mekuenyieki
Enkai; amu natuuno oltung'ani ninye edung.

Gal. 6. 6, 7.

Kore ewon kiata mpaash, maitaasa supati iltung'ana
pooki oleng lelo oora le nkaji e nkirukoto.

Gal. 6. 10.

Kore imbaa e Nkai eata enhunet kitok, te naa keng'idak-
ini oltung'ani nena naata; amu eitu kiyau toki pee kipuonu
enkop, nimikindim aawaita toki ti nikipuo.

1 Tim. 6. 6, 7.

Intanapa lelo karsisi ti atua ena kop, metaasa supati
neng'idakino inkishorot; neiteng'elaki ate masaa te inia
kata nalotu, pee ebaiki enkishon nemeiting.

1 Tim. 6. 17-19.

Amu mara torrono Enkai merikino isiaitin inchi o
imbaa naaing'uaa enhaman, inia shaman nintoduaityie
te nkaraki enkarna enye, intai ooisiaita isinyat, newon ake
isiaitata.

Hib. 6. 10.

Eminchoo intai erikino iasat supati anaa inkishorrot;
amu keng'idakino Enkai ilasari ootiu inji.

Hib. 13. 16.

Kore oloata intokitin e na kop, nedol olalashe eata laikin,
neikenoo ninye enking'erunoto enye, aji eikuni te newon
enchaner e Nkai ti atua ninye?

1 Yoh. 3. 17.

Kore ilo oiteng'elaki iloomuei o ilemeata, kemayiani ilo;
naa keitajeu Olaitoriani ninye ti atua empar enye o sina.

Zab. 41. 1.

*Kore eisomi kulo kererin, naa keng'amaa kuldo arikok ti atua
sahani naiteng'elieki inia yieunoto naitakaki Enkai ti atua
Enkanisa pee eishori ilmisigino anaa inkulie tokitin e lelo
tung'ana naaitayaki, te nkaraki enkomono; neyaki ildo
Kasisi te nkootoi e nkomono inia sahini, neiteleki ninye
te mborron, enkeper Emisa Sinyati.*

*Kore enkata natii Enchola Sinyati, neiteper Kasisi Emisa
mukate o enkambu anaa nedol ajo meiteumu te inia yieunoto.
Naa kore abaki eidipa ataasa inia, neiro Kasisi ajo.*

Matoomonoki Enkanisa e Kristo naata olarabal te ne te
nkop.

NA Ai, Olaidimani le pooki oishu intarsi, oitayiolo
iyioo to Lkipaaret lino sinyat aatoomonoki te sayiata, aato-
rinyoki enashe te nkaraki iltung'ana pooki; ikiomon iyie
te mborron pee eshama enkomono ang te nkordunoto ino
[*ning'amaa inkishorunot ang] nikintaki

**Enkata nemeitaini
inkishorunot meji ku-
lo rorei: Ning'amaa
inkishorunot ang.*

iyie Olaitoriani Enkai; ikisai iyie tokotaki enkata pooki Enkanisa ino
natii inkuapi pooki enkiyang'et nabo nadede, naata enhola: Ninchoo iltung'ana pooki ootang'-
amaitie Enkarna ino Sinyati metumoto ti atua nadede Rorei lino sinyati, nepuo te lototo nabo o enhaman e Nkai.
Iyie Papa le keper, inchoo mpiris Askofuni pooki o loo-
irrita iltauja loo ltung'ana, metaa kore te lototo enche o te
nkitayioloto enche, nebulu aibalunye Rorei lino odede o
le nkishon, o meishorieki Sakramenti inono sinyat to nadede
o te naishiaakino: Ikiomon iyie intajeu nirrip Rais lang o
ilaisiaiak lenyena, o pooki ooishooki inkitanapat oodou te
ninye, meitoreisho to nadede metii enkialakinoto, neibooki
intorrok o nkitarruorrot, metorripo imbaa inono naadede
naa supati. Ninchoo iltung'ana linono pooki empiris ino e
keper; nintulusoo ele turrur otii ene metaa too Itauja oobor
o enkomono naishiaakino, neinining Rorei lino sinyati
neng'amaa; nikisiai aaitadede te sinyatisho o te supatisho
too mparitin pooki e nkishon enche. Ikiomon iyie te
mborron, Olaitoriani, te supatisho ino o te mpiris niretoki
pooki ooata sinaitin, anaa emion, anaa laikin, anaa mueyian
anaa osina ake pooki le na kishon naiting. Nikisis En-
karna ino sinyati te nkaraki ilaisiaiak linono pooki ootan-
nang'a enkop ti atua enkirukoto ino o enkuretisho ino;
nikisiai iyie inchoo iyioo empiris pee kirukurukore in-
koitoi enche supati, pee kiaku iyioo iloong'ar te nebo ninche
enkitoo ino e shumata; Inchoo iyioo nena, iyie Papa, te
nkaraki Yesu Kristo, ora ninye openy Olaitutumoni lang,
Olaretokinoni lang. *Amin.*

*Nejoki te ne Kasisi kuldo oonyikaki pee eng'amaa Enchola
Sinyati kulo rorei,*

Intai ooitadede enkibelekenyata too ng'ok inchi niwenini
te nchaman te lelatia inchi niyieu elototo ng'ejuk, niru-
kurukorere inkitanapat e Nkai, nisabaa taata o kenya ake

ENCHOLA SINYATI

atua inkoitoi enyena sinyat; Entinyiku te nkirukoto, ning'amaa ena Sakramenti sinyati te retoto inchi; nintai ilimunot inchi te mborron te dukuya Enkai, Olaidimani le pooki, nigiligil kung'a te ng'iriata.

Neitolimu obo ti atua kuldó Kasisini ootii ena limunoto e kulo pooki, too nkarn enche ilooyieu eng'amaroto e Nchola sinyati; neisom elde Kasisi egilita kung, negilita sii pooki ootii kung'a te mborron ejo,

IYIE Ai Olaidimani le pooki, Papa o Laitoriani lang Yesu Kristo, Olaitobirani loo ntokitin pooki, Olaiguenanai loo ltung'ana pooki; Ikinyoraa nikinchirie ing'ok o inkitarr-uorrot kumok ang, nikitaasa oleng inkatitin kumok, too mparunot, too rorei, o too iasat, aaishiaakino enkisia ino e Nkai. Nikiteyetutua engoro ino aaishiaaki ate. Ikimbele-kenyate te nadede, nikisinanio te nkaraki kuna kitarruorrot ang; Kegol te iyoo imparunot e kuna baa; Keiroishi oleng olola lenche. Ing'eru iyoo, Iyie, Papa lo Ing'er; Te nkaraki Enkerai ino Yesu Kristo, tapalaki iyoo pooki e apa; Ninchoo kisiai Iyie nikinting'id Iyie oshi ake ti atua ng'ejukisho e nkishon. Pee etum Enkarna ino enkanyit o enkisia ti atua Olaitoriani lang Yesu Kristo. Amin.

Kore te ne keitashe elde Kasisi anaa eitashe ildo Askofu otii inie, kore pee eidip aibeleyanyakinoi lelo tung'ana, neiro ena kitaiinoto oo ng'ok.

ENKAI Olaidimani le pooki, Papa otii keper, to Ing'er lenye kitok eitaia lekutuk le mpalakinoto oo ng'ok te lelo pooki ooibelekenyate te nkirkoto nadede ooishiaakinote ninye; Neng'eru intai, nepalaki intai, neitajeu intai too ng'ok inchi pooki neiterresh intai, neitagol intai ti atua supatisho pooki; nerik intai atua enkishon nemeiting; ti atua Yesu Kristo, Olaitoriani lang. Amin.

Neiro Kasisi te ne nejo,

Entoning irelei ooitagolisho lo Laitajeunoni lang Kristo ojoki ninye pooki oorinyokino ninye te nadede.

Wotu enatii, intai pooki ooasisho, niatata ilolan ooiroishi, pee aieng'ieng'ie intai. *Mat. 11. 28.*

Amu etonyorra Enkai enkop aiko inji o meishoru Oinoti lenye obo, paa ore pooki ng'ai oiruk nemeimin kake netum enkishui nemeish. *Yoh. 3. 16.*

ENCHOLA SINYATI

Entoning sii enetojo Paulo Sinyati.

Ororei oiruki neishiaakino aitoki te neshamari katukul. inchere keuo Kristo Yesu enkop aitajeu ilooata ing'ok.

1 Tim. 1. 15.

Entoning sii enetojo Yohana Sinyati:

Naa te neas oltung'ani ing'ok, nikiata iyoo Olaomonokinnoni te Papa, Yesu Kristo lo sipat; naa ninye Olaitutumoni too ng'ok ang. *1 Yoh. 2. 1.*

Kore te siadi neiro ilo Kasisi ajo,

Eilepie iltauja linchi.

Walata. Ikilepie metabaki enetii Olaitoriani.

Kasisi. Maishoo Olaitoriani lang Enkai enashe.

Walata. Keishiaakino naa keisupat ti nikinko inyi.

Neibeleyanyakino Kasisi Emisa o Laitoriani, nejo,

Keishiaakino naa keisupat oleng nemeata ajo mikincho iyie oshiake o too ng'uejitin pooki enashe, Olaitoriani, Papa sinyati, Enkai Olaidimani le pooki o lo ntarasi.

Neji te ne irelei ooiteperokaki te mpar enye, te neatai anaa too nkule paritin pooki keirukurukore kulo rorse ladeii,
Te nkaraki e inia ikisis iyie te nebo Ilmalaikani o ilkituaak loo Lmalaikani o ilturrur pooki le nkitoria e Nkai; ikisis nikirrep Enkarna ino sinyati, nikijo nimikipal kijo, Sinyati, Sinyati, Sinyati, Olaitoriani Enkai oo lororani, nebore enkitoria ino o enkop enkisia ino; Ikisis iyie, Olaitoriani kitok te pooki. Amin.

IROREI OOITEPEROKAKI EMPAR ENYE

Te Mpar e Christmas, o too mparitin saba te siadi Anaa inchoo iyoo Enkerai ino kelei Yesu Kristo otiuwaki te nkaraki iyoo anaa te na kata e taata; anaa te isaata enye Enkiyang'et Sinyati eitaaki oltung'ani katukul ti atua ilo sesen lenye Nkoliontoi Maria ng'otonye enye; nemetumi naracha oo ng'ok, pee eituk iyoo too ng'ok pooki. Te nkaraki inia ikisis, iladeii rorei.

Te Mpar e Mpiunoto, o too mparitin saba te siadi
 Kake keishiaakino too iyoo ti nikisis iyie oleng te ilo omoni le nkisia le mpiunoto e Nkerai ino Olaitoriani lang Yesu Kristo; amu Olkuoo odede le Nker le Raparoto, oitayaki te nkaraki iyoo neitaa inkitadiat e nkop; amu to lkee lenye eiting'ie olkee o te mpiunoto enye etushukokini enkishon, eibelekenyaki iyoo Enkishui o ntarasi; Te nkaraki e inia ikisis, *iladeii rorei*.

Te Mpar e Nkilepata, o too mparitin saba te siadi
 Ti atua Nkerai nisham oleng Olaitoriani lang Yesu Kristo, ing'orai te siadi ilomon le nkisia le mpiunoto enye neipung'oki eibala ilkipaareta lenyena pooki, nelioi te ninche etiu neijia, eilepaa alo keper nelo aitobiraki iyoo ng'ueji nikiwenie metaa kore te ng'ueji netii ninye nikilep sii iyoo aapuo inie nikiaku iltung'ana ooweni nikintoresho te nebo ninye ti atua enkitoria enye; Te nkaraki e inia ikisis, *iladeii rorei*.

Te Mpar e Pentekost, anaa enkishorunoto e Nkiyang'et Sinyati, o too mparitin saba te siadi

Ti atua Yesu Kristo Olaitoriani lang; te risioroto lekutuk lenye odede eitodoka iyoo Enkiyang'et Sinyati, anaa te na kata taata eing'uaa keper, te nebo oltoilo kitok omaniki iltung'ana, anaa enkutata o lwao kitok, te nkitalanyaanyukoto oo lng'ejepa le nkima oodoki inkeperi oo nkueshi oo lkipaareta meitayiolo ninche, nerik ti atua nadede pooki, neisho inkishorunot oo lng'ejepa oopasha o sii empijan o nkidimat pee etum aashom kue aaitayiolo iloreren nenyok nemein-auru; te nkaraki inia pee eitayaki iyoo ti atua enaimin aapik wang'an, neitayaki iyoo ti atua enkiminata nepik iyoo atua eyiolounoto e nkoitoi; amu wang'an ino o enkoitoi ino naa ninye Nkerai ino Yesu Kristo; Te nkaraki e inia ikisis, *iladeii rorei*.

Te Mpar e Okuni ake

Iyie Nkai nabo o Olaitoriani obo; mira nabo atua kewan, kake nira inkishuini uni ti atua empukunoto nabo; kore nikirukuto ti atua ilomon le nkisia enye Papa, naa ninye kirukuto ti atua Enkerai o ti atua Enkiyang'et Sinyati,

metii empashata anaa enkitong'oro; Te nkaraki e inia ikisis, *iladeii rorei*.

Naa kore te siadi kulo rorei keranyi nabo kata anaa keji, TE nkaraki e inia ikisis iyie te nebo Ilmalaikani o ilkituaak loo Lmalaikani o ilturrur pooki le nkitoria e Nkai; ikisis nikirrep Enkarna ino sinyati, nikijo nimikipal kijo, Sinyati, Sinyati, Sinyati, Olaitoriani Enkai oo lororani, nebore enkitoria ino o enkop enkisisa ino; Ikisis iyie Olaitoriani kitok te pooki. Amin.

Kore taata egil Kasisi kung te dukuya Misa e Laitoriani, nejo ti atua inkarn e lelo oong'amaa Endaa o Laitoriani ena Omono nairukurukore.

MIKINTEU aatu te dukuya ena Misa ino, Olaitoriani le nkordunoto, ikisiligita isupatisho ang maate, kake ti atua inkordunot inono kumok naa kituaak. Meishiaakino iyoo ti nikibosu rarat ti abori Misa ino. Kake iyie Olaitoriani enkordunoto oshiake: Te nkaraki inia inchoo iyoo Olaitoriani le mpiris matam inkiri e Nkerai ino Yesu, nisham, nikimat osarge lenye, pee eitusupat osesen lenye isesen lang oobore ing'ok, neituk iltauja lang osarge lenye kirotet; pee kiweni ti atua ninye intarasi, newon ninye ti atua iyoo. *Amin.*

Kore ilo Kasisi te neidip aitobira Mukate o Enkambu eitashe te dukuya Misa Sinyati, pee etum aitobira te sarata o te nkishiaakinoto negil Mukate te dukuya ilo turrur, neya Enkikombe ti atua enkaina enye, nejo ena Omono naitisiny nena.

NA Ai, Olaidimani le pooki, Papa le keper, te nkordunoto ino supat ninchoo Enkerai ino kelei Yesu Kristo pee eari metua to lchani te lakunoto ang, oitaia te inia (te nkishorunoto e kewan naitayaki kata nabo) olasar o enkishorunoto, o enkiteumunoto nabore nabaya naiteumu ing'ok e nkop pooki: neitobir ti atua Ororei lenye eitanapa iyioo mairukurukore enkitaparunoto oshiake o lkee lenye kirotet, metabaa anaa enchukunoto enye; Toning'o iyioo, Papa le nkordunoto, ikisai iyie te mborron; ninchoo iyioo oo ng'amaa kuna tokitin inono mukate o enkambu, te risioroto enkitanapata e Nkerai ino Olaitajeunoni lang Yesu Kristo, pee kiparo olkee lenye o emion, inchoo iyioo king'ar Osesen lenye omayiana o Sarge: naa kore te inia kewarie natoli-

¹Kore te ne eibung
Kasisi sahani too
nkaink enyena.

²Negil mukate te
ne.

³Keiteleiki en-
kaina mukate pooki
te ne.

⁴Neibung Enki-
kombe te nkaina te
ne.

⁵Kore te ne kei-
teleiki enkaina enye
entoki pooki te naa
Enkikombe anaa ol-
tupa, entoki nati
Enkambu meitisinyi.

Kore te na katai neng'amaa Kasisi ang'as te dukuya Endaa o Laitoriani te matuan pokira are, ninye kewan, neitoki alo aisho Askofu, ilkulikai Kasisini o Ilarikok te inia pukunoto, (te naa keatai ilkulikai ootii inie) naa kore te siadi neisho olorere sii pooki te nkata enye, ti atua inkaik enche, kegilita pooki kung'a te mborron. Naa kore te neisho pooki tung'ani mukate, nejo,

OSESEN lo Laitoriani lang Yesu Kristo oitayaki te nkarakai iyie meikoikoyio osesen lino o oltau lino metabaki enkishon nemeiting. Iawa ena tama pee iparo ajo ketua Kristo te nkarakai iyie, ninya ninye ti atua oltau lino te nkirkoto te nebo enashe.

Kore Kasisi pee eaku eisho Enkikombe pooki ng'ai nejo, OSARGE lo Laitoriani lang Yesu Kristo oibukoyoki te nkarakai iyie, meikoikoyio osesen lino o oltau lino metabaki enkishon nemeiting. Tamata ena pee iparo ajo eibukoyoki Osarge le Kristo te nkarakai iyie, niata enashe.

Te naa keishunye Mukate anaa Enkambu naatamayanaki ewon eitu eng'ar pooki, nemayan Kasisi ai eirukurukore na duo Omono natisiraki eng'asuni te (Olaitajeunoni lang Yesu Kristo te inia kewarie, o ilkulie), pee emayiani Mukate o ^{sii} te (Neijia sii etiu te siadi endaa o ilkulie), pee emayiani Enkikombe. Kore pee eidip pooki aatang'ar nena, neshuko Kasisi enetii Misa o Laitoriani, neiteper te nkanyit te inia Misa pooki naatelekuni te nena Tokitin naatamayanaki, neisiap ninche te nkitambaa supat e katani.

Kore te inia kata nejo Kasisi Enkomono o Laitoriani nejo Olorere te siadi ninye pooki.

PAPA lang otii keper, Meitisinyi Enkarna ino. Meu enkitoria ino. Metaasi eniyieu te nkop, anaa enatiu te keper. Inchoo iyioo taata endaa ang naiteumu iyioo. Nipalaki iyioo inkitarruorrot ang, anaa ti nikipalaki iyioo ilooitariki iyioo. Nimirik iyioo atua isaanat, kake intajeu iyioo te ilo arruoni. Amu enino enkitoria, o engolon, o enkitoo, Intarasi o intarasi. Amin.

Kore te siadi inia keji kulo ooirukurukore.

OLAITORIANI Papa le shumata, iyioo ilaisiaiak linono le mborron ikiyieu tukul isupatisho ino e Papa te nkordunoto ino tang'amai ele asar lang le nkissa o le nashe; ikisai iyie te mborron pee inchu iyioo, te nkarakai isupatisho o lkee le Nkerai ino, Yesu Kristo, o ti atua enkirukoto to sarge lenye pee kitum iyioo, o Enkanisa ino pooki empalakinoto oo ng'ok ang, o eretoto pooki o lkee lenye. Kore te ne ikincho nikintaki iyie, Olaitoriani, ate, iltauja o iseseni lang, pee eaku olasar sinyati oishu le ng'eno; nikisai iyie te mborron, pee imput iyioo oong'ar ena Daa sinyati, te mpiris ino o emayianata naing'uaa keper.

Te nkarakai ing'ok ang kumok mikiata isupatisho pee kintai olasar te kue iyie, kake ikisai iyie, tang'amai ena omono naishiaokino te neitaini, niminken isupatisho ang, kake tapalaki iyioo inkitatiat ang ti atua Yesu Kristo,

ENCHOLA SINYATI

Olaitoriani lang; metaa te ninye o te nebo ninye, itum enkanyit o enkisia ti atua enhola e Nkiyang'et Sinyati, iyie Papa, Olaidimani le pooki intarasi. *Amin.*

Kore te ne keji anaa keranyi kulo rorei,

ENKISISA te Nkai e keper, naa kore te nkop osotua, o enhaman ti atua iltung'ana. Ikirrep iyie, ikimayian iyie, ikiomon iyie, ikisis iyie, ikirinyoki iyie enashe te nkarak ienkisisa ino kitok, Olaitoriani Enkai, Olaiguenani le keper. Papa Olaidimani le pooki.

Iyie Olaitoriani, Oinoti lino kelei Yesu Kristo, Olaitoriani Enkai, Olkuo le Nkai, Enkerai e Papa, oitai ing'ok e nkop, tokordu iyoo. Kore iyie oitai ing'ok e nkop, tokordu iyoo. Kore iyie oitai ing'ok e nkop, tang'amai enkomono ang. Iyie Owenita te nkaina e tatene e Nkai Papa, tokordu iyoo.

Amu iyie openy sinyati, iyie openy Olaitoriani, iyie openy Kristo te nebo Enkiyang'et Sinyati, olkitok oleng te nkisisa e Nkai Papa. *Amin.*

Kore te ne keisho ildo Kasisi, anaa Askofu te naa ketii ninye, meshomo iltung'ana te na mayianata,

NAA osotua le Nkai, olang iyiolounot pooki, metoripo iltauja o imparunot inchi ti atua eyiolounoto o enhaman e Nkai o ne Nkerai enye Yesu Kristo, Olaitoriani lang; emayanata e Nkai Olaidimani le pooki, Papa, Enkerai o Enkiyang'et Sinyati, metowena ti atua intai aboitare intai intarasi. *Amin.*

ENKOITEI NAIBATISIEKI INKERA KUNINI TE KUE ILTUNG'ANA

TI ATUA ENKANISA

Keitarriyiani iltung'ana ajo keisupat te neibatisai inkera te mpar e fumapili anaa inkulie paritin sinyat te nkata naitururrro iltung'ana kumok; naa keitanapi neijia pee elikori ng'am- arot enche ti atua esiana e Nkanisa e Kristo; o abaki sii pee eitaparuni pooki obo le lelo pooki ootii Enkanisa te inia kata enkibatisare enye makewan o lekutuk lenye oitaka ninye Nkai.

Te nkarak iinia eikash te neitaini enkibatisare te nkutuk nai- rorie oleng ti atua inia kop. Abaki te naa neijia (te nkata naishiaakino) keibatisai inkera too nkulie paritin pooki. Ing'orai, te nkerai pooki naibatisai te naa lee, keyieuni ilaitasheikinok okuni, oare lewa, o ng'oriei nabo, o te nkerai nara ng'oriei, neyieuni ilaitasheikinok okuni, ng'orio are o lee obo.

Te netumi inkera nayieuni neibatisai neisho ilooiu kasisi ilomon eng'or empar enye anaa te inia seran te kue Sayiata e Seran. Neijia lelo aitasheikinok o ilopeny enkerai nepuo aaweni enetaniki fonti pee eaku ilootanapate; te naa Sayiata e Seran, te siedi Enkisoma e are, abaki te naa Sayiata e Teipa, te siedi Enkisoma e are; anaa nadol ilo Kasisi naitanapisho. Nelo ilo Kasisi ng'ueji e inia fonti (neiputi enkare supat te na kata;) te neitashe nejo.

Amaa, ena kerai eidipaki aibatisa, anaa eitu ?

Te neng'amaa Eitu, neponaa Kasisi irerei airo.

Intai oashami oleng, enkaraki oltung'ani pooki onutai neini too ng'ok, anaa natojo Olaitajeunoni lang Kristo pee ejo, Metii ololidim atijing'a enkitoria e Nkai, eitu eigili aiu, eitu eini te inoto ng'ejuk te nkare o te Nkiyang'et Sinyati; kasai intai oleng entoomon Enkai Papa, aaibot to Laitoriani lang Yesu Kristo, inchere too nkordunot enyena kumok eisho ena kerai inia nemeidim ninye atumo te mpukunoto enye openy, pee eibatisai te nkare o te Nkiyang'et Sinyati,

NAIBATISIEKI INKERA KUNINI TE KUE ILTUNG'ANA
neng'amari ti atua Enkanisa sinyati e Kristo, neitaii robata
naishu e inia Anisa.

*Neiro Kasisi te inia kata,
Matoomon.*

NA Ai, Olaidimani le pooki o ntarasi, te nkordunoto ino kitok, intajeua Nua o iltung'ana le nkaji enye to lkadich pee meidaaya te ncare; nitoriko sii te seriani iltung'ana linono inkera e Israeli ti atua enaiposha Nanyukie, nintarriyianisho te inia kitanaanyukoto enkibatisare ino sinyati, o te nkibatisare e Nkerai ino Yesu Kristo nisham oleng, te sere e Jorrdan, nintisinya enkare naitukoo ing'ok inia natiu anaa enkitukoto naing'opa; Ikisai iyie, too nkordunot inono nemeata enkiting'oto ning'or ena kerai to lng'er nintuku nintisiny ninye te Nkiyang'et Sinyati pee etum enjeunoto te ngoro ino, neng'amari ti atua olkadich le Nkanisa e Kristo. Kore eitasho ti atua enkirukoto ebore eng'ida ti atua siligi, ekuraki aibung endona ti atua enchaman, neporo olopir le na kop e sina, pee ebaki te nkiting'oto enye enkop o ntarasi, neitoreisho te nebo iyie te inie intarasi o intarasi; ti atua Yesu Kristo Olaitoriani lang. *Amin.*

NA Ai, Olaidimani le pooki obik intarasi, olaretoni le lelo pooki oata laikin, o sii lelo pooki likuetiki nitii, o enkishon e lelo ooirukuto, o empiunoto enche lootuata, kiom-noki ena kerai metaa kelotu ajing ena kibatisare sinyati, pee etum enkitaiinoto oo ng'ok enyena te inoto ng'ejuk e nkishui. Tang'amai ninye, Olaitoriani, te risioroto lekutuk lintaia te Nkerai ino nisham oleng, pee iro nijo, Entoomon, pee eishori intai; eng'oroto pee itumutum, entooshosh pee eboluni intai; Ayia inchoo taata iyoo likiomon; kore iyoo ooing'oru, inchoo matum; tobolo iyoo ooshosh; pee etum ena kerai ating'ida te mayianata o ntarasi e nkisujata ino e keper, pee ebaki enkitoria o ntarasi nitojo te lekutuk; ti atua Kristo Olaitoriani lang. *Amin.*

Neitasho te inia kata lelo tung'ana, neiro Kasisi,
Entoning irereii loo Lomon Supati ootisiraki te Marko
Sinyati, chapter 10, o olkereri 13.

Neyaki ninche inkera kutiti, pee etum ninye aiseyie, nebuaki ninche iloiteng'eni lenyena. Kore pee edol Yesu negorokino, nejoki, Entapal inkera kutiti meetu enatii, emi-

NAIBATISIEKI INKERA KUNINI TE KUE ILTUNG'ANA
mitiki, amu inkera kutiti naatiu anaa kuna, enenche enkitoria e Nkai. Edede ajoki intai, kore ole meng'amaa enkitoria e Nkai anaa enkerai kiti, mejing katukul. Neibung too nkaik enyena, neiteleikienkaina amayian.

*Te siedi eishunye ena kisoma, nejoki te inia kata Kasisi
ilaitasheikinok kulo rereii.*

Ilalashera laainei ooshami, ining'ining ti atua kulo omon irerei lo Laitajeunoni lang Kristo, ajo etanapishe injere meyakini ninye inkera; nekosakan kuldoo ooiboyo ninche, anaa nitarriyianaki iltung'ana pooki meirukurukore imbaa enche nemetii entorrono. Nidolidol too kunda naataasa ninye too iasat enyena e oriong, eitoduaye ninche enking'-erunoto e oltau te nena kera; amu etanapa too nkaik enyena, neiteleiki inkaik nemayian. Emiaku naa ilooata oln'ash, kake eiruko aakoraki oleng too ltauja linchi aajo keng'amaa te ng'erunoto ena kerai aikunyi, neibung ninye too nkaik o lng'er lenye; neisho ninye mayianata e nkishon o ntarasi neisho metaa olong'ar enkitoria enye nemeata enkiting'oto. Te nkaraki inia, ikitisiputra enchaman e Papa lang le keper te na kerai anaa naibalunyeki te Nkerai enye Yesu Kristo; nimikiata iyoo oln'ash inchere keng'amari ena siai ang e nchaman nikiyaunie ena kerai atua Enkibatisare enye sinyati; naa maishoo iyoo enashe te nkirkoto o te nkonomo nadede, nikijo,

NA Ai, Olaidimani le pooki lo intarasi, Papa lang le keper, ikirinyoki iyie enashe te mborron amu imboto iyoo oo matayiolo empiris ino, nikiruk iyie. Indimie iyoo meteboreyia eyiolounoto, nintagol ena kirukoto ti atua ltauja lang intarasi. Inchoo ena kerai Enkiyang'et ino Sinyati, pee eigili aiu pee eaku olajung'oni le njeunoto nemeata enkiting'oto, ti atua Olaitoriani lang Yesu Kristo, oishu neitoreisho te nebo iyie o Enkiyang'et Sinyati, taata o metabaki intarasi. *Amin.*

Neitoki Kasisi ajoki ilaitasheikinok neijia.

Intai ooshami, iyautua ena kerai ene meibatisai, itoomono Olaitoriani lang Yesu Kristo pee esham neng'amaa ninye, neitai ninye too ng'ok enyena, neitisiny ninye te Nkiyang'et Sinyati, neisho enkitoria e keper, o enkishon o intarasi. Itining'o sii aajo keitayia Olaitoriani lang Yesu Kristo ti

NAIBATISIEKI INKERA KUNINI TE KUE ILTUNG'ANA

atua ilomon lenyena supati lekutuk inchere keishoru kuna baa pooki nitoomonutua; naa kore ilo lekutuk lenye, kore te nkalo enye, kedede keibung neitabaya. Te nkaraki inia keitayia Kristo ele lekutuk, meata ajo meitai sii ena kerai te nkalo enye too lekutukie linchi, intai oora ilaitesheikinok lenyena (metabaki ilarin oidim atojoyie openy) aajo Keany Shetani o siaitin enyena pooki, neiruk oshi ake orerei Sinyati le Nkai, neibung inkitanapat enyena te njing'aroto.

Ayia, te nkaraki inia, kaibar intai,

Iany iyie te nkarna e na kerai, Shetani o siaitin enyena pooki, o imbaa e pesho o enkisia e nkop, te nebo ing'uarat o inong'uarat enyena, o iyieunot naabore ing'ok eo sesen, metaa mirukurukore ninche, anaa incho ninche mikitoriko ? *Walata.* Kaany ninche pooki.

Kasisi.

Amaa, irukuto te Nkai Papa Olaidimani le pooki, Olaitobirani le keper o le nkop ?

O te Yesu Kristo, Enkerai enye kelei, Olaitoriani lang? Irukuto ajo etunutateki te Nkiyang'et Sinyati, etiuwaki te inia Oliontoi Maria, eitamioki te nkitoria e Pontio Pilato, neshei te salaba, nee, nenukari, nedoki enkop oo loottuata; kore te mpar e uni nepiu aitoki aing'uaa ilootuata; neilepaa alo keper, newonita te nkaina e tatene e Nkai Papa, Olaidimani le pooki; naa keitoki aing'uaa idie alotu aiguenare ilooishu abaki ilootuata ?

Irukuto te Nkiyang'et Sinyati; Enkanisa sinyati natii inkuapi pooki; Enchola oo Sinyat; Empalakinoto oo ng'ok; Empiunoto e sesen; o Empuan nemeish ? *Walata.* Ee, kairukuto nena akoraki.

Kasisi.

Iyieu nikimbatisai ti atua ena kirukoto ? *Walata.* Ee, inia ayieu.

Kasisi.

Imbung te njing'aroto iyieunot sinyat e Nkai, o inkitanapat enyena nisabisab ti atua ninche imparitin pooki e nkishon ino ?

Walata. Kaibung nena te retoto e Nkai.

NAIBATISIEKI INKERA KUNINI TE KUE ILTUNG'ANA

Nejo Kasisi te inia kata,

NA Ai, e nkordunot, inchoo metaa kenukari Adam musana otii atua ena kerai, metaa kepiu oltung'ani ng'ejuk ti atua ninye. *Amin.*

Indimie pee ee ti atua ninye ing'uarat torrok e sesen, neaku imbaa pooki e Nkiyang'et Sinyati naaishu nebulu ti atua ninye. *Amin.*

Indimie ninye te ngolon o te nkidimata pee etum aisula nemir Shetani, o enkop o sesen. *Amin.*

Indimie pooki ng'ai orikuni ene te nkaraki enkisiaiya ang pee eishopokini sii ninche supatisho e keper, neishori inkishorunot o ntarasi, ti atua inkordunot inono, Olaitoriani Enkai namayiana, ninchu intore intokitin pooki intarasi. *Amin.*

NA Ai, Olaidimani le pooki oishu intarasi, naa Enkerai ino nisham oleng Yesu Kristo, te nkaraki empalakinoto oo ng'ok ang, eibukoyie enkare o sii osarge ti atua mug enye sinyati oleng; neitanap sii ilkipaareta lenyena meshomo aitayiolo iloshon pooki, meibatisai ninche te Nkarna e Papa, ne Enkerai o ne Nkiyang'et Sinyati; ikiomon iyie tuuro enkiok ino te nkemono e le turrur, intisinya ena are pee eituk ing'ok te nking'opata; nincho ena kerai, natum taata enkibatisare, metang'amai emborei e munyani ino, pee ewon intarasi ti atua esiana oo nkera inono naageluno naabore enkirukoto, ti atua Yesu Kristo Olaitoriani lang. *Amin.*

Neya inia kata Kasisi nena kera manaabo too nkaik enyena nejoki lelo aitasheikinok,

Emboto enkarna e na kerai.

Neibot ilo Kasisi enkarna anaa enaipotokaki te siedi, pee esipuni ajo kedede megol enkare te inia kerai te nepiki atua inia are, neing'ori pee metum emion te siedi, nejo,

Ng'ania, kaibatisa iyie te Nkarna e Papa o ne Nkerai o ne Nkiyang'et Sinyati. Amin.

Kake te nesipuni ajo meata engolon inia kerai naidim te nebukokini enkare, nejo inia kata irerei anaa naasira te kue.

Ng'ania, kaibatisa iyie te Nkarna e Papa o ne Nkerai o ne Nkiyang'et Sinyati. Amin.

NAIBATISIEKI INKERA KUNINI TE KUE ILTUNG'ANA

Nepon te inie ajo,

Iking'amaa ena kerai ti atua olturrur le mboo e Kristo,
Kore tene kemimin chir Kasisi ena kerai nikimin chir ninye to lminchere le Msalaba, metaa meitoki atum ninye to lminchere le Msalaba te nkocomom enye. Kristo oteshoki, nearare te mpijan ing'ok, o enkop, o Shetani, ti abori bendera enye; neigutaa anaa askari o laisiaiani le Kristo ebore enkirukoto metabau enkiting'oto e nkishon enye. Amin.

Nejo Kasisi te inie,

Ilalashera ooshami, ikidol taata etoiuwaki kuna kera kat are, etipikaki atua osesen le Nkanisa e Kristo, matirinyoki Enkai Olaidimani le pooki enashe te nkaraki kuna baa supati; nikiomon ninye to ltau obo metaa kepuo kuna kera kue te nkishon enche pooki anaa natang'asutua taata.

Negil kung'a pooki te ne nejo,

PAPA lang otii keper, Meitisinyi Enkarna ino, Meu enkitoria ino. Metaasi eniyieu te nkop, anaa enatiu te keper. Inchoo iyioo taata endaa ang naiteumu iyioo. Nipalaki iyioo inkitarruorrot ang, anaa ti nikipalaki iyioo ilooitarriki iyioo. Nimirik iyioo atua isaanat, kake intajeu iyioo te ilo arruoni. *Amin.*

Nejo Kasisi te inie,

KINCHO enashe oleng, iyie Papa lo Ing'er kitok, amu itashama aisho kuna kera inia inoto ng'ejuk te Nkiyang'et Sinyati, ning'amaa metaa inkera inono katukul nintubulu nipiak atua Enkanisa ino sinyati. Nikiomon iyie te mborron te kuna kera naatuata too ng'ok neishu to nadede, nenukaro te nebo Kristo ti atua olke lenye, pee etumi aatiik ildo tung'ani musana, neitaini katukul osesen pooki loo ng'ok; anaa naishhooki metaa enhola eo lke lo Layieni lino, neaku sii le mpiunoto enye, abaki te nkiting'oto, o te nebo ilootung'ayieki le Nkanisa ino sinyati, nejung enjung'ore e nkitoria ino nemeata enkiting'oto te Kristo Olaitoriani lang. Amin.

Neitashe pooki te inie; nejoki Kasisi lelo aitasheikinok ena kitaarriyianata,

NAIBATISIEKI INKERA KUNINI TE KUE ILTUNG'ANA

Te nkaraki naatojo kuna kera too Ing'ejepa linchi intai Ilaitasheikinok lenche, ikiany Shetani o isiaitin enyena pooki, nikiruk Enkai, nikisiai ninye, nemeata ajo miparoro aajo imbaa inchi naa esiai inchi pee ing'oraan kuna kera meitayioloi neing'ori metaa enkata nang'enu ayiolo imbaa kituaak naataasa ninche te ne too Ing'ejepa linchi. Neitoki aapona aayiolou nena baa nimbotibot meinining'o elimunoto. Naa kore enalusoo te neing'ori metayiolo imbaa e nkirkukoto, o Enkomono eo Laitoriani, o inkitanapat tomon too nkutukie enche, pee eyiolo neiruk inkulie baa pooki anaa naishiaakino le Kristo te supatisho eoo Itauja lenche; neitubuluni kuna kera anaa enaishiaakino te nkoitei nauriyie Enkai, neirukurukore imbaa e Kristo. Entaparo enkata pooki inchere keitadol iyioo enkibatisare imbaa nikimbalunye, naa nena pee kirukurukore naaitodua iyioo Olaitajeunoni lang Kristo, nikintanyaanyukie ninye ate eneikuna pee ee o eneikuna pee epiu te nkaraki iyioo, neijia kitiu iyioo loobatisaki, nikie too ng'ok nikipliunye nadede, nikiuo kue enkata pooki kituata too ng'uarat ang pooki torrok, nikiuo yie imparitin pooki ti atua supatisho pooki oenkanyit te nkuretisho e Nkai.

Nepon te inie ajo,

Empartai kuna kera meyiakini Askofu pee etum aiteleki inkaik, enkata naidim aatojo Imbaa e Nkirukoto, o Enkomono o Laitoriani, o nena Kitanapat Tomon, too nkutukie enche, neponikini enkitayioloto e Katekismo e Kanisa naitobiraki te nkaraki inia.

Te neitaini Enkibatisare enkata nemetii Sayiata e Seran anaa ne Teipa, neisho Kasisi meshomo lelo tung'ana ooiturrurrote nejo,

METAMAYIANA intai Olaitoriani neirrita intai, meing'-oraan intai Olaitoriani te nkocomom enye, neisho intai osotua, taata o intarasi. *Amin.*

Meing'ashi katukul to Rerei le Nkai inchere kore inkera naaibatisaki te nee, eitu eas ing'ok o iasat, kejeu nena kera metii olng'ash.

**ENKOITEI NAIBATISIEKI
ILTUNG'ANA KITUAAK**

ANAA ILOOIDIM SII
AATANG'AMAI OOPENY

Te netumi iltung'ana ooyieuni neibatisai naa iltung'ana kituaak nemeata ajo melikini Askofu anaa oltung'ani oishori meing'orai imbaa enche ewon eng'or imparitin saba naalolong'a. Naa kore lelo oolimu ilomon anaa ilooiu ninche anaa ilkulikai tung'ana ng'eni; metaa keing'orari metaliooto ajo keitayioloki te nkitabaroto metaa ilooyiolo imbaa naairuki ti atua empukunoto e Kristo; metaa keitarriyiani aitoki iltung'ana pee eitobirakini te nkomono o empukoroto, pee eng'amaa Sakramenti nara sinyati.

Te nedoli etaa iltung'ana ooishiaakino, neitanapilaitashekinok (eitururrote iltung'ana te mpar e Jumapili anaa natiaakinete pooki) pee etum aayau nenyakita fonti te siedi enkisoma e are, te naa Sayiata e Seran, te naa Sayiata e Teipa, anaa nadol ilo Kasisi te nkata natiaakinete.

Kore pee eidip Kasisi aitasho te inie neibar te naa ketii oltung'ani oibatisieki apa anaa eitu; te nejokini, Eitu; nejo inchi Kasisi.

Intai ooshami oleng, enkaraki iltung'ana pooki oonutai neini too ng'ok, kulo ootiuaki to sesen naa le sesen, naa kore iloorukurukore ni atua sesen nemeidim ninche aaiting'ida Enkai mara ake keweni ti atua ing'ok neas ing'ok kumok too iasat enche; anaa natojo Olaitajeunoni lang Kristo pee ejo, Metii olloidim atijing'a enkitoria e Nkai, eitu eigili aiu, eitu eini te inoto ng'ejuk te ncare o te Nkiyang'et Sinyati; kasai intai oleng entoomon Enkai Papa, aaibot to Laitoriani lang Yesu Kristo, inchere te supatisho enye kitok metaboreya kulo tung'ana pee etum ororei obo nemeidim ninche te mpukunoto enche maate; pee eibatisai te ncare o te Nkiyang'et Sinyati, neng'amari ti atua Enkanisa sinyati e Kristo, neaku robat naaishu e inia Anisa.

*Nejo Kasisi, te inia kata,
Matoomon.*

Te inie kegil kung'a iltung'ana pooki.

NA Ai, Olaidimani le pooki o ntarasi, te nkordunoto ino kitok, intajeua Nua o iltung'ana le nkaji enye to lkadich pee meidaaya te ncare; nitoriko sii te seriani iltung'ana linono, inkera e Israeli ti atua enaiposha Nanyukie nintoduaya te inia enkitanyaanyukoto e nkibatisare ino sinyati, o te nkibatisare e Nkerai ino Yesu Kristo nisham oleng, te sere e Jorrdan, nintisinya enkare naitukoo ing'ok inia natiu anaa enkitukoto naing'opa; Ikisai iyie, too nkordunot inono nemeata enkiting'oto ning'or to Ing'er lelo aisiaiak linono; intuko nintisiny te Nkiyang'et Sinyati pee etum enjeunoto te ngoro ino, neng'amari ti atua olkadich le Nkanisa e Kristo, eidipa aaitasheito ti atua enkirukoto ebore eng'ida o ti atua siligi, nekuraki aaibung endona ti atua enhaman, neporoo lopir le na kop e sina, pee ebaki te nkiting'oto enye, enkop o intarasi, neitoreisho te nebo iyie te inie intarasi o intarasi; ti atua Yesu Kristo Olaitoriani lang. *Amin.*

NA Ai, Olaidimani le pooki obik intarasi, olaretoni le lelo pooki ooata laikin, o sii lelo pooki likikuetiki nitii, o enkishon e lelo ooirukuto, o empiunoto enche lootuata, kiomonoki kulo tung'ana metaa kepuonu aajing ena kibatisare sinyati, pee etum enkitaiinoto oo ing'ok enche te inoto ng'ejuk e nkishui. Tang'amai ninche, Olaitoriani, te risioroto lekutuk lintaia te Nkerai ino nisham oleng, pee iro nijo, Entoomon, pee eishori intai; eng'oroto pee itumutum, entooshosh metaboluni intai; Ayia inchoo taata iyioo likiomon; kore iyioo ooing'oru inchoo matum; tobolo iyioo ooshosh oltim; pee etum kulo tung'ana aating'idata te mayianata o intarasi, enkitukuoto ino e keper, pee ebaki enkitoria o intarasi nitojo te lekutuk; ti atua Kristo Olaitoriani lang. *Amin.*

Neitasho te inia kata lelo tung'ana, neiro Kasisi,
Entoning irerei supati ootisira Yohana Sinyati Chapter uni o olkereri le kue.

Etii apa oltung'ani loo Lfarisayo oji enkarna Nikodemo, aitoriani loo Lyahudi. Nelotu ele tung'ani enetii Yesu kewarie, nejoki, Rabbi, kiyiolo aajo ira olaiteng'enani oing'ua Enkai: amu meatai oltung'ani oidim ataasa kuna kitoduat nias iyie te nemeboitare Enkai ninye. Newaliki

Yesu ajoki ninye, Esipa, esipa, aajoki iyie, te neitu eini oltung'ani te inoto naing'uaa shumata, nemeidim atoduaa Enkitoria e Nkai. Nejoki Nikodemo ninye, Kaji eiko pee eidimi aatoiu oltung'ani etaa moruo? Keidim ninye atushukokinoyu eni are enkoshoke e ng'otonye metoini? Newaliki Yesu ajoki, Esipa, esipa, aajoki iyie, te neitu eini oltung'ani te nkare o te Nkiyang'et, nemeidim atijing'a Enkitoria e Nkai. Ore enatoiwuoki to sesen, naa osesen; ore enatoiwuoki te Nkiyang'et naa enkiyang'et. Ming'asia te naatiaaka, Meata kata nemeini intai te inoto naing'uaa shumata. Eisisius enkijabe nelo eneyieu, ningoltoilo lenye, nimiyiolo eneing'uaa, aashu enelo: neijia etiu pooki ng'ai oini te Nkiyang'et.

Kore pee eidip te siadi ejo irerei le na kitaarriyianata.
 Intai ooshami itoning'o te kulo Omon Supati irerei lo Laitajeunoni lang Kristo ajo, kore oltung'ani leitu eini te nkare o te Nkiyang'et meidim atijing'a enkitoria e Nkai. Intai te le rerei indimidimi aatadol ena Sakramenti enkirotetisho nemeata ajo metumi. Etiu anaa inia kata pee eilep Yesu alo keper anaa nikisoma te Chapter e nkiting'oto oo lomon lenyena Marko Sinyati pee eitanap ilkipaareta lenyena nejo, Enchom inkuapi pooki, entolikoi Ilomon Supati te pooki ooitobiraki. Pooki oiruk neibatisai neita-jeuni, o leitu eiruk neiguenareki. Naa keitadol ilo rerei iyioo eretoto kitok nikitum te ine. Naa neijia etiu pee eng'amaa Petro Sinyati olkipaaret enkata nang'as alikoo Ilomon Supati ilkumok eitameito iltauja lenche, neibar ninye o ilkulie kipaareta, Intai lolewa o ilalashera lang, kaa kias? Neng'amaa ajoki, Embalekenyata meibatisai intai pooki pee itumutum empalakinoto oo ng'ok pee eishori intai enkishorunoto e Nkiyang'et Sinyati. Kore lekutuk naa te ntai o inkera inchi o pooki ooibot Olaitoriani Enkai ang. O too lkulie rerei kumok ooitagolisho ajo, Entajeu ate te le porror torrono. Amu (Ketiu anaa ilo kipaaret olimu te nkai ng'ueji) kore enkibatisare keitajeu iyioo taata (namara pee eitai latukuny lo sesen, kake ng'amaroto o ltau supat naishiaakinore Enkai) te mpiunoto e Yesu Kristo. Emipik ate oling'ash, eruko ake ti atua iltauja linchi pee eitinyikuni kulo tung'ana te ng'ida, ooibelekenyate to nadede, nepuonu enetii ninye te nkirkoto; neishori empalakinoto oo ng'ok enche, nepik Enkiyang'et

Sinyati; neisho ninche emayanata o nkishon o ntarasi, neisho metaa iloong'ar enkitoria enye o ntarasi.

Te nkaraki ena natolimuaki kiyiolo enhaman e Papa lang le keper too kulo tung'ana te Nkerai enye Yesu Kristo; matorinyoki enashe te nkirkoto o te nkomono oo Itauja, matojo te nebo pooki,

NA Ai, Olaidimani le pooki lo intarasi, Papa le keper, ikirinyoki iyie enashe te mborron amu imboto iyioo oo matayiolo empiris ino, nikirkuk iyie. Indimie iyioo meteboreya eyiolounoto nintagol ena kirukoto ti atua iltauja lang intarasi. Inchoo kulo tung'ana Enkiyang'et ino Sinyati pee eigili aiu pee eaku olajung'oni le njeunoto nemeata enkiting'oto; ti atua Olaitoriani lang Yesu Kristo, oishu neitoreisho te nebo iyie o Enkiyang'et Sinyati, taata o metabaki intarasi. *Amin.*

Nejoki Kasisi te ne kuldoo oyieu neibatisai ele rerei.

Intai ooshami oleng ietuo ene iyieuu enkibatisare sinyati, itoning'o natojo kulo ootutumote, pee eomon pee eng'amaa intai Olaitoriani lang Yesu Kristo nemayian intai nelaku intai too ng'ok inchi, neisho intai enkitoria e keper o enkishon o ntarasi. Itoning'o sii aajo keitaia Olaitoriani lang Yesu Kristo lekutuk ti atua Orerei lenye sinyati ajo keisho iyioo imbaa pooki nikitoomonutua; naa te lekutuk lenye te nkalo enye eibung neitabaya. Kore te siedi ilo lekutuk oitaia Kristo nemeata ajo mintai sii intai te mbata inchi lekutukie te kue kulo alimunok linchi o ele Orere pooki otii aajo ianyiany Shetani o isiaitin enyena pooki, nirukuruk Orerei Sinyati te Nkai oshi ake niasias inkitanapat enyena te nkirkoto.

Neibar te ne Kasisi kulo tung'ana ooibatisai maobo obo ajoki inji.

Enkibara.

Amaa iyie, iany iyie Shetani o isiaitin enyena pooki o imbaa e pesho o enkisisa e nkop, te nebo ing'uarat torrok enyena, o iyieunot oo seseni naabore ing'ok, metaa mirukurukore ninche anaa incho ninche mikitoriko?

Walata. Kaany ninche pooki.

Enkibara.

Amaa iyie, irukuto te Nkai Papa Olaidimani le pooki, Olaitoribani le keper o le nkop?

AIBATISIEKI ILTUNG'ANA KITUAAK

O te Yesu Kristo, Enkerai enye kelei, Olaitoriani lang? Irukuto ajo etunutateki te Nkiyang'et Sinyati, etiuwaki te inia Oliontoi Maria, eitamioki te nkitoria e Pontio Pilato, neshei te salaba, nee, nenukari, nedoki enkop oo lootuata; kore te mpar e uni nepiu aitoki aing'uaa ilootuata; neilepaa alo keper, newonita te nkaina e tatene e Nkai Papa, Olaidimani le pooki; naa keitoki aing'uaa idie alotu aiguenare ilooishu abaki ilootuata?

Irukuto iyie te Nkiyang'et Sinyati; Enkanisa sinyati natii inkuapi pooki; Enchola oo Sinyat; Empalakinoto oo ng'ok; Empiunoto e sesen; o Empuan nemeish? *Walata.* Ee, kairukuto nena pooki akoraki.

Enkibara.

Amaa, iyieu nikimbatisai ti atua ena kirukoto?
Walata. Ee, neijia ayieu.

Enkibara.

Ta naa neijia, iyieu iyie niruk nias inkitanapat sinyat e Nkai o nayieu ninye, nisabisab ti atua ninche imparitin pooki e nkishon ino?

Walata. Kanyok aiko neijia, aaretito Enkai.

Nejo te ne Kasisi,

NA Ai e nkordunot, inchoo metaa enukari Adam musana otii atua kulo tung'ana metaa kepiu ilo tung'ani ng'ejuk ti atua ninche. *Amin.*

Indimie pee ee ti atua ninche ing'uarat torrok e seseni, neaku imbaa pooki ne Nkiyang'et naaishu nebulu ti atua ninche. *Amin.*

Indimie ninche te ngolon o te nkidimata pee eisulie te ng'ida Shetani o enkop o sesen. *Amin.*

Indimie lelo likitorikutua ene, iyooo ilaisiaiak linono ootii esiai ino pee eishopokini sii ninche isupatisho e keper, neishori inkishorunot o ntarasi ti atua enkordunoto ino, Olaitoriani Enkai oisisi, inchu nintore intokitin pooki intarasi. *Amin.*

NA Ai, Olaidimani le pooki oishu intarasi, naa Enkerai ino nisham oleng Yesu Kristo, te nkaraki empalakinoto oo ng'ok ang, oibukoyie enkare o sii osarge ti atua mug enye

NAIBATISIEKI ILTUNG'ANA KITUAAK

kirotet neitanap sii ilkipaareta lenyena meshomo aitai iloshon pooki ilkipaareta meibatisai ninche ti atua Enkarna e Papa o ne Nkerai, o ne Nkiyang'et Sinyati; ikisai iyie, toning'o enkomono e le turrur, intisinya ena are pee eituki ng'ok te nking'opata, nincho kulo tung'ana ootum taata enkibatisare te inia are metang'amai emborei e mpiris ino, pee eweni intarasi ti atua esiana oo nkera inono naageluno naabore enkirukoto; ti atua Yesu Kristo Olaitoriani lang. *Amin.*

Neibung te ne Kasisi enkaina enye e tatene loyieu neibatisai neitasheye te nkalo e fonti te ng'ueji neishiaakino nedol ajo eisupat, eyieu enkarna te kulo aitashekinok neitadoki enkare anaa ebukoki, ejo, Ng'ania, kaibatisa iyie te Nkarna e Papa, o ne Nkerai, o ne Nkiyang'et Sinyati. Amin.

Nejo te ne Kasisi,

IKING'AMAA ele tung'ani ti atua olturrur le mboo e Kristo naminchir* ninye to lminchere *Kore tene keminchir le Msalaba metaa meitoki atum ninye Kasisi ilo tung'ani to engorona te nelimu enkirukoto e Kristo lminchere le Msalaba oteshoki, nearare te mpijan ti abori te nkonom enye. bendera enye ing'ok, enkop o Shetani, newon aa askari le Kristo ebore enkirukoto metabaa anaa enkiting'oto nkishon enye. *Amin.*

Nejo te ne ilo Kasisi,

Ilalashera ootashamaki, ikidol taata etiuwaki kulo tung'ana kata are etipikaki atua osesen le Nkanisa e Kristo, matirin-yoki Enkai Olaidimani le pooki enashe te nkaraki kuna baa supati; nikiomon ninye to ltau obo metaa kepwo kue te nkishon enche natelekuaki meitorisi te na ng'asunoto.

Kore te ne kegil kung'a pooki nejo,

PAPA lang otii keper, Meitisinyi Enkarna ino, Meu enkitoria ino. Metaasi eniyieu te nkop, anaa enatiu te keper. Inchoo iyooo taata endaa ang naiteumu iyooo. Nipalaki iyooo inkitarruorrot ang, anaa ti nikipalaki iyooo ilooitarriki iyooo. Nimirik iyooo atua isaanat, kake intajeu iyooo te ilo arruoni. Amu enino enkitoria, o engolon, o enkitoo, Intarasi o intarasi. *Amin.*

IKINCHO iyie te mborron enashe Papa le keper, amu te munyani imboto iyioo metabaa anaa nikiyiolou empiris ino nikiruk iyie. Toriko iyioo te na yiolounoto nintagol ena kirukoto ti atua iltauja lang intarasi. Inchoo kulo tung'ana Enkiyang'et Sinyati, metaa eigailaki aaiu taata netaa ilajung'ok le njeunoto eo ntarasi ti atua Olaitoriani lang Yesu Kristo, nindimie ninche metowena aa ilaisiaiak linono netum lekutukie linono, ti atua ilo Aitoriani lang Yesu Kristo, Enkerai ino, naishu neitoreisho te nebo iyie aa obo o Enkiyang'et Sinyati intarasi. *Amin.*

Kore pee eidip aaitasho pooki, nejoki ilo Kasisi ilaitashekinok,

Amu te nkarak ikeitaiutua kulo tung'ana lekutukie te kue intai aajo keany Shetani o isiaitin enyena pooki, neiruk Enkai, neisiai ninye; meata aajo mintaparoro intai pooki ate aajo esiai naishiaakino intai naitaparo ninche olmomai kitok o lekutuk o elimoto naitaiutua ninche te kue ele turrur o te kue intai ilalimunok lenche ootegeluaki. Nimbobimbot ninche pee eiterishaki ayiolou aishiaki Orerei Sinyati le Nkai pee ebulu ninche te mpiris o eyiolounoto o Laitoriani lang Yesu Kristo, neweni te kue Enkai te supatisho o te mborron atua ena kop e taata.

Nelo kue te ne ajoki lelo ooibatisaki nejo,

O intai sii oishopo Kristo taata te nkibatisare, naa esiai inchi otaa inkera e Nkai o ne wang'an, te nkirukoto ti atua Yesu Kristo pee ipuoyieyie enaishiaakino enkibototo e Kristo o enaishiaakino inkera e wang'an; entaparo oshi ake aajo enkibatisare naa elimoto ang; naa inia pee kirukuru-kore enkoitei o Laitajeunoni lang Yesu Kristo pee eitanya-anyukieki ninye, netiu anaa ketua ninye nepiu te nkarak iyioo, naa neijia kinko iyioo ooibatisaki, ikiee too ng'ok nikipiu te supatisho; nikiar metuata oshi ake ing'uarat ang torrok naaisamis, nikipuo kue imparitin pooki ti atua supatisho pooki o elototo naishiaakino Enkai.

Kore oltung'ani pooki oibatisaki te na pukunoto keishiaakino te neitisipuni te Askofu te siedi enkibatisare enye te neidip ataanapai, pee etum aitoomono te Nchola Sinyati.

ENKIBARA (KATEKISMO)

NAA INIA ENKITAYIOLOTO
NAYILOU POOKI TUNG'ANI
TE KUE EITU EYAUNI
ENETII ASKOFU METISIPUNI

Keibar A. ilo B. ajo,

Ikiji aa enkarna ?

*Neng'amaa B. ajo,
Kaaji enkarna, Ng'ania.*

- A. Naa ng'ai likinchoo inia arna ?
B. Kaaishhooki ena arna too laitashekinok laainei ti atua enkibatisare ai, pee aaku nanu robata e Kristo, enkerai e Nkai, o lajung'oni le nkitoria e keper.

- A. Kalo rerei kintaasita te inia kata ilaitashekinok linono ?
B. Kaaitaasita te inia kata imbaa uni lekutukie okuni o ilmoma te nkarna ai kewan. Ne kue, ajo Kaany nanu Shetani o ilkazin lenyena pooki, o enkisisa e na kop torrono, o in e pesho enyena o ing'uarat pooki torrok e sesen. Ne are, ajo Kairuk Inkishiaakinot pooki e Nkirukoto e Kristo; Ne uni, ajo Kaibung imbaa pooki sinyat e nchaman e Nkai o Inkitanapat enyena naisabisab ti atua nena, imparitin pooki e nkishon ai.

- A. Mijo kinjiaakino iyie ti nias niruk anaa natojo ninche te lekutukie ?

- B. Ee, kedede iniaadol naa kaas nena te retoto e Nkai. Naisho Papa le keper enashe to Itau lai, anaa naaiboto maeu atua enkoitei e njeunoto ti atua Yesu Kristo, Olaitajeunoni lang.

Naomon Enkai pee aisho empiris enye pee awon ti atua inia oitei metabaa anaa enkiting'oto e nkishon ai.

- A. Tojo Inkishiaakinot e Nkirukoto ino.

- B. Kairukuto te Nkai Papa Olaidimani le pooki, Olaitobirani le keper o le nkop:

O te Yesu Kristo, Enkerai enye kelei, Olaitoriani lang, otunutateki te Nkiyang'et Sinyati, otiuwaki te inia Olion-toi Maria, oitamioki te nkitoria e Pontio Pilato, neshei te

salaba, nee, nenukari, nedoki enkop oo lootuata; kore te mpar e uni nepiu aitoki aing'uaa ilootuata, neilepaa alo keper, newonita te nkaina e tatene e Nkai Papa Olaidimani le pooki; naa keitoki aing'uaa idie alotu aiguenare ilooishu abaki ilootuata.

Nairukuto te Nkiyang'et Sinyati; Enkanisa sinyati natii inkuapi pooki; Enchola oo Sinyat; Empalakinoto oo ng'ok; Empiunoto e sesen; o Empuan nemeish. Amin.

A. Amaa ti atua kuna Kishiaakinot e Nkirukoto ino, akua baa itayiolo oleng?

B. Ne kue, kayiolou airuko te Nkai Papa laaitobira nanu o enkop pooki sii;

Ni are, kayiolou airuko te Nkai Enkerai naatalakua nanu o iltung'ana pooki;

Ni uni, kayiolou airuko te Nkai Enkiyang'et Sinyati naatisinyita nanu o ilgelunot pooki le Nkai.

A. Itojo keitaitua ilaitashekinot linono lekutukie te nkaraki iyie ajo imbung iyie Inkitanapat e Nkai. Tolikaki aja nena Kitanapat?

B. Tomon.

A. Akua ninche?

B. Nena naatojo Enkai ti atua Embuku e Exodus (naa Enkipung'unoto) chapter 20, pee ejo, Nanu Olaitoriani Enkai ino, likintaia te nkop e Misri ti atua enkaji e sinkaisho.

1. Meata ajo iata ai Ai namara Nanu.

2. Mintobir enkitanyaanyukoto nakueta, anaa enkitanyaanyukoto e ntoki natii keper, anaa natii enkop, anaa natii inkariak naatii enkop. Migurumakino asai, anaa isiai; amu nanu Olaitoriani Enkai ino, Enkai nalom, naijiparie inkera ing'ok oo loomenye metabaki erisiore e uni anaa ne ong'-uan e lelo laaiba nanu, naing'eru iip kuru te lelo laasham, neibung inkitanapat aainei.

3. Mimbota Enkarna o Laitoriani Enkai ino pesho, amu mejo Olaitoriani eitu eitarruo oltung'ani oibot Enkarna enye pesho.

4. Taparo empar e Sabato intisinya. Intai esiai ino imparitin ile, nias isiaitin inono pooki; kore mpar e saba naa Sabato o Laitoriani Enkai ino. Mintai inia par esiai hoo nabo, iyie openy, olayieni lino, entito ino, anaa orindik lino, anaa erindik ino, anaa inkishu inono, anaa olomoni otij

enkang ino, amu eitobira Olaitoriani keper o enkop, o inaiposha kituaak, o intokitin pooki naatii too mparitin ile, neyieng'iyeng'a te mpar e saba, te nkaraki e inia pee etamayiana Olaitoriani empar e Sabato aitisiny.

5. Ianyita papa lino o ng'utunyi, pee eaku kumok imparitin inono niwon te nkop ninkinchoo Olaitoriani Enkai ino.

6. Miar metua.

7. Miloloito.

8. Mipurisho

9. Minteeniki likai sapare.

10. Ming'uar enkaji e likai, ming'uar embaratut e likai, anaa orindik lenye, anaa erindik enye, anaa olkiteng lenye, anaa sikiria enye, anaa entoki hoo nabo e likai.

A. Atua kuna Kitanapat akua imbaa kituaa nintayiolo iyie kewan?

B. Kaitayiolo kewan imbaa are: enaishiaakino te Nkai o enaishiaakino te lelatia ai naas.

A. Amaa, akua imbaa naaishiaakino te Nkai nias?

B. Kuna imbaa naaishiaakino te Nkai naas, naa kairuk ninye, naurie ninye, nasham ninye to Itau lai pooki, te ng'eno ai pooki, te nkishui ai pooki, o te ngolon ai pooki; asai ninye, narinyoki enashe, natiriman ninye katukul, naibot ninye, naanyit Enkarna enye sinyati, o Rerei lenye, naisiai ninye te nadede imparitin pooki e nkishon ai.

A. Akua imbaa naaishiaakino te lelatia ino nias?

B. Kuna imbaa naaishiaakino naas te lelatia ai, asham ninye anaa kewan, naitaas iltung'ana pooki anaa nayieu ninche naaitaas nanu; asham papa o yieyio, naanyit naret ninche; aanyit nairuk Olaiguennani, o pooki kutiti te ninye oishooki inkitanapat; naning'isho too laiguennak lainei, too lalikiorok lainei, o too looitoomon iyooo too Itauja o too lkituua lainei; naitore kewan te mborron o te ng'iriata aishiaakino iltung'ana pooki kituaa te nanu; namitariki iltung'ana pooki te nairo anaa te naas; naaku oltung'ani losipat naitadeede te pooki naas; namaata lidata anaa enkiba ti atua oltau lai; naibok enkaina ai pee mapurroo entoki pooki nairita olng'ejep lai pee mairo orerei torrono, o sapare o enkiteenekinoto; nairita osesen lai naaku oloitabaya, namaaku lomera anaa lololoito; namang'uar anaa ayieu imasaa oo lkulikai tung'ana; kake aitayiolo kewan anyok

aas esiai ai natumie imasaa aainei openy, naas naishiaakino ti atua empukunoto e nkishon nasham Enkai naipotoki.

Nelo kue ilo aibar.

A. Enkerai ai, taparo oleng ajo mindim ataasa kuna baa te ngolon ino, anaa airukurukore inkitanapat e Nkai, nisiai ninye, ti nimiata empiris enye openy; nemeata ajo mintayolo kewan atoomono oleng inia piris imparitin pooki. Ayia, kayieu naning ti nindim atojo Enkomono o Laitoriani.
 B. Papa lang otii keper, Meitisinyi Enkarna ino. Meu enkitoria ino. Metaasi eniyieu te nkop, anaa enatiu te keper. Inchoo iyioo taata endaa ang naiteumu iyioo. Nipalaki iyioo inkitarruorrot ang, anaa ti nikipalaki iyioo. Nimirik iyioo atua isaanat, kake intajeu iyioo te ilo arruoni. Amin.

A. Nyo iyieu te Nkai ti atua ena Omono ?

B. Kayieu Olaitoriani lai Enkai, Papa lang otii keper, ilo oisho supatisho pooki, naairuwaki empiris enye natii nanu o netii iltung'ana pooki pee kisai ninye nikisiai ninye, nikining ninye te naishiaakino. Naomon Enkai meirriwaki iyioo intokitin pooki naayieu iltauja lang o sii isesen; nekordu iyioo nepalaki iyioo ing'ok ang; neiting'id ninye meitajeu iyioo neirrita iyioo too nkasurot pooki oo Itauja o noo seseni; neirrita iyioo too ng'ok pooki o too nkitarruorrot o too lmang'ati lang loo Itauja o to lke lo ntarsasi, naisilig ajo keas neijia te nkordunoto enye o te supatisho enye, ti atua Olaitoriani lang, Yesu Kristo. Te nkaraki ena kajo Amin, metaa neijia.

A. Aja Sakramentini naaitanapa Kristo ti atua Enkanisa enye ?

B. Are ake, eyieuni oshi ake te njeunoto oo ltung'ana pooki; naa ninche Enkibatisare o Endaa o Laitoriani.

A. Ti nijo *Sakramenti*, nyo ej i neijia ?

B. Sakramenti naa olminchere li oriong odoli meitayolo ajo keishooki iyioo empiris ti atua oltau, oitanapa Kristo openy pee eaku enkoitei nang'amari inia piris o olminchere sii oitadede inia piris.

A. Aja imatuan naatii Sakramenti ?

B. Are; ematua e oriong, ninye olminchere odoli, o ematua e atua, ninye empiris o ltau.

A. Nyo ematua e oriong anaa olminchere odoli te Nkibatisare ?

B. Enkare naibatisieki iltung'ana ti atua *Enkarna e Papa*, o ne *Nkerai o ne Nkiyang'et Sinyati*.

A. Nyo ematua e atua anaa empiris o ltau ?

B. Olke too ng'ok o inoto ng'ejuk te supatisho; amu te mpukunoto ang ketiuwaki iyioo ti atua ing'ok, naa kira inkera e ngoro, kake te na piris keitaaki iyioo inkera e mpiris.

A. Nyo eyieuni too ltung'ana ooyieu Enkibatisare ?

B. Enkibelekenyata pee eing'uaa ing'ok, o enkirukoto pee enyok aairuk lekutukie le Nkai ooishooki ninche ti atua inia Sakramenti e Nkibatisare.

A. O pee eibatisai inkera kutiti ewon aa kutiti, meidim aataas kuna baa ?

B. Te nkaraki keitaia lekutukie oare too nkutukie e kuldoo aitashekinok lenche; naa lelo lekutukie lenche te neidip ataa kituua, meata ajo meitabaya ninche openy.

A. O pee eitanapaki Endaa o Laitoriani ?

B. Pee eaku enkitaparunoto o lasar lo lke le Kristo enkata pooki, o sii iretot nikitum te ilo ke.

A. Nyo ematua e oriong anaa olminchere te Ndaa o Laitoriani ?

B. Mukate o Enkambu naaitanapa Olaitoriani metang'amari.

A. Nyo ematua e atua anaa entoki natolimuaki ?

B. Osesen o osarge le Kristo nayakaki nang'amari too looata enkirukoto te Ndaa o Laitoriani.

A. Akua retot nikitum ti nikiaku ilong'ar te inia ?

B. Enkitagolunoto o enkitang'ejukoto oo Itauja lang te Sesen le Kristo o sii to Sarge lenye, etiu anaa engolon natum isesen lang te mukate o enkambu.

A. Nyo eyieuni te lelo ooponu pee enya Endaa o Laitoriani ?

B. Keyieuni nesipu oleng ate te naa kedede keibelekenyate aaing'uaa ing'ok enche e apa, o te naa kenyok aayieu nepuoyie enkishon ng'ejuk, o te naa keata enkirukoto naishu ti atua enkordunoto e Nkai te nkoitei e Kristo, o te

ENKIBARA

naa keata sii enashe te neparo olke lenye, o te naa kesham iltung'ana pooki.

Kore ti atua Enkanisa nenyok ilo Kasisi te mpar e fumapili o te mpar sinyati e Sayiata e Teipa ti atua enkiting'oto e Nkisoma e are aitayiolo neipar iltung'ana leleru aaibalie ti atua enkanisa anaa nadol ninye ajo keidim ninche ti atua ilomon le na Kibara. Kore oomenye o nong'otonye o ilkituua o nkituua sii neisho inkera enche o ilaisiaak lenche o iloisomi lenche meetu aaisom ena Kibara pee etum aashom Enkanisa te saa natageluaki pee ening ilo Kasisi metabaa anaa neiruk neidip aatayiolo pooki naitanapaki ti atua enkitayioloto.

Kore nena kera pee eidip aatabaki ilarin ooishiaakino neidim aairoro too nkutukie enche oopeny irerei le Nkirukoto o Enkomono o Laitoriani o nena Kitanapat tomon, etayioloutua neng'amaa imbaa e Nkibara, neriki enetii Askofu neata pooki ng'ai obo te lelo aitashekinok lenyena pee elimu ajo keiteleikini inkaik.

Kore pee eyieu Askofu neyauni iltung'ana leleru pee etum aiteleiki inkaik nesir pooki Kasisi inkarn oo ltung'ana pooki ootii atua Enkanisa enye anaa najo ninye keishiaakino kulo tung'ana te neiteleikini inkaik e Askofu pee esir enkarna enye te inie, neyaki anaa elo ninye openy aisho ninye; te nedol Askofu ajo keishiaakino neiteleiki inkaik enyena te nkoitei nairukurukore ena.

ENKOITEI NASIPUNYIEKI

ANAA NAITELEIKINYIEKI
ILTUNG'ANA ENKAINA
AMU EIDIPA AATABAIKINYIE ILARIN
OOTUMIE ENG'ENO

Kore te mpar nategeluaki kuldo tung'ana ooiteleikini inkaik inia kata nepuonu aaitasho te kue ilo Askofu; kore te siedi, ninye anaa likai Kasisi otii te nebo ninye neisom ena ng'asu-noto nairukurukore.

Pee etum lelo eretoto oong'amaa enkiteleikinoto oo nkaik e Bwana Askofu, kejo Enkanisa, Keishiaakino te neitanap ajo metum iltung'ana enkiteleikinoto nemara lelo ooidim aatojo Inkishaakinot e Nkirukoto, Enkomono o Laitoriani, o sii Inkitanapat tomon; neitayioloi sii Enkibara e Nkanisa naji Katekismo. Naa inia enkitanapata naishiaakino te neibung'i pee eaku etubulutua inkera netum eng'eno, neitayioloi lekutukie loo laitashokinok lenche te nkibatisare enche, neigil sii ninche oopeny too nkutukie enche o te yieunot te kue Enkanisa, neitoki aitai lekutukie aajo te mpiris e Nkai kenyok aasan te nkirukoto aas nena baa oshi ake naatang'amaitie ninche too nkutukie enche.

Kore te ne ejo Askofu,

Amaa intai ootii ene te kue Enkai Olaidimani le pooki o kulo tung'ana, ingiligil aaitang'ejuk olmomai o lelo lekutukie linchi ooata embae kitok ooitasheyeki too nkarn inchi ti atua enkibatisare inchi?

*Kore te ne ejo pooki ng'ai to ltoilo oning'oi,
Ee, kaitang'ejuk.*

Neiro Askofu te ne,

*Kore eretoto ang etii atua Enkarna eo Laitoriani.
Walata. Oitobira keper o enkop.
Askofu. Meisisi Enkarna o Laitoriani.
Walata. Taata o intarasi.
Askofu. Olaitoriani, tining'o enkomono ang.
Walata. Nincho miktabaki enkishirata ang.*

Askofu.

Matoomon.

IYIE Enkai Olaidimani le pooki o lo ntarasi, itashama aitang'ejuk kulo aisiaiak linono te nkare o te Nkiyang'et Sinyati, ninchoo ninche mpalakinoto oo ng'ok enche pooki. Intagolo ninche, ikisai iyie, Olaitoriani, te Nkiyang'et Sinyati, Olaretoni, nipon imparitin pooki inkishorunot kumo inono e mpiris; oltau le ng'eno o le njing'ata; oltau le retoto o le ngolon oo ltauja; oltau le yioliounoto o le nkirukoto e Nkai; nimput ninche, Olaitoriani, to ltau le nkuretisho ino sinyati, taata o intarasi. *Amin.*

Negil pooki kung te nkata enye te kue Askofu oiteleiki inkaik enyena pooki tung'ani inkueshi maa obo nejo,

IRITA, Olaitoriani, ele aisiaiani lino te mpiris ino naing'ua keper pee ewon era lino intarasi; nebulu imparitin pooki ti atua Enkiyang'et ino Sinyati, nelo kue o metabaki nelotu enkitoria ino o ntarasi. *Amin.*

Nejo te ne Askofu,

Metowena Olaitoriani te nebo intai.

Walata. O te nebo enkishui ino.

Kore pee eidip pooki aatigil kung'a nepon Askofu irerei nejo,

Matoomon.

PAPA lang otii keper, Meitisinyi Enkarnaino, Meu enkitoria ino. Metaasi eniyieu te nkop, anaa enatiu te keper. Inchoo iyoo taata endaa ang naiteumu iyoo. Nipalaki iyoo inkitarruorrot ang, anaa ti nikipalaki ilooitarriki iyoo. Nimirk iyoo atua isaanat, kake intajeu iyoo te ilo arruoni. *Amin.*

O ena Omono.

ENKAI Olaidimani le pooki naishu intarasi, iyie opik iyoo enkishui matayieu nikias nena baa supati naang'amari te kue iyie, Enkai, e Nkitoria ino; kitii abori inkejek nitii, ikiomonoki kulo aisiaiak linono kulo likinteleikita inkaik taata (te risioroto enkoitei oo lkipaareta linono sinyat) pee esipu (te ilo minchere) emunyani o supatisho ino naiperita ninche. Ikiomon iyie Papa metowenaenkaina ino te keper ninche imparitin pooki nincho ewon Enkiyang'et

ino Sinyati te nebo ninche imparitin pooki. Toriko ninche metayiolo neiruk Orerei lino metaa te nkiting'oto netum enkishui e ntarasi, ti atua Olaitoriani lang Yesu Kristo oishu neitoreisho te nebo iyie o Enkiyang'et Sinyati, Enkai nabo, imparitin pooki metabaiki intarasi. *Amin.*

IYIE Olaitoriani, Olaidimani le pooki, Enkai, miata, iyie eng'asunoto o enkiting'oto, ikiomon iyie pee ishamu arik iyoo nintisiny iyoo nintore iltauja lang o isesenlang te nkoitei oo inkitanapat inono pee kias nena nintanapa iyoo pee irrita iyoo oleng te ne o imparitin pooki neitajeuni iyoo isesenlang o iltauja to Laitoriani lang Olaitajeunoni lang Yesu Kristo. *Amin.*

Kore te ne neomonoki Askofu ninche emayanata, nejo neijia.

EMAYIANATA e Nkai, Olaidimani le pooki, Papa, Enkerai, o Enkiyang'et Sinyati, metaa te nebo intai aboitare intai intarasi. *Amin.*

Metii oltung'ani ong'amari ti atua Enchola Sinyati metabaa anaa neiteleikini inkaik anaa etaa oltung'ani oiteleikini inkaik neyieu ninye openy inia.

ENKOITEI NATUMYIEKI ENKIYAMA SINYATI

Iltung'ana pooki ooyieu neyamisho anaa neyami neng'asi aalikoo ilomon le nkiyama enche te Nkanisa te fumapilitin uni te nkata e Sayiata e Seran anaa (te naa meatai Sayiata e Seran) neaku te Nkomono e Teipa; neiro ilo Kasisi anaa oshi ake,

Kalikoo ilomon le Nkiyama e Ng'ania owon te Wueji o Ng'ania nawon te Wueji. Te naa keatai too intai ooyiolo embae anaa enkibooto nadede pee meitutumi kulo tung'ana oare te Nkiyama sinyati, meata ajo milimumu. Kore ena enkata e kue (*anaa are, anaa uni*) eibari intai.

Te naa kemanya too ng'uejitin naalakuanikino neitaini enkibara oo lomon lenche ti atua Inkanisani pokira are. Kore Kasisi le inia Anisa nabo nemeitai Enkiyama eitu etum Embalai naitisip ajo kedede eidipate aaibara inkatitin uni naa kore inia Balai ketumi te ildo Kasisi le Nkanisa e are.

Kore mpar nategeluaki o te nkata enche e Nkiyama e kuldo pokira are, nejing atua Kanisa te nebo ilchoreta lenche o lelatia enche neitasho te nebo kuldo pokira are neitashe olee te mbata e tatene, neitashe ng'oriei te mbata e kedianye, neiro elde Kasisi ajo,

Ilalashera ooshama oleng, ikintururro taata te ne te kue Enkai Olaidimani le pooki, o te kue ele turrur pee kintutum ele lee o ena ng'oriei te Nkiyama Sinyati; naa embae naitanapishe Enkai apa aitanap iltung'ana ewon eitu eitaruo, neitaduaya enkitutumoto naisudoro natii te rishata Kristo o Enkanisa enye; naa kore inia bae sinyati ketipika Kristo enkanyit o supatisho, anaa eneikonari pee elo ninye openy Enkiyama neas enenking'asia e kue ti atua Kana e Galilaya; neissa Paulo Sinyati inia bae ajo embae naianyiti too ltung'ana pooki; te nkaraki inia meishiaakino too ltung'ana te nejing asioki ewon eitu epaoo ninche oopeny anaa pee eitabaya ng'uarat oo seseni lenche; anaa aajing te nkikuran, mara te njing'ata e nkanyit o supatisho o ng'eno o te nkomoно e Nkai; neparoro aajo ainyo pee eitanapishe Enkai kuna baa e Nkiyama;

Ne kue, eitanapisheteki te nkaraki inoto oo nkera meti-

jing'ai ti atua imbaa o Laitoriani o nkitayiolounot enyena o enkisisa e Nkarna enye Sinyati.

Ne are, eitanapisheteki to lmairo loo ng'ok pee etumi aiuang'ie iltung'ana te lolito, pee meaku iloas ing'ok.

Ne uni, eitanapisheteki te nkaraki ina pee eaku te nebo eretokinoto o nkiritata anaa naidim oltung'ani o embaratut enye ti atua mayanata o ti atua ngoloto.

Keetuo kulo tung'ana pokira are meitutumi ti atua ena bae sinyati. Ayia, te netii oltung'ani oitoduaya nadede naibokie pee meitutumi te mbae oo nkitanapat; inchoo eiro taata anaa inchoo egira oo kenya ake.

Kore te siedi nejoki lelo ooyieu enkiyama, nejo,

Kaitaariyian naitanap intai pokira are, amu ing'amaa te inia par e nkiguena natureisho naboluni inkisudorot oo Itauja, ajo entolimu taata te neyiolo obo linchi nkibooto naibokito pe meitutumi intai te nkiyama te naishiaakino. Entayiolo oleng inchere, Kore pooki ooitutumi te nemeishiaakinore Orerei le Nkai, eitu eitutumi te Nkai, kore enkiyama meishiaakino.

Te naa ketii oltung'ani olikoo te inia par e inia Kiyama neitaduayie enkibooto pooki naidim aiboi pee meitutumi ti atua Enkiyama anaa naitanapisheteki te Nkai anaa te na kitoria, neata ele tung'ani ilalimunok o ilaitashekinot o ilkulie te nebo ninye; anaa keiteng'el intokitin naitisipunyieki e limunoto enye, te naa neijia neimalimalyeki Enkiyama e lelo pokira are, pee etum empaash naing'orarieki nadede.

Te neitu ej i keatai enkibooto pooki nejo te ne Kasisi aibar olee ilomon,

Ng'ania, Isham iyie ena ng'oriei neaku embratut ino niyam, niwon te nebo anaa naitanapishe Enkai Olaidimani ti atua embae sinyati e Nkiyama? Isham ninting'id oltau lenye nianyit, nirrita ti atua mueyian o enkata nememuei, ning'uaa inkulie pooki, niaku olenye ake openy too mparitin inchushu intai pokira are?

Newal ilo lee ajo,

Kasham.

*Kore te ne neibar ildo Kasisi enda ng'oriei,
Ng'ania, Isham iyie ele lee neaku olpayian lino likiyam*

niwon te nebo anaa naitanapishe Enkai Olaidimani le pooki ti atua embae sinyati e Nkiyama? Isham nining ninye, nisiai nisham nianyit, nirrita ninye ti atua mueyian o enkata nememuei ning'uaa ilkulikai pooki niaku enenyne ake openy too mparitin pooki inchushu intai pokira are?

Newal inia ng'oriei ajo

Kasham.

Kore te ne neiro Kasisi ajo,

Aa ng'ai oishoooyo ena ng'oriei ele lee?

Keitaakino lekutukie aaikonyi: neng'amaa Kasisi ena ng'oriei te nkaina e Papa lenye anaa olchore lenye, neisho meibung'a enkaina e tatene o lee enkaina e tatene e ng'oriei, neitayioloi metejo,

Nanu, Ng'ania, kaitaa iyie Ng'ania ajo embaratut ai nayam nanu iyie abaki ena par ti atua supati o intorrok, ti atua parakuoisho o te nkaisinanisho, ti atua mueyian o enkata mimuei, pee ashambairrita metabaa anaa neor iyioo olke, te naishiaakino sinyatisho e Nkai; o te nkarakki ena kaisho lekutuk lai.

Neing'uakino inkaik, neibung ng'oriei te nkaina enye e tatene enkaina e lee e tatene, nejo airukurukore Kasisi,

Nanu, Ng'ania, kaitaa iyie Ng'ania, ajo olpayian lai laayam nanu abaiki ena par ti atua supati o intorrok, ti atua parakuoisho o te nkaisinanisho, ti atua mueyian o enkata mimuei, pee ashambairrita nairuk metabaa anaa neor iyioo olke, te naishiaakino sinyatisho e Nkai; te nkarakki inia kaisho lekutuk lai.

Neitoki aaing'uakino inkaik kat are neisho ilo lee ng'oriei olkisoi nepiki te keper Embuku te nebo enkishorunoto anaa natomooki neishori Kasisi. Neitai Kasisi ilo kisoi neisho olee pee epiki ng'oriei olkimojino le ong'uan le nkaina e kedianye, neibung ilo lee olkisoi nejo anaa naitayioloi te Kasisi,

TE le kisoi kayam iyie, te sesen lai kaanyit, kore nanu kaaisho intokit in ainei pooki e nkop; te Nkarna e Papa o ne Nkerai o ne Nkiyang'et Sinyati. Amin.

Neing'uaki ilo lee ilo kisoi etii olkimojino le ong'uan le nkaina e kedianye e ng'oriei, negil kung'a pokira are nejo Kasisi,

Matoomon.

ENKAI, Olaidimani lo ntarasi naa Olaitobirani namayian iltung'ana pooki te munyani pooki oo Itauja, Olang'asunoni le nkishon o intarasi; intodoiki mayianata kulo aisiaiak linono, ele lee o ena ng'oriei, nikiomonoki te Nkarna ino, pee eaku anaa Isaaka o Rebeka anaa eneikona wonata te nebo te nkirkot oeeas kulo tung'ana neibung lekutukie ooitaitua ninche aajokino (amu kore ele kisoi oishooki neng'-amari naa olminchere o enkitaparunoto enche) neweni te nebo imparitin pooki ti atua enshaman naitabari, o to sotua neweni neirukurukore inkitanapat inono; ti atua Yesu Kristo Olaitoriani lang. *Amin.*

Neitutum Kasisi inkaik enche e tatenia nejo,

Kore lelo ooitutumoki te Nkai mincho oltung'ani eor.

Kore te ne neirorie Kasisi iltung'ana,

AMU te nkarakki kejo Ng'ania o Ng'ania etashamate ti atua Enkiyama sinyati neibalunye ninche te kue Enkai o te kue ele turrur, neitaitua lekutukie aajokino, nelikoo ena bae pee eishoroo te nkatainoto o ng'amaroto o Iksisi, neibung'a inkaik; kajo ketaa ninche olpayian o embaratut te nebo; te Nkarna e Papa o ne Nkerai o ne Nkiyang'et Sinyati. *Amin.*

Nejo Kasisi kulo rerei le mayianata,

ENKAI Papa, Enkai Enkerai, Enkai Enkiyang'et Sinyati, metamayiana intai neirita intai, neitowon intai te seriani; meing'ora Olaitoriani intai te nkordunoto enye neiput intai mayianata pooki oo Itauja o mpiris, metaa iwenini ti atua ena kishon te nebo, nijing'ijing enkishon o ntarasi ti atua enkop nalotu. *Amin.*

Kore te ne nelo ilo Kasisi anaa likai Arikoni enetii Misa o Laitoriani, nejo anaa kerany Zaburi 128 anaa 67 oirukurukore,

Metaa ne Papa enkitoo o ne Nkerai : o ne Nkiyang'et Sinyati;

Anaa enatiu te ng'asunoto o taata : metabaa anaa intarasi. *Amin.*

Kore pee eidipi Zaburi negil kung'a inia baratut o olpayian lenye te kue Misa o Laitoriani, eitashe Kasisi te kue Misa, neing'or ninche nejo,

Olaitoriani, tokordu iyioo.

Kristo, tokordu iyioo.

Olaitoriani, tokordu iyioo.

PAPA lang otii keper, Meitisinyi Enkarna ino. Meu enkitoria ino. Metaasi eniyieu te nkop, anaa enatiu te keper. Inchoo iyioo taata endaa ang naiteumu iyioo, Nipalaki iyioo inkitarruorrot ang, anaa ti nikipalaki iyioo ilooitarriki iyioo. Nimirik iyioo atua isaanat, kake intajeu iyioo te ilo arruoni. Amin.

Kasisi. Olaitoriani, intajeu olaisiaiani lino o enkaisiaiani ino;

Walata. Lelo likisilig iyie.

Kasisi. Olaitoriani, iriuwaki ninche eretoto naing'uaa eng'ueji ino sinyati;

Walata. Nirrita ninche intarsi.

Kasisi. Taa iyie olchurie ogol te ninche;

Walata. Nintagaa too lmang'ati lenche.

Kasisi. Olaitoriani, toning'o enkomono ang;

Walata. Inchoo mikitabaiki enkishirita ang.

Kasisi.

IYIE Enkai e Ibrahim, Enkai e Isaaka, Enkai e Yakobo, tamayiana kulo aisiasiak linono; tuuno inkoik e nkishon ne-meiting ti atua iltauja lenche; metaa kore imbaa naatayiolo ninche ti atua Orerei lino Sinyati, neitabari too iasat enche. Ing'orai te nkordunoto, naa Olaitoriani, te idie te keper, nimayian ninche. Anaa eninkuna pee imayian Ibrahim o Sara te retoto enche kitok, tamayiana aiko neijia kulo aisiasiak linono te seriani enkata pooki te nkirrita ino pee etum aatibik ti atua enhaman ino metabaa anaa enkiting'oto e nkishon enche; ti atua Yesu Kristo Olaitoriani lang. Amin.

IYIE Olaitoriani le nking'erunoto, Papa lang le keper, neponunyie iltung'ana te mayianata e mpiris ino supat; Ikiomon iyie indimie kulo tung'ana pokira are te mayianata ino metoiu inkera neweni te nebo te nchaman o te nkirkoto metabaiki nedol inkera enche eitubuloki ti atua enkirukoto e Kristo o imbaa supati, metaa enkisia oenkanyit ino; te Yesu Kristo Olaitoriani lang. Amin.

IYIE Olaidimani Enkai, te nkidimata ino kitok intobira intokitin pooki nemeatai ang'as te kue, kore sii iyie pee indip aitobira inkulie nintanapishe ajo kore ti atua olee oitobiraki te nkitanyaanyukoto ino o emua ino, naa ninye epukunye ng'oriei; Kore te inia anaa eneikuna pee intutum nintayiolo ajo meishiaakino te neori lelo lintaa nabo: Iyie Enkai naitisinya Enkiyama aiko neijia, metaa enkitanyaanyukoto e Nkiyama oo Itauja naa nabo Kristo o Enkanisa enye; Ing'ora te nking'erunoto kulo aisiasiak linono, metashama ele tung'ani embaratut enye te risioroto Orerei lino (anaa pee esham Kristo enkaibartani enye, Enkanisa, neisho kewan te nkaraki ninye, nesham neirita anaa osesen lenye makewan), inchoo sii metaa eata ena baratut enhaman nebor, nening'isho, neirukisho to lpayian lenye; naa kore ti atua enkitiring'ata o emborron o sotua eaku eirukurukore imbaratuti sinyat naairuk Enkai Olaitoriani, tamayiana ninche pokira are, nincho ejung enkitoria ino o ntaras; ti atua Yesu Kristo Olaitoriani lang. Amin.

Kore te ne neiro Kasisi,

ENKAI Olaidimani le pooki oitobira iloitiutua iyioo aang'as te kue, Adam o Hawa, neitisiny neitutum ninche te nkiyama; metubukoki intai parakuoisho e mpiris enye, neitisiny intai nemayian intai, pee inting'ididi ninye to sesen o sii to Itau, niwenini aaboitare te nchaman sinyati metabaa anaa enkiting'oto e nkishon inchi. Amin.

Ilomon oolikini.

Keishiaakino ninche naayamiate te neata Enchola te Ndaa o Laitoriani te nkata e Nkiyama enche, anaa te netumi mpaash te siedi Enkiyama.

Te nemetii Endaa o Laitoriani, nejo Kasisi,

Matoomon.

OLAITORIANI Olaidimani le pooki o Enkai o intarsi, inchoo ikiomon iyie toriko nintisiny nintore iltauja lang o sii iseseni lang ti atua enkoitei oo nkitanapat inono, o ti atua esiai oo nkitanapat inono metaa ti atua rripare ino nagol te ne o intarsi eirritaki iyioo ti atua iseseni o iltauja; ti atua Olaitoriani lang Olaitejunoni Yesu Kristo. Amin.

EMPIRIS o Laitoriani lang Yesu Kristo, o enhaman e Nkai, o enhola e Nkiyang'et Sinyati, metaa te nebo iyioo pooki intarsi. Amin.

ENKOITEI E NKOMONO TE NKATA NANUKARI LOOTUATA

Taparo ajo nairukurukureiki oshi ake pee measi too ltung'ana ootuata eitu eibatisai, anaa too ltung'ana ootanyaki, anaa too ltung'ana ootaara ate. Keng'amaa Larikoni ninche, ilmeneng'a to ltim, nelo kue alo Enkanisa, anaa Udoto, nejo

Ara nanu empiunoto nara empuan. Ore ilo laairuk nanu, ore ninye te nee, neishu; ore pooki oishu laairuk nanu nemee ntarasi.

Yoh. 11. 25, 26.

Kayiolo ajo keishu Olalakunoni lai, neitashe ninye te nkiting'oto te nkop: naa kore te siadi eitarruoye olchoni lai, naa te neme inkiri aainei naa kadol Enkai: nadol nanu te kewan, neing'or inkonyek aainei, neme likai.

Ayubu 19. 25, 26, 27

Eitu kiyau toki enkop, nimikiya sii toki te na kop. Olaitoriani oishorua, naa ninye oitayie: emayiana Enkarna o Laitoriani.

1 Tim. 6. 7; Ayubu 1. 21.

Keisomi te ne Zaburi nabo e kuna naairukurukore, anaa pokirare: Zaburi 39; Zaburi 90.

Metaa ne Papa enkitoo o ne Nkerai : o ne Nkiyang'et Sinyati;

Anaa natiu te ng'asunoto o taata : o metabaa anaa intarasi. Amin.

Neikurukurukore te ne Enkisoma natii Empalai natisira Paulo Sinyati te Korinthio: 1 Kor. 15. 20-58.

Te nebaki iltung'ana netii udoto, te nkata nenapakini olmeneng'ani apik atua enkop kejo Olarikoni te nebo ilooranyisho aajo,

Oltung'ani otuaki te ng'oriei naa kuti imparitin enyena naaishu, nebere sii ninye osina. Nebulu ninye, nedung'uni anaa entapukai, neishare anaa oloip, nemewon.

Ti atua enkishon nikitii iyoo ti atua enkeeya: Taa ng'ai king'oru te naa te iyie, Laitoriani, ora loata engoro to nadede te nkaraki ing'ok ang?

Kake iyie, Laitoriani, Enkai sinyati oleng, Laitoriani Olaidimani le pooki, Laitajeunoni sinyati loo nkordunot

kumok, mipik iyoo atua enduaran e mion e nkeeya e ntarasi.

Iyiolo iyie Laitoriani, inking'opat oo ltauja lang: minken inkiyiaa inono e nkordunoto too nkomonon ang; kake tapalaki iyoo, iyie Laitoriani sinyati oleng, Enkai Olaidimani te pooki, Laitajeunoni, sinyati le nkordunoto, Olaiguuenani to nadede lo ntarasi, nimincho iyoo te nkata e nkeeya, kioro o iyie te nkaraki osina le nkeeya.

Kore te neibukokini ele meneng'ani nkulupuo too ltung'ana ootii, nejo Olarikoni,

Te nkaraki etashama Enkai Olaidimani le pooki le nkordunoto enye kitok aya enkishui e *le alashe lang oshami otua*, ikipik iyoo osesen lenye atua enkop, inkulupuo too nkulupuo, inkurron too nkurron, inderit too nderit; to siligi odede, o lemetii olng'ash, te mpiunoto e nkishon nemeiting ti atua Yesu Kristo, Olaitoriani lang; oibelekeny iseseni lang le nchalan, metananyukie osesen lenye le nikisia, orisiore te ngolon enye kitok naisuru pooki toki ti abori ninye.

Nejo anaa nerany te ne,

Naning oltoilo oing'uaa shumata ojo, Inkero, Ang'asu taata etamayanaki kuldo ooee ti atua Olaitoriani; kedede kejo Enkiyang'et; keyeng'iyeng'a too siaitin enye.

Nejo Olarikoni,

Laitoriani, ing'eru iyoo.

Kristo, ing'eru iyoo.

Laitoriani, ing'eru iyoo.

PAPALang otii keper, Meitisinyi Enkarna ino. Meu enkitoria ino. Metaasi eniyieu te nkop, anaa enatiu te keper. Inchoo iyoo taata endaa ang naiteumu iyoo. Nipalaki iyoo inkitarruorrot ang, anaa ti nikipalaki iyoo ilooitarriki iyoo. Nimirik iyoo atua isaanat, kake intajeu iyoo te ilo arruoni. Amin.

Olarikoni.

ENKAI Olaidimani le pooki, keishu te iyie ltauja loo kuldo ooinyototo ti atua Laitoriani, neweni ti nitii iyie ltauja loo looiruk ti atua eng'ida o sotua te neitaini olola lo sesen; Ikirinyoki iyie enashe, te nkaraki itashama iyie

eishiunye *ele alashe lang* ti atua sinaitin e na kop e ng'oki; nikiomon iyie aitabaya asioki te nkordunoto ino esiana oo lgelunot linono, nintisioyo enkitoo ino; pee kitum iyooo, te nebo kuldo pooki ootanang'a enkop ti atua enkirukoto nadede e Nkarna ino sinyati, enkitabaroto supat o supatisho ino ti atua osesen o sii oltau ti atua enkitoo ino nemeata enkiting'oto; ti atua Yesu Kristo, Olaitoriani lang. *Amin.*

ENKOMONO

IYIE Enkai e nkordunoto, Papa Olaitoriani lang Yesu Kristo ora empiunoto o enkishon; te nee pooki ng'ai oiruk ninye, naa keishu; naa kore pooki ng'ai oishu eiruko ninye, mee intarasi; oitayiolo sii iyooo to lkipaaret lenye sinyati Paulo pee mikimputukuny anaa lelo lemeata osiligi te nkaraki kuldo ooilora ti atua ninye; Ikiomon iyie te mborron, Papa lang, intopiu iyooo te nkeeyaa oo ng'ok matijing enkishon e nadede; inchere te nkata nikinyototo te na kishon nikiweni to sotua ti atua ninye, anaa nikisiliga newon *ele alashe lang*; kore te nkata e mpiunoto oo ltung'ana pooki te mpar e nkiting'oto neshamari iyooo te kue inkonyek inono, nikitum enda mayianata naitai Olayoni lino lisham te pooki likisham nikisai aajo, Wotu intai inkera naatamayanaki te Papa lai, nitumutum enkitoo naitobiraki te ntai te ng'asunoto e nkop pooki; Inchoo ena, ikiomon iyie te mborron, iyie Papa lang, le nkordunoto te nkaraki Yesu Kristo Olaomonokinoni lang, Olalakunoni lang. *Amin.*

EMPIRIS o Laitoriani lang, Yesu Kristo, o enhaman e Nkai o enhola e Nkiyang'et Sinyati metaa te nebo iyooo pooki intarasi. *Amin.*

INKISHIAAKINOT OSOM O SAAL E MBAA E NKAI

1. *Nenkirukoto ti atua Matuan Uni Sinyat*

Enkai nadede neishu naa nabo ake meata eng'asunoto o enkiting'oto, meata sesen anaa robat, nemeata enkibelekenyata e mparunot, neata enkidimata o eng'eno o supatisho nemeishunye; Olaitobirani le pooki naa Olairritani loo ntokitin pooki naalio o nemelio sii. Nera ninye nabo ti atua matuan uni e Nkaiisho, naa ne mpukunoto nabo, ne ngolon nabo, nawon intarasi: Papa, Enkerai, o Enkiyang'et Sinyati.

2. *No Rerei ninye Nkerai e Nkai oitaaki Oltung'ani katukul*
 Kore Nkerai nara Orerei le Papa keiino te Papa apa ake to ntarasi, naa Enkai nadede, meata ng'asunoto o enkiting'-oto, naa nabo empukunoto enye o ne Papa, neishop empukunoto eo ltung'ani ti atua enkoshoke e Nkoliontoi namayiana, ti atua empukunoto enye, metaa intokitin are naalolong'a naabaya, ninye Enkaiisho o Tung'anisho neitutumoki te nchola nabo, nemeoro intarasi: naa nabo Kristo; Enkai nadede o Oltung'ani odede; kedede keitamioki neshei, nee, nenukari pee etum atushukoki iyooo enetii Menye, neaku olasar namara sii pee eitai ing'ok naarokonyek ake, kake intorrok pooki o ltung'ani ti atua iasat.

3. *Ne ndoyeroto e Kristo te Ng'ueji oo lootuata*

Anaa nee Kristo nenukari te nkaraki iyooo, neiruki sii ajo ketodoyie alo eng'ueji oo lootuata.

4. *Ne Mpiunoto e Kristo*

Kedede enyaka Kristo apiu to lke, neitoki aya osesen lenye eata inkiri o iloik, o naaishiaakino enkitabaroto narokong'u o ltung'ani, neilep etiunyi keper newonita te inie metabaa anaa neshukunye aiguenare iltung'ana pooki te mpar e nkiting'oto.

5. *Ne Nkiyang' et Sinyati*

Enkiyang'et Sinyati naing'uaa atua Papa o Enkerai neata narokong'u o supatisho o enkitoo nabo o Papa o Enkerai, naa Enkai e nadede meata eng'asunoto o enkiting'oto.

6. Ne Nkiteumunoto oo Lkigerot Sinyat pee eitajeuni Oltung'ani

Atua Ilkigerot Sinyat etii imbaa pooki naayieuni te njeunoto: metaa kore imbaa pooki nemeisomi ti atua lelo anaa nemesipuni ti atua ninche, meishiaakino te neitanapi oltung'ani meiruko, atiu anaa embae nairuki anaa keji meata ajo meng'amari te njeunoto. Kore nena bukui naaji Ilkigerot Sinyat, keng'amari nena to Lning'o Musana o sii to Lning'o Ng'ejuk te nkitirisioto nemetii olng'ash ti atua Enkanisa apa ake ajo no Lkigerot Sinyat nena:

Genesis	2 Mbaa e Nkatitin (oo larin)
Exodus	Ezra (1 Ezdras)
Leviticus	Nehemia (2 Ezdras)
Numbers (Hesabu)	Esta
Deuteronomy (Enkigilata)	Ayub
Yoshua	Zaburi
Waamuzi (Ilaiguensak)	Ilimunot (Inkitanyaanyukot)
Ruth	Olamikioroni
1 Samuel	Sinkolio loo Sinkolioitin (Sinkolio le Solomon)
2 Samuel	Ilaidetidetak oong'uan kituua
1 Laiguensak	Ilaidetidetak tomon o oare kutiti.
2 Laiguensak	
1 Mbaa e Nkatitin (oo larin)	

Naa nena Bukui aitoki (anaa najo Hierome) keisom Enkanisa te nkitanyaanyukoto e nkishon o sii te nkitaarriyi-anata e mpukunot; kake meyauni nena pee esipuni imbaa e nkirkukoto naa ninche kuna:

3 Ezdras	Baruk
4 Ezdras	Sinkolio loo Nkera uni sinyat
Tobiti	Ng'atini e Susanna
Yudith	Ilomon le Bel o Olasurai Kitok
Enkiting'oto e Mbuku e Esta	Enkomono e Manase
Ng'eno e Solomon	1 Ilmakabi
Yesu le Siraki (Eklesiastikus)	2 Ilmakabi

Kore Imbukui pooki o Lning'o Ng'ejuk anaa naatashamaitie oshi ake too ltung'ana, iking'amaa nikijo keata enkitoria.

7. Ne Mbukui o Lning'o Musana

Mepaasha Olning'o Musana o Olning'o Ngejuk: amu kore naatii atua Olning'o Musana kerisio o naatii Olning'o Ng'ejuk, amu kerriuwaki pokira are iltung'ana enkishon nemeiting te Kristo, naa ninye openy Olaitutumoni te Nkai o too ltung'ana, amu ninye Enkai naa Oltung'ani sii. Te nkaraki inia, meng'amari lelo oosapa ajo keteyeaitie lelo li apa osiligi le nkiti kata ake. Abaiki eitanapa Enkai Musa

inkulie kitanapat e ntasimi meen iltung'ana le Kristo nena, meng'amari metaa imbaa naaitore iloshon anaa inkitanapat e sirkali enche; te nebo nena kedede metii obo le Kristo lemeyieuni neiruk inkitanapat naaitore enkishon enye.

8. Ne Nkibalunot uni

Kore nena kibalunot uni, ne Nicea, ne Athanasio o sii inia naiboti ajo no Lkipaareta, nemeata ajo meibung'i katukul neiruki to nadede too limunot kumok o Ilkigerot sinyat.

9. Noo Ng'ok Naarokonyek anaa Ing'ok naauikino Oltung'ani

Kore Ing'ok Naarokonyek metii atua enkiemata e Adam (anaa naji te modai oo looirukurukore Pelagio) kake erashata o roroto e mpukunoto e pooki tung'ani otiumyeki te ishoi e Adam; te nkaraki inia eshomo oltung'ani katukul aing'uaa supatisho enye e kue, naa te mpukunoto enye openy eidipakino intorroni, neaku nayieu sesen imparitin pooki mejing'a o ne nkishui; te nkaraki ena keishiaakino te netum pooki tung'ani oiini te nkop engoro e Nkai. Naa kore enkitarasunoto e na torroni kewon eatai abaki ti atua iltung'ana ooigilaki aiu; te nkaraki nena kore inkitanapat e Nkai meitore ing'uarat o sesen naji te nkutuk e o Lyunani *phronema sarkos* neibelekeny ilkulikai ajo eng'eno nejo ilkulikai ing'uarat, nejo enhaman, nejo ilkulikai iyieunot e sesen. Aitoki kore lelo ooiruk neigili aaiu metii aitoki te nkaraki Kristo atua lelo ooishiaakino enkiguena naa kore te nebo inia ketolimua olkipaaret ajo kore eng'uarata etii indona oo ng'ok.

10. Ne nkisiaa e nchaman anaa iyieunot e pooki Tung'ani

Kore empukunoto eo ltung'ani te siadi eriata e Adam meidim aibelekenya kewan anaa aitobira kewan te ngolon enye makewan too iasat supati, pee eiruk neipidakino Enkai: Te nkaraki inia mikiata hoo engolon nikiasie esiai to nadede naidim aiting'ida Enkai nashamare te ninye, mikiata eretoto te mpiris e Nkai ti atua Kristo pee kitum aatasham, neas ninye esiai ti atua iyioo te nebo inia piris, kindipa aatum inia shaman supat.

11. Ne Oltung'ani Oishori Supatisho

Keikenakini iyioo aajo ikira supati te kue Enkai te nkirkukoto te nkaraki supatisho openy o Laitoriani lang Olaita-

jeunoni lang Yesu Kristo otang'amayoki; namara te nkaraki iasat ang anaa supatisho ang; te nkaraki inia ikita-yioloto aajo eikenaki iyioo mataa lonadede te nkirukoto ang openy, naa embae supat inia oleng, naa eata enkilenylenyata to Itau lo Ltung'ani, anaa elikini iyioo te nkadori too Limunot e Nkitaarianat eneiko oltung'ani oishori nadede.

12. Noo Iasat Supati

Kore iasat supati naa ilng'anayio le nkirukoto neirukurukore te siadi eishooki oltung'ani nadede, meidim ninche aaitai ing'ok ang anaa aating'iria emion e ngoro e Nkai: Kore te nebo inia eiting'id neng'amari te Nkai ti atua Kristo; amu kepuku te nkirukoto nadede neishu nemeata oln'ash; te nkaraki kewon enkirukoto nadede keyioloi too iasat enyena anaa enkitanyaanyukoto o lchani oyoloi too Ing'anayio lenyena.

13. Noo Iasat o Ltung'ani ewon eitu eishori Supatisho
Kore isiaitin naataasaki to ltung'ani ewon eitu eishori mpiris e Kristo neitu ekutakini Enkiyang'et Sinyati, te nkaraki mepuku ninche ti atua enkirukoto e Yesu Kristo nemeidim aaiting'ida Enkai ai kata nemeidim aaishoo mpiris to nadede, anaa najo ilkulikai; kake eitu easi te naishiaakino iyieunot e Nkai anaa naitanapa ninye metaasi, mikiata oln'ash aajo ketii atua enkikenata oo ng'ok.

14. Noo Iasat Naatulusoitie anaa Naatoponaki to Ltung'ani alang Enaishiaakino

Kore iasat naaji kelusoo inkitanapat e Nkai meitayioloi metii enkilaasha e kewan anaa olmen le Nkai, amu too iasat naatiu inyi meitaakino iltung'ana etiu anaa iloshukoki Enkai anaa naishiaakino; kake mara neijia ake, keaku olooas te nkaraki ninye alang naayieuni; abaki ketojo Kristo aibalibalie, Kore tin indipidip aataas pooki naaitanapaki intai, entojo, Ikira ilaisiaiak lemeata digir.

15. Ne Meatai lemeata Ing'ok Namara Kristo openy

Kedede keitanyaanyukie Kristo kewan iltung'ana too mbaa pooki, mara too ng'ok oopeny; amu etala eng'oki katukul ti atua osesen lenye o ti atua enkishui enye. Keuo pee eaku Olkuoo le Nker lemeata endioto, pee eitai enkitadiat e nkop te nkitaainoto o lasar le kewan enkata nabo, nemetii

ing'ok atua ninye (anaa natojo Yohana Sinyati). Kake kore iyioo ilkulikai abaki eibatisaki iyioo neigili iyioo aaiu ti atua Kristo, ewon ikidiak pooki too mbaa kumok; naa ti nikijo mikiata ing'ok, ikisap ate nemetii nadede atua iyioo.

16. Noo Ing'ok te Siadi Enkibatisare o Ltung'ani

Mara eng'oki pooki ne olkiei nabaraki oltung'ani aas te siadi eibatisaki mara eng'oki naasakini Enkiyang'et Sinyati nemeata empalakinoto. Te nkaraki inia memitikini enkibelekenyata te kuldo ooteriate ti atua ing'ok te siadi enkibatisare. Kore te siadi kitang'amaitie Enkiyang'et Sinyati, aikindim aashom aatung'uai emunyani aariakino ing'ok, kake kore te munyani e Nkai, ikintoki aadumunye nikishukokino imbaa supati. Te nkaraki inia meng'amari lelo oojo mikindim aataas ing'ok aitoki ikiweni te na kop, anaa emitikini empalakinoto lelo ooibelekenya to nadede.

17. Ne Nkiguenuunoto e Ng'asunoto oo Ltung'ana too mbaa enche, o No Laitoriani Enkai o Enkigelunoto enye

Kore enkiguenuunoto e ng'asunoto e nkishon anaa natabaraka Enkai too mbaa oo ltung'ana, keitanapa o kenya ake (ewon eitu eitobiruni ng'asunoto e nkop) too mbaa enyena nimikiyilo iyioo inchere keitajeu to Ideket o te nkimisoto kuldo ootegeluaki ti atua Kristo o ti atua eishoi oo ltung'ana, pee eyau ninche enetii Kristo ti atua enjeunoto o ntarasi, anaa imotio naaitobira metaa esiai e nkanyit. Naa inia eitarriyiani kuldo tung'ana ootamayiana Enkai te nkishorunoto sinyati te inia naji te ninye anaa natabaraka Enkai te Nkiyang'et enye Sinyati ti atua ninche te inia kata nategelua o too kuldo ootegeluaki; metaa keirukurukore kuldo tung'ana enkibototo enche te mpiris naishooki; metaa keshori supatisho pesho; metaa eitaki inkera e Nkai te nkealata; metaa keitanyaanyukie Yesu Kristo Enkerai enye kelei; metaa kepuoyie sii elototo sinyati ti atua iasat supati, naa te nkordunoto e Nkai abaki te siadi atua eng'ida nemeata enkiting'oto.

Kore emparunoto e Nkiguenuunoto e Ng'asunoto, o Engelinoto ang ti atua Kristo neiput iltauja le lelo ooirukuto te ngiriata o enkilenylenyata nemeimakinoi, o eng'ida, abaki lelo ooning esiai e Nkiyang'et Sinyati e Kristo ti atua ate, near metuata isiaitin o sesen o robat enche te nkop neyetaa imparunot enche metaparo imbaa e

keper naa te nkaraki naikuna neijia, mara ena ake keitasheye neitagol enkirukoto eoo ltung'ana ootum enjeunoto o ntarasi te Kristo, kake te nkaraki sii keinok enhaman ti atua iyooo matasham Enkai oleng; Anaa iltung'ana ooirrana too ng'uarat o sesen lemeata Enkiyang'et Sinyati e Kristo ti atua ninche, ketii enkata pooki lelo tung'ana enkiguena te kue inkonyek enche e Enkiguenuunoto e Ng'asunoto o Laidimani Enkai, kesur oleng neisimaki Shetani nemeisho eisilig, metaa kerumoki ate metijing'a elototo e latukuny naimisie ninche sii.

Kore te siadi meata ajo miking'amaa lekutukie le Nkai anaa naiteperoki te iyooo ti atua Ilkigerot sinyat: ikiata inkitanapat e Nkai naaibala oleng ti atua Orerei le Nkai pee kirukurukore nena ti atua iasat ang.

18. Natumieki Enjeunoto Intarasi te Nkarna e Kristo ake Keishiaakino kuldо tung'ana nedeki ooiteu aatojo keidim pooki ng'ai aitajeu kewan too nkitanapat anaa te Nkanisa enye kewan, metaa kenyok ninye awon ti atua nena eitobirishere te nyuata neirukurukore ewang'an e mpukunoto enye. Amu keibalyie Ilkigerot sinyat metaa te Nkarna e Yesu Kristo ake eitajeuni iltung'ana.

19. Ne Nkanisa

Kore Enkanisa nolio ne Kristo na olturrur le lelo oobore enkirukoto o ti atua inia aji elikini Orerei oipida le Nkai, neishori te supatisho enye Sakramenti te nairukurukore enkitanapat e kue e Kristo ti atua nena baa pooki naayi-euni.

Kore Inkanisani e Yerusalem, Alexandria o Antiok, ketopong'ori; neijia etiu sii Enkanisa e Roma, namara too iasat enche ake, o impukunot e Nkomono enche, kake ti atua imbaa naaishiaakino Enkirukoto enche.

20. Ne Nkitoria naatai te Nkanisa

Keata Enkanisa engolon naiteperie enkoitei e Nkomono o enkitoria ti atua Enjankar e imbaa e Nkirukoto: Kake abaki etiu neijia meidim Enkanisa aitanapa irerei pooki lemeishiaakinore Orerei le Nkai osira, nemeidim atetioki olomoni obo ti atua Ilkigerot metaa mejing'aa ilo omoni enkai ng'ueji. Te nkaraki inia era iltung'ana le Nkanisa ilalimunok o ilairitak le Mbuku e Nkai, kore te nebo inia

meishiaakino te neing'odei iltung'ana irerei pooki lemeishiaakinore Orerei Le Nkai anaa neijia meishiaakino neismakini iltung'ana meiruko ilomon pooki anaa iloitajeusho, mara ilootii atua Biblia.

21. Ne Nkitoria e Nkiguena Kitok, anaa Ilomon Oonyakinoi Enkanisa too Lalashera

Meiboti iltururri ti atua Enkanisa nalolong'a metii enkitanapat oo Laitoriak anaa nayieu ninche. Naa kore pee eidip aaitururroto (amu te nkaraki mera ninche pooki iltung'ana ooitorei te Nkiyang'et e Nkai anaa to Rorei lenye), keidim aatopong'ori, amu etopong'ori ai kata, abaiki too mbaa naaishiaakinore Enkai. Te nkaraki inia kore imbaa naaitanap naaishiaakino enjeunoto meata engolon anaa enkitoria, mara keibalunye inkitarriyianat aajo ketumi ti atua Ilkigerot sinyat.

22. Ne Ng'ueji Naitisinyeisho

Kore enkitayioloto oo ltung'ana le Roma too mbaa naaitisinyeisho anaa impalakinot, o Inkomonon e Nkintanyaanyukot, o noo lootuata, anaa iltung'ana sinyat ootuata ooing'orari, naa imbaa e pesho nemeata digir, nemeirukore enkitayioloto oo Lkigerot pooki sinyat, kake eibaii to Rerei le Nkai.

23. Ne esiai ti atua Olturrur le Nkanisa

Meishiaakino neitaa oltung'ani kewan olalikoroni te kue iltung'ana anaa eishoyo Sakramenti ti atua Olturrur, eitu eiboti neirriwari anaa naitanapisheteki metaasa nena. Keishiaakino aitoki ti nikijo iyooo eibotoki neirriwari te nkoitei supat iltung'ana anaa naitanapisheteki too nkitanapat too kuldo ootegeluaki neiboti too ltung'ana ooishoki enkitoria te kue olturrur ooibotoki metutumoto neirriwari atua enkurma o Laitoriani.

24. Ne Nkiroroto naishiaakino neirorie te Nkutuk Naning'oi

Te neitaini Enkomono ti atua olturrur anaa enkishoroto e Sakramentini ti atua enkutuk nemening'o too ltung'ana mejing'a katukul nena baa Orerei le Nkai o empukunoto e Nkanisa narokong'u.

25. Ne Sakramentini, anaa Inkirorot naaji Naing'opa

Kore Sakramentini naaitanapa Kristo metiu anaa olminchere ake anaa empukunoto oo ltung'ana oojo ikira le Kristo, kake keishiaakino neaku ilimunot naadede neaku sii naaitodolo empiris o Laitoriani Nkai, pee eaku eng'eru iyoo neitobirishere ti atua iyoo medolitai, nepik iyoo enkirukoto metaa ikiruk neitagol iyoo aitoki.

Sakramentini naaitanapishe Kristo Olaitoriani lang ti atua Orerei Supat, naa are, Enkibatisare o Endaa o Laitoriani.

Kore kunda imiet naaji Sakramentini naa Enkitelekinoto oo Nkaik, anaa Limunot oo Ng'ok too Kasisini pee epalakini, o Enkishoroto naishori oltung'ani enkitoria ti atua Enkanisa, te naa Shemasi anaa Kasisi anaa Askofu, o Enkiyama, o Enkielata eilata te nkata e olkiei, naa meji ninche Sakramentini ti atua Ilomon Supati le Nkai, amu ketupukutua embata e nena ti atua saparia namara enkitayioloto oo Lkipaareta, nepuku embata ti atua Ilkigerot sinyat naa ninche impukunot e nkishon naishori ilootojoki; mara nena Sakramentini anaa Enkibatisare anaa Endaa o Laitoriani, kake meata ninche enkitoduata nario anaa enaitanapisheteki Enkai.

Kore Sakramentini e Kristo eitu eitanapisho pee eing'-orari anaa aaitamanaa kake pee kintobirishere. Kake keata digir ti atua lelo oang'amaa te naishiaakino enyena ti nikiaasisho te nkitanyaanyukuto enkoitei enye. Kore lelo lemeng'amaa te naishiaakino netum ninche enkiguena te nkiting'oto e nkishon enche, anaa natojo Paulo Sinyati.

26. Ne Ngolon Natii atua Imbaa Naaitanapishe Kristo meitung'uaa Entorroni oo Lelo Ooishoyo

Kore ti atua Enkanisa nario keshola iltung'ana torrok o supati enkata pooki, kore ilaisiaiak lo Rerei le Nkai o imbaa enyena sinyat eitoreita iltorrok, naa te nebo nena, amu meas nena baa too nkarn enche maate, kake te nkarna e Kristo, amu keitai esiai enche to nkitanapata enye te lekutuk lenye, naa too nkitarriyianat enche o too nkitanapat naa ikindim aataasishere isiaitin enche te naa kining Orerei le Nkai anaa aang'amaa Sakramentini enyena. Kore iretot naatii imbaa naaitanapishe Kristo meitaini te ntorroni enche, anaa mpiris naing'uaa inkishorunot e Nkai nemeitong'or te

lelo oopuo nena Sakramentini naang'amari te nkirkoto naata tepat neata engolon te nkaraki naitanapishe Kristo o lekutuk lenye oitaia abaiki eishoyo iltorrok.

Naa kore nena pooki keishiaakino rikoto Enkanisa inchere kesipuni imbaa e lelo torrok ooata enkitoria te Nkanisa pee elikori lelo tung'ana too loyiolo inia torroni enche; naa enkiting'oto enche te neidipi aatayiolo inchere ilooitarroitie neiturrari te siai te nkiguena nadede.

27. Ne Nkibatisare

Kore enkibatisare mara enkitoduata ake anaa olminchere too ltung'ana le Kristo pee etumi aatayiolo iltung'ana le Kristo o lemara, kake olminchere le inoto e are nepiki te nkaraki inia atua Enkanisa enche ilootang'amaitie anaa naishiaakino lekutukie oopalakinyeki ing'ok neshamari meteji inkera e Nkai te Nkiyang'et Sinyati nepiki olminchere neeni to naibala; neitirishe te nkirkoto neponari empiris te ngolon e nkomono e Nkai. Eibatisai inkera kunini te nkoitei naishiaakino neimi ti atua Enkanisa amu enkoitei naishiaakinere oleng enaitanapishe Kristo.

28. Ne Ndaa o Laitoriani

Endaa o Laitoriani mara enkitoduaya ake naishiaakino le Kristo neshama ninche maate, kake olminchere le Sakramenti e lakunoto too iyoo to lkiei le Kristo: ketiu anaa inia too kuldoo oong'amaa to naishiaakino te nkoitei enkirkoto neaku Mkate nagili neishori neng'ari Osesen le Kristo: netiu neijia Enkikombe e Mayianata, keng'ari Olodo le Kristo.

Enkibelekenyata e Mkate o Enkambu etaa embae Endaa o Laitoriani, mesipuni too Lkigerot sinyat, kake keibala ajo kepasha to Rerei lo Lkigerot. Keibelekenya empukunoto e Sakramenti, neitoki sii aisho mpaash inkomonon kumo nemeata tepat.

Kore Osesen le Kristo keishori neng'amari nenyai ti atua ena Daa te nkoitei e keper o noo Itauja. Naa kore iltung'ana oong'amaa nenyia Osesen le Kristo ti atua ena Daa naa te nkoitei e Nkirukoto naata ninche.

Naa inia Sakramenti Endaa o Laitoriani eitu eiteng'eli te nkitanapata e Kristo anaa enapi idye o idye anaa eilepieki anaa esaii.

29. Noo Ltung'ana torrok oonya Osesen le Kristo te neitobirishere Endaa o Laitoriani

Kore iltorrok o lemeata enkirukoto naishu abaiki te nenyal too lala lenche Sakramenti o Sesen o Sarge le Kristo (anaa natojo Augustino) meng'ar ninche Kristo; kake te nkiguena enche e ngoro enya nemat ti atua inksudorot e embae kitok anaa inia.

30. Noo mpukunot pokira aare

Kore Enkikombe o Laitoriani naa keishiaakino nememitiini Olkiyama le Kanisa; amu te nkitaariyianata o te nkitanapata e Kristo anaata eishori le Kristo imbat pokira aare e Sakramenti o Laitoriani metii napaasha.

31. No Lasar Obo le Kristo Oitabayeki te keper Oljani

Amu kore te nkarakki olasar le Kristo eitayaki kata nabo etumieki elakunoto te nkop pooki naiteumu naiting'id Enkai neitabari yieunot naitai intorroni e nkop pooki anaa naiikino oltung'ani anaa noo iasat: nemeata ai kiteumunoto too ng'ok mara ena ake. Te nkarakki inia ketaa natini namorieki Enkai o saparia naasur naa nena ilasari ti atua Mass, ejo ilkumo inchere ilarikok ooitaa Kristo olasar te ne opaliki ilooishu o ilootuata te naa te mion enche anaa too ng'ok enche.

32. Ne Nkiyaman eoo Larikok

Kore Askofuni, Kasisi, o Shemasi, eitu eiboori too nkitanapat pooki e Nkai, neitu eitami olmomai inchere meyamisho; anaa aabok ate te nkiyama: Naa te nkarakki inia keidim kulo tung'ana aayamisho anaa le Kristo pooki anaa nadol ninche, inchere keishiaakino ti atua enkanyit e Nkai.

33. Naiwang'ieki Lotooroyieki

Kore oltung'ani otooroyieki to nadede ti atua enhola e Nkanisa, naa keitarriyiani Enkanisa too mbaa enyena te kue iltung'ana inchere entorroni enye natangan'ayiye boo naa keji too looiruk ilo tung'ani anaa lemeiruk metabaa na neishiunye enkitutumoto Enkanisa te kue iltung'ana te neitai limunot too nkitanapat o Larishani oishiaakino enkitoria.

34. Noo mbiyon e apa e Nkanisa

Kepaasha imbiyon o impukunot oo ltung'ana nemenyan-yuk katukul too ng'uejtin pooki; amu kore imparitin pooki keaku kelamilama neidim aaitapasha inkitanyaanyukot o inkuapi o ng'amat o impukunot oo ltung'ana, te naa meitobiri too Rerei le Nkai. Amu etipikaki neshamari too nkitanapat oo ltung'ana aajo ele oltung'ani oshukokini te kue iltung'ana (pee etum ilkulikai aaturia pee meas anaa ilo), amu oltung'ani oitaroyie enkoitei e Nkanisa neitaruo enkitoria naitoreisho, neitoki aiteme imparunot oo lalashera ooshal.

Kore pooki Anisa nalamita inkulie anaa natii atua likai marei keata enkidimata naiteperie neibelekeny neitoraa inkoiteii e Nkanisa natii enkitanapata oo ltung'ana metaa keasi imbaa pooki naishiaakino.

35. Noo Limunot oo Nkitaarriyianat

Kore Embuku e are oo Limunot oo Nkitaarriyianat nasira inkarn pooki te ne te nkiting'oto e na Kishiaakinoto ketii inkitayiolot e nkanyit e Nkai naata supatisho nayicuni oleng too kuna ng'amat, naa neijia etiu te Mbuku oo Limunot oo Nkitaarriyianat e kue naatolimuaki apa te ng'amata e Edward le ile: ikijo iyioo keishiaakino te neisomi ti atua Inkanisani naasisherekki te nyuata o to ltoilo oning'o pee etum iltung'ana aatayiolo enkoitei enye:

oo Inkarn eoo Limunot eoo Nkitaarrianat

1. Naasisherekki Enkanisa anaa naishiaakino.
2. Ne Nkitaarriyianata e nkasuroto nasaii inkitanyaanyukot.
3. Ne Nkitobirata Enkanisa o enkiritata o oroto.
4. Noo iasat supati o ne kue empukuroto.
5. Ne anyata e luboi o merai.
6. Ne anyata e Sikar e nkishopoto.
7. Ne Nkomono.
8. Ne Ng'ueji o Eng'amat e Nkomono.
9. Ne Nkomono o Sakramentini ti atua Inkanisani neata Digr te neasisherekite Nkutuk Naning'o too ltung'ana.
10. Neishiaakino te neisomi Orerei le Nkai te nkanyit.
11. Noo Nkishorunot too laisinak.
12. Ne Inoto e Kristo.
13. Noo Nkitamiot e Kristo.
14. Ne Nkitipiunoto e Kristo.
15. Ne Naishiaakino nang'amaa iltung'ana Osesen le Kristo, o Sarge lenye ti atua Sakramenti.
16. Noo Nkishorunot e Nkiyang'et Sinyati.
17. Noo Mparitin e Nkibara.
18. Noo Mbaa e Nkiyama.
19. Ne Nkibelekenyata too ntorrok.
20. Ne Anyata e Njalan.
21. Ne Anyata o Lkuukui.

36. Ne Nkiteperokinoto e Askofuni o Iloisiaisho

Kore Embuku e Nkiteperokinot e Askofuni kituua o ilkulie

INKISHIAAKINOT OSOM O SAAL E MBAA E NKAI

Askofuni ooishori metaa Ilarikok, Kasisini o Shemasini naitobiraki te nkata e Edward le Ile neng'amari te nkitoria e Enkiguena kitok eoo mbaa e inia kata, ketii imbaa pooki atua inia Buku naishiaakino neiteperokini lelo tung'ana ooishori metaa Ilarikok, metaa meatai imbaa e modai anaa embae nemeishiaakinore enkoitei e Nkai. Te nkaraki inia kore lelo tung'ana ooiteperokini Enkai anaa ooitaa metaa Ilarikok te nkoitei e inia Buku abaye ilo ari li oare le ilo Aiguenani Edward le Ile metabaki ena kata, anaa ooiteperokini te Nkai meitaai Olarikoni te siadi kenya ake te nkoitei eoo mbaa e inia Buku, ikijo iyioo kore lelo ooiteperokini Enkai te inia oitei naa keishiaakino naa keirukuru-kore inkitanapat ake pooki.

37. Noo Laiguenak le Sirkali

Kore Oloitoreisho le ena kop e Uingereza o inkulie naaitore ninye etii enkitanapata naitai ilarikok pooki loo ltung'ana ti atua ena kitoria anaa ne Nkanisani anaa ne Sirkali too mbaa pooki, nemetii enkitanapata e ai kop anaa nemeishiaakino enkitoria enche.

Ikincho iyioo enkitoria kitok Oloitoreisho naa kore inia anyit nikiparo keibaa ilkulikai te nkaraki metetel. Mikincho Illoitoreisho esiai e Rerei le Nkai anaa imbaa naaing'opa naaitanapa Kristo, naa imbaa naatolikoyeki too naaibalnaa inkitaarriyanat naatolimuaki det te Nkaiguenani ang Elizabeth: Ikincho ake nena nadede ilaitoriak pooki ooirukore enkuretisho e Enkai, ooisho Enkai too mparitin pooki ti atua Ilkigerot lenyena sinyat inchere ninche ilopeny enkitoria o enkitoo naapasha too ltung'ana ooisho Olaitoriani Enkai te naa ti atua Enkanisa anaa ti atua Sirkali pee eiboyo lelo laimetetelok o ilooas intorrok, to lalem le Sirkali.

Meata hoo Askofu le Rome inkitanapat anaa engolon ti atua ena kitoria e Uingereza.

Keidim Sirkali aiguenare iltung'ana le Kristo te nkiguena e olkiei te ntorroni nairoshi naishiaakino naarieki.

Keishiaakino teneitanapi le Kristo ooitorei keidim aata-nap masaa naapuoyeki enjore.

38. Noo Masaa oo Ltung'ana le Kristo Nemeshola

Kore Masaa oo le Kristo naa intokitintenche meitosholi te nkitoria anaa eoruni anaa najo ilkulikai ooji Ilooibatisak te

INKISHIAAKINOT OSOM O SAAL E MBAA E NKAI

saparia. Abaiki te naa neijia keishiaakino oltung'ani pooki te neishoyo te yieunoto intokitintenche enyena aaisho ilaisinak anaa naidim.

39. No Lmoma le Le Kristo

Anaa nikilimu aajo kore olmomai le sapari o le pesho etimitikaki le Kristo to Laitoriani lang Yesu Kristo o Olkipaaret lenye Yakobo, ikinguena te mpukunoto e Kristo inchere memitikini oltung'ani enya olmomai te neyieuni neitoreii te nkaraki ilomon le nkirukoto o le nchaman, te naa keaasi nena baa te risioroto naitayiolo Olaidetidetani to sipat te nkiguena o to nadede.